

Ni been ree xi Apóstoles Jesucrist

1 Rugajpdiozan liij dad Teófilo:
Loj da gui'ch yalojn rnin graczi
ni been Jesús ni balüü tēeman chi
guzuloj xchiinman ²xt chi ziaman
xanyabaa. Chi gadaman yaguiaj,
gunabeeman bēn naj ree apóstoles,
bēn guleman, ni rayal güün
reeman, zi'c rēb xSprijt Dios lojman.
³Chi mal guzagdiaj da'taman loj
xguialgüjtaman, babanman loj ree
bengüt. Loj tiuu dxej balüülojman
zien volt loj bēn naj ree apóstoles,
persi gogbee reeman nabancaman.
Dxej zii ree guneenēman laa
reeman xcwent xguialrniabee Dios.

⁴Chi ziz za'nēman laa reeman,
guneenēman laa reeman ad yaza
reeman Jerusalén, rēbaman:

—Gol gulējz gac cumplid ni
na da Dadan zi'c ma rnin lojdi.

⁵Walican baroobnijs Waj con nijs,
per ma zidyob dxej gui't xSprijt
Dios guibannē lējt, laan gac zi'c
guialrirobnis par lējt.

Zia Jesús xanyabaa

⁶Lēn ree dxej zii chi badxaag
lasa' reeman con Jesús, gunabdiidx
reeman lojman rēb reeman:

—Dad, ¿yanan yayül guialrniabee
loj ree bēn Israel ya?

⁷Badxi' Jesúsán rēbaman:

—Ad lējtít rayal gagbee xhie
dxejn o xhie horan gac zian. Tijbzi
da Dadan ragbee laan din laaman
ca' guialrniabee. ⁸Per chi ma
nabannēdi xSprijt Dios, tia'di
guialrniabee. Dxel griidi chiguedi
diidx loj ree bēn Jerusalén chu najn,
nē gra ree guiedx riga' niz Judea nē
niz Samaria, xt ree guiedx ren ni
riga' ree zijt da't.

⁹Gulox guneeman, ruguiaa
reeman laaman dxejlczi wajsaman
ziaman xanyabaa, abi' biguiajt
tijb bēj bata'cwan laaman, dxel
ad baguiaatri reeman laaman.

¹⁰La'tgaj ruguiaa reeman ziaman
xanyabaa, gulentie tio'p ree bēn
najcw lajd naquich lod za' reeman,
¹¹abi' rēb reeman loj ree apóstoles
guin:

—Bēn Galilea, ¿chexc zeel
sta ruguiaadi xanyabaa? Jesús,
bēn baguiaadi zia xanyabaa,
laagajcaman yaguaaad stijb, zi'cgajc
baguiaadi ziaman.

¹²Chi baza ree xi apóstoles Jesús
ruguia' la Olivos, guza reeman zi'ct
rza reeman dxej raziiladx reeman,
persi badxin reeman Jerusalén.

¹³Chi badxin reeman, wē'p reeman
lēnü ladya lod zojb reeman. Brii laj
reeman Bēd, Waj, Jacob, Andrejs,

Felip, Tumajs, Tol, Matew, Jacob xi'n Alfeo, Simón (bén guzunë ree bén cananistas), në Judas xi'n Jacob. ¹⁴Gra reeman rüjn tijbzi xgab, radxaag lasa' reeman din cwedx guiniab reeman Dios, con ree bijch Jesús con Li xniaaman, con ree béngunaa ren.

Gulej reeman bén baya'n xluar Judas

¹⁵Lën ree dxej zii bado'p ree bén riladx Jesús, naj reeman cost tibgayuu gajl bejn, dxel guzuli Bëd galay reeman, rëbaman loj reeman:

¹⁶—Compniar raliduladx ree Jesucrist, ganin lojdi, gojc cumplid ni bacaa rey Davi loj xtiidx Dios por xSprijtaman xcwent Judas, xin balüü Jesús loj ree bén gunaaz laaman, ¹⁷gojqix tijb dux compniaran, në laax been lasa' dxiin raguieenan. ¹⁸Per con milia ni gudix reeman laax por ni mal beenx, bio' guidxliuj lod gudidya'x, bazuj guijquix, goxya'x abi' brii gra xziix. ¹⁹Chi gogbee gra ree bén Jerusalén ni goc, gunee reeman guidxliuj zii Acéldama, rën guiëban guidxliuj rejn. ²⁰Din rëb loj libr la Salmos:

Yaya'n dëjch lidix,
achutziri cwe lënan.

Rëb tëë lojn:

Yayu ben ren guia'x.

²¹'Zeel loj gra ree bén za'në dunuj ree guidib tiamp ni guzunë Jesús dunuj ree, ²²diizd chi baroobnijs Waj laaman xt chi ziaman xanyabaa. Loj gra reeman rayal grii tijbaman din güünman dunuj ree yudar yaguie'ch ree loj ree bejn guial walican babanman loj ree bengüt.

²³Dxel gulej reeman tio'p reeman: tijb Bén la Xiëb (rniee reeman laaman Barsabás, rniee tëë reeman laaman Justo), gulej tëë reeman Bén la Matías. ²⁴Dxel gurejdx gunab reeman Dios, rëb reeman: —Dad, lüj nünbee luxdoo gra ree bejn. Baliüü chu loj grop reeman gulejl ²⁵din gacaman apóstol luar Judas, din banijtix delant lojl por dol ni beenx abi' ziax luar ni rayalix.

²⁶Dxel baguiaa reeman chu yayal suert guin, abi' bayal Matías laan. Loj hor zii gajc bayuman loj zachibtib ree apóstoles.

Biguiajt xSprijt Dios diizd xanyabaa

2 Chi bidxin dxej gojl lanij la Pentecostés, gra ree Bén riladx Jesucrist bado'p tijbzi luar. ²Dxejlczi gojc naquie' xanyabaa zi'c bidoxh xt bayu bi lënü lod riga' reeman, ³abi' gulentie zi'c bajl dobëz ree, biguiajt reen guijc tijb gaj reeman. ⁴Zianz guyu xSprijt Dios luxdoo graczi reeman, dxel guzuloj canee reeman diidx ren ree zi'c cusnee Sprijt guin laa reeman.

⁵Lën ree dxej zii za' zien ree Bén Israel Jerusalén, baza reeman gra ladczi din cwedx guiniab reeman Dios. ⁶Chi biguiejn reeman cayajc naquie', bado'p reeman persi biquiaa reeman. Dxel chi biguiejn reeman rniee gra ree Bén riladx Jesús xtiidx tijb gaj reeman, ad badxejlt xgab nüjn reeman. ⁷Dád badxa loj reeman xt ni'quid badxejlt xhie nüjn reeman, abi' gunabdiidx loj lasa' reeman rëb reeman:

—¿Nid Bén Galilea gra ree Bén canee guin ya? ⁸¿Chexc zeel

raguiejn ree rniee reeman dux tiidx ree? ⁹Du loj ree no'ch ree b́en źeéd guiedx riga' ree niz Partia, Media, Elam, Mesopotamia, Judea, Capadocia, Ponto, Asia Menor, ¹⁰b́en źeéd t́eé ree guiedx riga' ree niz Frigia, Panfilia, Egipto, ńe ree guiedx nulen Libia ni riga' ree gajxh Cirene, ńe ree b́en źeéd Rom, yu' reeman gojl Israel per naban reeman Rom, yu' t́eé reeman naj quijb ben Rom per rililadx reeman ni rililadx ree b́en Israel. ¹¹Ńe ree b́en źeéd niz Creta ńet́eé ree b́en źeéd guiedx riga' ree niz Arabia no'ch du loj ree. iPer dugraczi ree caycaagdiajg con dux tiidx ree niza'cdxoon ŕijn Dios!

¹²Graczi reeman badxa da't loj xt ni'quid badxeljt xgab ńijn reeman, abi' guzuloj canabdiidx loj lasa' reeman ŕeb reeman:

—¿Xhie ŕen guiéb gra ni guie?

¹³Per garol reeman baze' laa reeman, ŕeb reeman:

—Rè' reeman.

Ni ŕeb Béd loj ree bejn

¹⁴Dxel guzuli Béd con zachibtib ree apóstoles guin, guneeman rejs ŕebaman:

—Léjt b́en Judea ńe graczi ree b́en zojb Jerusalén, gol bacaagdiajg gol bignia' t́eé ni ganin. ¹⁵Ad ŕe't ree b́en guin zi'c naladxidi, din qui gojlri raca gaa rsil. ¹⁶Guie cayajc cumplid ni gunee b́en brii laj Joel, b́en badéé xtiidx Dios loj ree bejn, chi ŕebaman:

¹⁷Na Dios,
guidxin dxej gaxhal da Sprijtan luxdoo gra ree bejn,

abi' xi'ndi xinguaaaw con biingunaa gudééd reex da diidxan,

zien ree ni gulüüloj loj ree xinguiag,

guiáad ree bengol zien ree ni guinie'xchaal reeman.

¹⁸Dxej zii ree gaxhal da Sprijtan luxdoo ree b́en ŕijn da dxiinan,

xinguaaaw ree ńe ree béngunaa, abi' gudééd reeman da diidxan.

¹⁹Gulün sen ree xanyabaa ni yadxa lojdi,
guiáad loj guidxliuj gulün sen ree

zi'c rejn ńe bajl ńet́eé go'xh.

²⁰Guicajy loj gubijdx, guiáad béew yajajcan zi'c rejn.

Chi ma gojc zian, dxel guidxin quijb dxej guin,

dxej za'cdxoon gui't Dios b́en rniabee,

dxej guiguien guidib xbianiman.

²¹Abi' graczi ree b́en cwedx guiniab laaman güünman laa reeman perdon.

²²Réb t́eé Béd loj reeman:

—Yan, gol bacaagdiajg ni ganin léjt b́en Israel: Léjt ragbee guial Jesús b́en Nazaret najman b́en guxhaal Dios, been t́eéman milagr ree ńe ree ni radxa loj ree bejn zi'c sen din gagbeedi guial Dios guxhaal laaman. ²³Diizd gocli mal ńijn Dios xgab guial zian güünnédi Jesús, gunaazidi laaman bayüdi laaman loj ree benmal, din gugüjt reeman laaman loj crüjz.

²⁴Per basban Dios laaman stjib, babéeman laaman loj guialgüjt, din ad gojct nutéé guialgüjt guin

laaman. ²⁵Chi gunee rey Davi xcwent Jesús, rëbaman:

Zianczi baguian dux Dad ree

Dios za'nëman naj.

Za'man da ladbeen, achetczy zajc guchejb naj.

²⁶Zeel yu' luxdon nix, ruzat tëën Dios zagdxé.

majsi guiëtan ad rdxebtan,

²⁷din ad zusa'ntil naj lën baa, ad zatiëjbtil xhin xcuerp xi'n1 bën naya nali.

²⁸Balüül naj nejz runee guialnaban,

chu' tëë luxdon zagdxé guial guibannël naj.

²⁹Basnuu gunee Bëd, rëbaman:

—Ganin loj gradi compniar, diidxiczi dux béngulal ree Davi güjtaman biguie'ch tëëman, abi' laa xbaaman sta raguiiaa ree yan. ³⁰Per gojcaman bën badëë xtiidx Dios loj ree bejn, abi' gogbeeman been Dios promejs guial loj xdiaaman grii Cristo bën nabee. ³¹Rulüü ma cuguiaaman gra ni gac, rëbaman guial yaban Cristo loj ree bengüt, ad zaya'ntaman lën baa ad zaxin tëët xcuerpaman. ³²Yan ma basban Dios Jesús, dugran nayajc testiw guial walican babanman. ³³Zia tëëman xanyabaa zisobaman xladbee Dios, persi badëë xSprijt Dios lojman zi'c ma rëbaman, yan ma guxhaal Jesús Sprijt guin loj guidxliuj, por laaman cayajc ni cuguiaadi caguiejn tëëdi.

³⁴Ad Davitan zia xanyabaa, din laagajcaman rëb:

Rëb dux Dad ree Dios loj bën rniabee naj:

“Gurej da ladbeen,

³⁵xt gabecan xin rdxe'ch ree lüj guial'.”

³⁶'Gradi bën Israel gol gogbee guial Jesús bën bacaadi loj crüjz, Dios bacaabee laaman din gacaman Dad, bën nabee dunuj ree.

Bachajg zien ree bejn bën rililadx ree Jesús

³⁷Chi biguiejn ree bën riga' yagaj ni rëb Bëd, dád guyu naya luxdoo reeman. Abi' gunabdiidx reeman lojman në loj los demazri ree apóstoles guin, rëb reeman: —Dad, gol guna, ¿xhie rayal yaguieenan?

³⁸Dxel rëb Bëd loj reeman:

—Gol bayagbee xtolidi, gol badxi' tëë lojdi loj Dios, gol gurobnijs por xguialrniabee Jesucrist din gac xtolidi perdon, zian chu' xSprijtaman luxdoodi. ³⁹Din promejs guin naj par lëjt në par ree xi'ndi në par gra ree bën riga' zijt, par gra ree bën cwe Dios par laaman.

⁴⁰Con ree diidx guie në mazri ree diidx ren guneenë Bëd laa reeman, rëbaman:

—iGol bariica loj ree bën rüjn ni mal!

⁴¹Zian gojc, graczi bën bazoob diidx ni rëbaman gurobnijs. Dxej zii gajc bachajg cost choon mil bejn bën rililadx ree Jesús.

⁴²Graczi reeman binal ni balüü ree xi apóstoles Jesús laa reeman, gubajnnë lasa' reeman zagdxé, gurejdx gunab reeman Dios abi' rado'p reeman persi raw reeman guidxtil tijbzi zi'c gunabee Jesucrist güün reeman.

**Ze gubajn ree bén
bililadx Jesús yaloj**

⁴³Graczi ree bejn radxa da't loj milagr në los demazri ree ni been ree apóstoles guin. ⁴⁴Graczi ree bén bililadx Jesucrist gubajnnë lasa' zagdxe, rgui's tëë ni rajp reeman loj lasa' reeman. ⁴⁵Ruto' xguidxliuj reeman në gra ni rajp reeman, persi rgui's reeman milia guin loj lasa' reeman zi'tctzi naj ni riaadx tijb gaj reeman. ⁴⁶Guixie guixie rado'p reeman lën yadooro' Jerusalén, dxel raguij reeman lidx xcompniar reeman rtaw reeman, dád nix yu' luxdoo reeman rën tëë lasa' reeman, ⁴⁷ruza't reeman Dios zagdxe, guíaad gra bejn guyën laa reeman. Guixie guixie ragnë Dios din gaxhiey mazri bén rililadx Jesucrist, persi gojc xtol reeman perdon.

Bayajc tijb bén ad rajct rza

3 Tijb dxex zë ree Béd con Waj lën yadooro' Jerusalén raca choon wadxe, hor zii naj hor ni rbejdx rniab reeman Dios. ²Ro' xport yadoo guin zojb tijb bén ad rajct rza diizd gojlaman. Zianczi rbe'c reeman laaman ro' port guin, ni la Port Za'cdxoon, din guiniabaman carda loj ree bén ru lën yadoo guin. ³Chi baguiaaman Béd con Waj ma chu' reeman lën yadoo guin, gunabaman carda loj reeman. ⁴Baguiaa reeman lojman, dxel rëb Béd lojman:

—Baguiaa du lojn.

⁵Chi biguiejnman rëb Béd zian, dxel baguiaaman loj reeman, naladxaman milia nudëed reeman lojman. ⁶Per rëb Béd:

—Ad ra'ptan plajt ni'qui or par gunen lojl, per ni zajc gūnan por liuj gūnanan: Por xguialrniabee Jesucrist bén Nazaret, guzuli, guza.

⁷Dxel gunaazaman yaaman ladbee, bazuliman laaman. Loj hor zii gajc guyu ree guia'man gojl, ⁸abi' gutiajsaman, guzuliman guzuloj cazaman. Dxel guyunëman laa reeman lën yadoo guin, cazaman, catiajsaman cuza't tëëman Dios zagdxe. ⁹Graczi ree bén cuguiaa laaman cazaman cuza't tëëman Dios zagdxe, ¹⁰dád badxa loj reeman bidxeb tëë reeman guial gojc zian guial nünbee reeman bén guin, ragbee tëë reeman laaman rbej ro' xport yadoo guin ni la Port Za'cdxoon, rniabaman carda.

**Gunee Béd loj ree bejn lod
la xcurdur Salomón**

¹¹Ad riro'nladxt bén bayajc guin Béd con Waj. Dád badxa loj ree bejn, abi' baxüün reeman wej reeman lod la xcurdur Salomón lod za' ree Béd con Waj. ¹²Chi baguiaa Béd zian, rëbaman loj reeman:

—Bén Israel, ¿chexc zeel radxa lojdi ni goc? Ad naladxidi por dunujn rza bén guie guial naca'n guialrniabee o guial nayajcan naya delant loj Dios ya. ¹³XDios dux béngulal ree Abraham, Isaac në Jacob, laaman badëë guialrniabee loj Jesús, bén bayüdi loj guxtis. Abi' chi guyën Pilato nuslaaman laaman, ad cwëjbtidi. ¹⁴Luar niniabidi nuslaa Pilato bén naya nali, bén rüjn zi'c rayal, gunabidi baslaaman tijb xin bagüjt bejn. ¹⁵Zian bagüjtidi bén runee guialnaban. Per basban Dios laaman stijb, abi' dunujn

nayajc testiw guial babanman.

¹⁶Bén guie, bén ruguiaadi nünbee tëëdi, guyu gojl guia'man por xguialrniabee Jesucrist, bayajcaman guial baliduladxan, zi'c ruguiaa graczi.

¹⁷'Ganin lëjt compniar, ragbeen guial lëjt con ree bén rniabee lëjt ni'quid gogbeetidi xhienin beendi chi bagüjtidi Jesús. ¹⁸Per zian been Dios persi gojc cumplid ni rëbaman loj ree bén badëë xtiidxaman loj ree bejn diizd gocli guial sagdiaj Cristo. ¹⁹Zeel gol bayagbee xtolidi gol badxi' tëë lojdi loj Dios din güünman xtolidi perdon. Dxel yayaalyuj luxdoodi, ²⁰guixhiaal tëëman Jesús stijb, bén naj Cristo diizd gocli par lëjt, ²¹majsi yan rayalri suman xanyabaa, xt ma bazuxnejz Dios gra, zi'c rëbaman loj ree bén badëë xtiidxaman loj ree bejn diizd gocli, bén gubajn ree naya delant lojman. ²²Abi' rëb Moisejs loj ree dux béngulal ree: “Loj xdiaadi cwëë Dios tijb bén gudëë xtiidxaman loj ree bejn zi'c naj, gol bazoob xtiidxaman graczi ni naman lojdi, ²³din graczi ree bén ad zuzoobt xtiidxaman nit reeman, ad zajc tëëtri reeman cwent zi'c xbejn Dios.”

²⁴'Gra ree bén badëëd xtiidx Dios loj ree bejn, diizd Samuel con los demazri ree bén badëë xtiidx Dios diizd gulal, mal bagojn reeman ni cayajc ree lën ree dxej guie. ²⁵Lëjt naj xdiaa reeman, lojdi gac cumplid ni cwëb Dios loj ree dux béngulal ree chi rëbaman loj Abraham: “Por xdiaal güñle'n gra ree bénguidxliuj.” ²⁶Abi' chi basban Dios xi'nman Jesucrist, yalaj lojdi guxhaalaman

laaman din güñle'man lëjt din yabëëcaman gradi loj ni mal rüjndi.

Bazuj reeman Bëd con Waj loj ree guxtis

4 Sta canee ree Bëd con Waj loj ree bejn, chi bidxin ree xbixhioz ree bén Israel në suldad rniabee suldad rniaj ree ro' yadooro' Jerusalén, nëtëë ree bénsaducew. ²Dád ralen reeman guial culüü ree Bëd con Waj bejn ree, rëb reeman guial yaban ree bejn loj ree bengüt, din laan ma baguiaa reeman chi baban Jesucrist. ³Zeel gunaaz reeman laa reeman, per guial ma gudxe, zeel badxe' reeman laa reeman ladxguuib la'tgaj rareguiaal. ⁴Per dád zien ree bén bacaagdiajg ni rëb ree Bëd con Waj bililadx xtiidx Dios, gojc reeman cost gaay mil xinguaaw xcwentqui ree béngunaa.

⁵Chi bareguiaal, guxtis Jerusalén në ree bengol në ree mextr rulüü ley, bado'p reeman loj ciuda guin.

⁶Në Anás bidxin yagaj, bén naj bixhioz mazri zobjloj rniabee graczi ree bixhioz, bidxin tëë bixhioz la Caifás në Waj në Lejandr, nëtëë gra ree bén naj lasa' ree bixhioz rniabee guin. ⁷Gunabee reeman bica' reeman Bëd con Waj, abi' bazuj reeman laa reeman galay lod riga' reeman, dxel gunabdiidx reeman loj reeman, rëb reeman: —¿Chu banee diidxbee o chu por rüjndi ni guin?

⁸Per guial yu' xSprijt Dios luxdoo Bëd dád gognëman laaman, zeel rëbaman:

—Gol bacaagdiajg ni ganin lëjt bengol në lëjt guxtis, ⁹rniabdiidxidi

dunuñ xhienaag baguieenan béngogxuu guin yudar, xhie tëé naag gojc zeel bayajcaman. ¹⁰Yanan lojdi din gagbeedi gagbee tëé gra bèn Israel xhienaag bayajc bèn za' lojdi. Bayajcaman por xguialrniabee Jesucrist bèn Nazaret, bèn bacaadi loj crüjz abi' basban Dios laaman stijb. ¹¹Beennëdi laaman zi'c rüjn ree bèn rüjn yu chi rbëëgo'n reeman tijb guiaj, dxel qui ragbeeri reeman guial guiaj guin naj ni mazri lasajc par gacné yu guin. ¹²Achut ben ren rüjn dux tol ree perdon, tijbzi Jesús, din achut mazri guxhaal Dios loj guidxliuj din güünman dunuj ree perdon.

¹³Chi baguiaa ree guxtis guin ad rdxebt ree Bëd con Waj guial rniee reeman, abi' gogbee reeman ad bèn basiidt ree mazran achu tëët naj reeman, badxa loj reeman bayünbee tëé reeman laa reeman guial bèn binal ree Jesúsán. ¹⁴Abi' yagaj gajc za' bèn bayajc guin, zeel ad bile'tri xhie niëjb reeman contr laa reeman. ¹⁵Dxel gunabee ree guxtis guin barii ree Bëd con Waj din yaya'n laaz reeman din gü reeman diidx. ¹⁶Rëb reeman:

—¿Xhienaag yaguieennë' ree xin guin ree? Graczi ree bèn Jerusalén ma ragbee milagr been reex. Abi' ad zajc yarexuu ree. ¹⁷Per chitëé guire'ch xtiidx Jesús, yachejb reex din diidx yan achutziri loj guza't reex laax.

¹⁸Dxel gurejdx reeman laa reeman gunabee reeman chitëé churi loj guza't reeman Jesús, ad guluü tëëri reeman xtiidxaman. ¹⁹Per badxi' Bëd con Waj laan, rëb reeman:

—Lëjt gajc gol been xgab: ¿Zagdxé naj yazooban xtiidxi luar yazooban xtiidx Dios ya? ²⁰Per ad zajc yacwëéz yaguie'chan gra ni baguiaa baguiejn tëën.

²¹Dxel bachejb ree guxtis guin laa reeman stijb, dxelri baslaa reeman laa reeman zia reeman guial ad badxeljtl xhienaag nudëéd reeman laa reeman casti, din graczi ree bejn ruza't Dios zagdxé por ni goc. ²²Nadëd tiuu ijz yu' bèn bayajc guin.

Rbejdx ree bèn riladx Jesús Dios

²³Chi baslaa ree guxtis guin Bëd con Waj, baguiaj reeman lod riga' xcompniar reeman bèn riladx ree Jesucrist, abi' be reeman diidx ni rëb ree bixhioz rniabee ree bixhioz në ree bengol rniabee. ²⁴Chi gulox bacaagdiajg reeman diidx ni be reeman, graczi reeman guzuloj cajejdx canab Dios, rëb reeman:

—Dad lüj rniabee gra, lüj naj bèn been xanyabaa në guidxliuj nëtëé nijsdoo con gra ni yu' loj reen.

²⁵Por xSprijtl tëël gunee rey Davi diidx guie ree, chi rëbaman:

¿Chexc zeel ridxe'chnë ree bénguidxliuj Dios?

¿Chexc zeel rüjn reeman xgab ni ad rüjnt wen?

²⁶Bado'p ree rey në gra ree guxtis din su reeman contr dux Dad ree Dios në contr Cristo.

²⁷'Abi' zian ma gojc, Herodes con Poncio Pilato con ree bèn Israel nëtëé ree bèn ad najt bèn Israel, badxajg lasa' reeman luguiedx guie persi guzuj reeman contr xi'n'l Jesús, bèn naya nali, bèn bacaabeel. ²⁸Zian gojc, been reeman zi'c

ma beenl xgab diisd gocli. ²⁹Abi' yan Dad, baguiaa yan ruchejb reeman dunujn. Gognë dunujn nayajcan xbejn din gac yatie'chan xtiidxil sin guialrdxeb, ³⁰në con xguialrniabeel yasiajcan bënragxuu ree, yaguieen tëën milagr ree por xguialrniabee xi'n! Jesús, bën naya nali.

³¹Chi gulox gurejdx gunab reeman Dios, guzuloj canij luar lod riga' reeman, dxel guyu xSprijt Dios luxdoo gra reeman, abi' guzuloj catie'ch reeman xtiidx Dios sin guialrdxeb.

Ragnë lasa' ree bën rliladx Jesús

³²Graczi ree bën rliladx Jesucrist bidxajg gubajn reeman, rüjn reeman tijbzi xgab, ni'qui tijb reeman ad rëbt guial xieenzi reeman naj ni rajp reeman, din najn par gra reeman. ³³Gognë Dios apóstoles guin ree persi basnuu be reeman diidxli guial baban Dad Jesús loj ree bengüt. Dád beenle' Dios laa reeman. ³⁴Ni'czi tijb reeman ad biaadxt xhienin, din graczi ree bën rajp guidxliuj o bën rajp yu ya ruto' reeman laan, abi' milia guin ³⁵rayü reeman loj ree apóstoles guin, persi laa reeman rgui's laan loj gra reeman zi'ctzi naj ni riaadx tijb gaj reeman. ³⁶Loj reeman no'ch tijb bën brii laj Xiëb, najman xdiaa bën brii laj Leví, zëëdaman yuj la Chipre ni riga' loj nijsdoo. Gunee ree apóstoles guin laaman Bernabé, rën guieëban Bén ragu' luxdoo ree bejn zagdxe. ³⁷Gojpaman tijb guidxliuj, abi' bato'man laan persi badëëman milia guin loj ree apóstoles guin din qui's reeman laan.

Dol ni been ree Ananías con Safira

5 Per guyu stijb bën brii laj Ananías, xbéngunaaman brii laj Safira. Bato' tijb xguidxliuj reeman, ²per baya'nnë xbéngunaaman diidx persi baya'nnëman ta'n milia guin. Sta'n nan badëëman loj ree apóstoles guin, rëbaman laan naj gran. ³Abi' rëb Bëd lojman:

—Ananías, ¿chexc zeel cwëjbil gunabee xindxab lüj? ¿Chexc zeel guyënl nusquieel loj xSprijt Dios, din naya'nnë ta'n milia ni bato' xguidxliuj? ⁴¿Wen nid xguidxliuj gojcan ya? Abi' chi bato'lan, ¿nid xmilialan ya? ¿Chexc zeel balablaxdxi beenl zian? Loj Diosan nuyënl nusquieel, ad lojt bejnan.

⁵Chi biguiejn Ananías ni rëbaman, biajbaman abi' güjtaman. Graczi ree bën gogbee ni guzacaman dád bidxeb reeman. ⁶Dxel bibig bëlzi ree xinguiag, batüüb reex laaman lajd persi biquie'ch reex laaman.

⁷Chi gudëd cost choon hor, dxel bidxin xbéngunaa Ananías, ad ragbeetaman ni goc. ⁸Dxel gunabdiidx Bëd lojman rëbaman:

—Guna, ¿bato' xguidxliujdi zi'c na lacheleli ya?

Abi' rëbaman:

—An, zianqui bato'n nan.

⁹Dxel rëb Bëd lojman:

—¿Chexc zeel baya'ndi diidx persi nuyëndi nusquieedi xSprijt Dios? Laa ree xin biquie'ch lacheleli ziaad ni, yan nëgajc lüj chiquie'ch reex.

¹⁰Loj hor zii gajc biajb Safira lod za' Bëd, abi' güjtaman. Chi bayu ree xin guin baguiaa reex ma güjtaman, dxel bales reex

laaman biquie'ch reex laaman cwë' lacheelaman. ¹¹Graczi ree bën rililadx Jesucrist në gra ree bën gogbee ni goc, dád bidxeb reeman.

Zien ree milagr been ree apóstoles

¹²Zien ree milagr narooob been ree apóstoles guin loj ree bejn. Graczi ree bën rililadx Jesucrist radxajg lasa' ro' curdur lod rníee reeman xcurdur Salomón. ¹³Zagdxeruzat' ree bën luguiedx guin laa reeman, per ad rayaxt reeman guchajg reeman laa reeman. ¹⁴Abi' guixie guixie cayajcxhiey ree bën rililadx Dad Jesús, zi'c xinguaaw zi'c béngunaa. ¹⁵Xt rbëë reeman béraxguu ree lunejz, rguijxh reeman laa reeman loj ree loon në loj ree da, din chi téd Béd, majsi xbalazaman téd guijc reeman. ¹⁶Në ree bën zobj guiedx riga' ree gajxh Jerusalén, zien reeman bidxin Jerusalén, bidxinnë reeman béraxguu ree në ree bën yu' xindxab luxdoo, abi' graczi reeman bayajc.

Gunaaz ree guxtis Béd con Waj

¹⁷Bixhioz mazri zobjloj rniabee graczi ree bixhioz në ree bénsaducew za'në laaman, guyu guialnadédloj luxdoo reeman, ¹⁸abi' gunabee reeman biniaaz ree apóstoles guin persi badxe' reeman laa reeman ladxguiib. ¹⁹Per guxhin zii tijb xi anjl Dios guxhal ro' ree xport ladxguiib guin, abi' babëëman laa reeman, rëbaman: ²⁰—Gol chej lën yadooro', gol biguiedx loj ree bejn xhie naag gap reeman guialnaban tiblyaa con Dios.

²¹Chi biguiejn reeman ni rëb anjl guin, bareguiaal rsildoo wej reeman lën yadoo guin, guzuloj culüü reeman bejn ree xtiidx Dios.

Guiáad bixhioz zobjloj guin con ree bën za'në laaman, bato'p reeman guxtis con gra ree bengol Israel. Abi' gunabee reeman suldad ree din chica' reex apóstoles guin ree lën ladxguiib guin. ²²Per chi bidxin reex ro' ladxguiib guin, achutri ree apóstoles guin ree yu'. Dxel bicojn reex guxtis guin ree, ²³rëb reex:

—Chi badxinan, baguiaan nayaaw ro' ladxguiib guin zagdxer, laa ree suldad rajp ro' ladxguiib guin za', per chi baxhalan, achutzi yu' lënan.

²⁴Dxel bixhioz zobjloj guin con suldad rniabee ree suldad rniaj ro' yadoo guin, con ree bixhioz rniabee ree bixhioz, chi biguiejn reeman zian, guzuloj rëb loj lasa' reeman, ÷ban xt guin chigdiglagaa ree ni guie?

²⁵Loj hor zii gajc bidxin tijb xin rëb loj reeman:

—Laa ree bën badxe'di ladxguiib yu' lën yadoo culüü reeman bejn ree.

²⁶Dxel wej suldad rniabee guin con ree xsuldadix bica' reex apóstoles guin ree, per ad beennaat reex laa reeman guial rdxeb reex gucaaguaiaj ree bejn laa reex. ²⁷Chi badxinnë reex laa reeman, bayü reex laa reeman loj guxtis. Dxel rëb bixhioz zobjloj guin loj reeman:

²⁸—¿Nid ranan ya guial ad zajctri gulüüdi bejn ree xtiidx Jesús? Abi' yan graczi loj ree bën Jerusalén ma gutie'chidi xtiidxix, nëtëë yan rëndi

gudxiibidi du guijcan guial dunujn bagüjt laax.

²⁹Abi' badxi' Bëdan në gra ree apóstoles guin, rëb reeman:

—Rayal yazooban xtiidx Dios luar yazooban xtiidx ree bénguidxliuj.

³⁰XDios dux béngulal ree basban Jesús, bën bacaadi loj criujz. ³¹Abi' nüjn Dios laaman bën zojbloj, nabe'caman laaman xladbeeman, laaman naj bën rniabee rabëë tëëman bejn ree loj xtol reeman, abi' zian guxhalaman nejz par ree bën Israel din cwëëladx xtol reeman yadxi' tëë loj reeman loj Dios din güünman laa reeman perdon. ³²Dunujn në xSprijt Dios bën rudëëman loj ree bën ruzoob xtiidxaman, rayagbeen guial gra ree ni guin naj diidxli.

³³Chi biguiejn ree guxtis guin ni rëb reeman, dád balen reeman abi' guyën reeman nugüjt reeman laa reeman. ³⁴Per loj ree guxtis guin no'ch tijb bënfarisew laman Gamaliel, najman mextr ruluü ley abi' graczi ree bejn rajp laaman respejt. Guzuliman abi' gunabeeman barii ree apóstoles guin xchu tibrajt. ³⁵Dxel rëbaman loj ree guxtis guin:

—Bën Israel, gol been xgab xhienin güünnëdi bën guin ree.

³⁶Gol basaaladx, guyu tijb xin brii laj Teudas, rëbix yu' chu najx abi' cost tajp gayuu ree bejn binal laax. Per chi bagüjt ree bejn laax, bire'ch gra ree bën binal laax, yagaj gulox gra ni beenx. ³⁷Abi' tëë lën ree dxej gunabee gobiarn biab ree bejn, guyu tijb xin brii laj Judas, gojquix xin Galilea, ziangajc dád zien ree bejn binal laax. Per

chi bagüjt ree bejn laax, gra ree bën binal laax bire'ch. ³⁸Zeel rnin lojdi, ad bal chu'ridi con ree bën guin, gol baslaa reeman. Din bal bénguidxliuj rniabee ni rüjn reeman, zadxin dxej loxan. ³⁹Per bal por Dios cayüjn reeman ni guin ree, ad zajct gutëëdi loj ni cayüjn reeman. Gol gojp cudad ad niad chi gagbeedi contr Diosan za'di.

⁴⁰Beencwent ree guxtis guin xtiidx Gamaliel, dxel gurejdx reeman apóstoles guin ree, gudijn reeman laa reeman abi' rëb reeman loj reeman ad gutie'chri reeman xtiidx Jesús, dxel baslaa reeman laa reeman zia reeman. ⁴¹Per laa reeman dád nix yu' luxdoo reeman barii reeman lod za' ree guxtis guin guial baslaa Dios guzagdiaj reeman por Jesús. ⁴²Abi' ad rucwëëzt ruluü reeman rniee tëë reeman xtiidx Jesús, gra dxejczi ruluü reeman lën yadooro' Jerusalén nëtëë lidx lidx ree bejn.

Bibee gajdx ree bën güün yudar

6 Lën ree dxej zii chi canuu cayajcxhiey ree bën rliladx Jesús, guzuloj cabe'c ree bën rniee diidx grieg xguialquia ree bën rniee diidx hebreo, rëb reeman guial gra dxejczi chi rië's ni raw ree béngunaa bizëjb, ta'ndoon rtia' ree bën rniee diidx grieg guial loj ree bën rniee diidx hebreo.

²Dxel guidxibtio'p ree apóstoles guin bato'p reeman graczi ree bën rliladx Jesucrist, abi' rëb reeman:

—Ad zagdxt naj guial yacwëëz yalüün xtiidx Dios par yadi'san ni gaw ree bejn. ³Zeel yanan lëjt compniar raliduladx ree Jesucrist,

gol gudiil entr lojdi gajdx ree b́en ragbeedi naban zi'c rayal, b́en yu' xSprijt Dios luxdoo, b́en yu' t́eē ree xquiarguiejn, din yazuj reeman gúūn reeman dxiin guin. ⁴Guiáad dunujn yasnuu yarejdx yanaaban Dios, yaliūū t́eēn xtiidxaman.

⁵Graczi reeman cwěj́b ni rēb reeman, abi' gulej reeman b́en la Esteban, laaman rililadx Jesucrist guidib luxdooan, rniabee t́eē xSprijt Dios luxdooan guidiblagaa. Gulej t́eē reeman Felip, Prócoro, Nicanor, Timón, Parmenas nē Nicolás b́en źeēd Antioquía, nēman bililadx ni rililadx ree b́en Israel chi gadaman chililadx Jesucrist. ⁶Dxel binē reeman laa reeman loj ree apóstoles guin, persi gurejdx gunab reeman Dios por laa reeman badxiib t́eē yaa reeman guijs reeman.

⁷Canuu care'ch xtiidx Dios, abi' Jerusalén cayajcxhiey ree b́en rililadx Jesucrist, nē zien ree bixhioz Israel bililadx laaman.

Biniaaz Esteban

⁸Dád gognē Dios Esteban badēē t́eēman guialrniabee persi rújnman zien loj milagr delant loj ree bejn. ⁹Abi' b́elzi ree b́en yadoo ni la Libertados nē ree b́en Cirene con ree b́en Alejandría con ree b́en niz Cilicia nēt́eē ree b́en źeēd niz Asia, guzuloj cadildiidxnē reeman Esteban, ¹⁰per ad gojct nadxi' reeman xtiidxaman guial cayagnē xSprijt Dios laaman. ¹¹Dxel gudijx reeman b́elzi ree bejn din guiēb reeman, bacaagdiajg reeman rniee Esteban contr Dios nē contr Moisejs. ¹²Zian been reeman persi

bidxe'ch ree b́en luguiedx guin, nē ree bengol nē ree mextr ruliūū ley. Dxel gunaaz reeman Esteban, binē reeman laaman loj guxtis. ¹³Gudiil t́eē reeman b́en basquiee ree persi rēb reeman loj ree guxtis guin:

—Ad rucwēēzt rnieeguijdx xin guie xley Moisejs nē xyadoo Dios.

¹⁴Dunujn ma bacaagdiajg rēbix guial Jesús xin Nazaret guse'nx dux yadooro' ree, guchaa t́eēx costumbr basa'n Moisejs du loj ree.

¹⁵Abi' guxtis guin ree nē gra ree b́en riga' yagaj, chi baguiaa reeman loj Esteban, baguiaa reeman najn zi'c tijb loj anjl.

Ni rēb Esteban loj ree guxtis

7 Dxel bixhioz mazri zojbloj rniabee graczi ree bixhioz, gunabdiidxaman loj Esteban, rēbaman:

—¿Walín ya rēbil zian?

²Badxi' Esteban laan, rēbaman:

—Dad guxtis, nē lējt compniar, gol bacaagdiajg ni ganin. Dios b́en yu' xanyabaa balüūloj loj dux b́engulal ree Abraham, chi gureman niz Mesopotamia chi gadaman chisob guiedx Harán. ³Abi' rēb Dios lojman: “Basa'n ladxil nē gra ree lasa'l, wej loj yu' ni gulün lüj.” ⁴Dxel brii Abraham ladx ree b́en Caldea bisobaman Harán. Chi güt xDadaman, dxel bidnē Dios Abraham loj guidxliuj guie lod nadxu' ree yan. ⁵Per chi bi't Abraham guie, achetctzi guidxliuj badēēd Dios lojman, ni'czi tibda'nán ad badētaman. Per beenman promeys loj Abraham guial gudēēman guidxliuj guie lojman, dxel chi guiētaman tia' ree

xdiaaman laan, majsi chi rëb Dios zian, ad wayut xi'n Abraham. ⁶Rëb tëë Dios lojman guial xdiaaman chisob zi'c ree benzit nacion ren, lod gugüjn da't reeman laa reeman dxiin gusagzi tëë reeman laa reeman loj tajp gayuu ijz. ⁷Per rëb tëë Dios lojman: “Gudëdan gra ree bën gusagzi laa reeman casti, gac xchej yarii reeman yagaj abi' guie güün reeman sirv lon zi'c rayal.” ⁸Chi guneenë Dios Abraham, baya'n reeman diidx guial rayal chu' gra ree xinguaaw sen. Zeel chi gol Isaac xi'n Abraham, gojc xhujn dxej, dxel badxe'man laax sen. Ziangajc beennë Isaac xi'nman Jacob, ziangajc beennë Jacob guidixtio'p ree xi'nman, bën goc ree dux béngulal ree.

⁹Bën goc ree dux béngulal ree gudëdloj reeman Xiëb bën naj bijch reeman, abi' bato' reeman laaman loj ree bën zë Egipto, per ad guro'nladxt Dios laaman, ¹⁰gognëman laaman loj ni guzagdiajman badëë tëëman xquiarguejnman, gognë tëëman laaman persi biajby rey guin laaman zagdxe, abi' beenman laaman gobernador Egipto, bazuj tëëman laaman din nabeeman gra ni rajp rey guin.

¹¹Chi guyu gubijn guidibczi Egipto në niz Canaán, dxel guzagdiaj da't ree dux béngulal ree guial achet ni gaw reeman. ¹²Per chi gogbee Jacob guial yu' trigo Egipto, guxhaal ree xi'nman bën naj dux béngulal ree, dxel wej reeman Egipto. ¹³Chi barojp volt wej reeman, rëb Xiëb guial laaman naj bijch reeman, dxel gogbee rey

Egipto xhie diaa zëëdaman. ¹⁴Dxel rëb Xiëb loj ree bijchaman din chigxii reeman xDadaman në gra ree lasa'man din chisob reeman Egipto. Gojc reeman gayojnchiin bejn. ¹⁵Zianan zeel bisob Jacob Egipto, ni gütaman ni gajc güt ree xi'nman, dux béngulal ree. ¹⁶Gojc xchej dxel bignë reeman xdxijt ree dux béngulal ree guiedx Siquem, persi biguie'ch reen lën baa guzii Abraham loj ree xi'n Hamor.

¹⁷Chi ma zidyob tiamp gac ni rëb Dios loj Abraham, zien ree bën Israel ma gojcxhiey Egipto. ¹⁸Abi' guzuloy gunabee rey ren Egipto, bën ad beenbeet Xiëb. ¹⁹Rey zii basagzi bën du ladx ree, gunabeeman chigsëëb reeman xindo niguaaw golnejz ree din guiët reex. ²⁰Abi' tiamp zii gojl Moisejs, tijb xindo bayuladx Dios. Gunaj ree xdadix laax choon bëëw. ²¹Chi bidxin dxej bigsa'n reeman laax lod bigsëëb reeman laax, xi'n gajc rey guin baca' laax, persi baslaaman laax zi'c xi'nman. ²²Basiid Moisejs gra ni rajc ree bën Egipto, abi' lasajc ni guneex ni been tëëx.

²³Chi guyu Moisejs tiuu ijz, bidyajb guijcaman bignaj lasa' bën Israelaman. ²⁴Abi' chi baguaaaman caguin tijb bën Egipto tijb bën Israel, balajman laaman, bagüjtaman bën Egipto guin. ²⁵Naladx Moisejs niagbee ree bën Israel guial por laaman yabëë Dios laa reeman loj ree bën Egipto, per ad gogbeet reeman. ²⁶Chi bareguiaal, bidxaagloy Moisejs tio'p ree bën Israel caga'p reeman, abi' guyënman nabe'cdxeman laa reeman, rëbaman: “¿Chexc zeel

rdilidi? Awa b́en Israel naj gropidi.”
²⁷Abi' b́en caguin b́en zatijb guin bacadxaaman Moisejs, ŕebaman: “¿Chu bazuj ĺij din nabeel dunujn, din na t́eél ni rayal yaguieenan?”
²⁸¿Wen ŕenl ya gugiýtil naj zi'c bagúýtil b́en Egipto ni nieey?”
²⁹Chi biguiejn Moisejs ni ŕeb b́en guin, baxiúunman wejman niz Madián. Ni gureman zi'c benzit, abi' cwa'man b́engunaa, zianz guyu tio'p ree xi'ngaanman.

³⁰Chi gudéd tiuu ijz, dxel balüüloj tijb xi anjl Dios loj Moisejs loj xbajl tijb yag ni cayazbajl lod naj yujbidx, gajxh guia' la Sinaí. ³¹Dád badxa loj Moisejs guial baguiaaman bajl guin. Abi' chi bibigaman din guguaaman laan mazri zagdex, biguiejnman cha' Dios ŕebaman lojman: ³²“Naj naj xDios xb́engulal reel, Abraham, Isaac ńe Jacob.”
 Dxel guzuloj canij Moisejs guial bidxebaman, ad bayaxtaman nuguaaman bajl guin. ³³Dxel ŕeb Dios lojman: “Gulëë xgurëchil, din nagle' lod za'l. ³⁴Naj cugua xhienaag cazagdiaj ree da bejnan Egipto, rigujenjan roon reeman zeel biguia'tan din yabën laa reeman. Yan, guda din gaxhalan ĺij Egipto.”

³⁵Abi' majsi ad guyënt ree b́en Israel nuzoob reeman xtiidx Moisejs yaloj, ŕeb reeman lojman: “¿Chu bazuj ĺij din nabeel dunujn na t́eél ni yaguieenan?” Per por anjl balüüloj loj bajl guin, badëéd Dios guialrniabee lojman, abi' guxhaalaman laaman din güünman laa reeman yudar yarii reeman Egipto, zi'c ŕeb anjl balüüloj lojman loj yag caye'c. ³⁶Moisejs guin naj b́en babëë dux b́engulal ree Egipto,

been t́eëman milagr ree niz Egipto, ńe niz ro' nijsdoo ni la Nijs Xnia, ńe loj yujbidx lod guzu reeman tiuu ijz. ³⁷Laagajc t́eëman ŕeb loj ree b́en Israel: “Loj gajquidi cwe Dios tijb b́en gudëéd xtiidxaman loj ree bejn zi'c guleman naj. Gol bazoob xtiidxaman.”
³⁸Dxel chi guzunë Moisejs dux b́engulal ree niz loj yujbidx, laaman naj b́en guneenë xi anjl Dios ruguia' la Sinaí, persi badëëman xtiidx Dios loj reeman, abi' diidx guin ree naj ni basa'n reeman duloj ree yan.

³⁹Per dux b́engulal ree ad bazoobt reeman xtiidx Moisejs. Ad guyënt reeman niniabeeman laa reeman, tib guyugujczi reeman nayejc reeman Egipto. ⁴⁰Dxel ŕeb reeman loj Aarón: “Been dios ree, din ned reeman du loj ree, din ad rayagbeet ree gonczi Moisejs b́en babëë dunuj ree Egipto.”
⁴¹Dxel been reeman tijb go'ndobëz din gaquib xdios reeman. Bagúýt reeman be ree persi badëéd reeman laa reeb zi'c gon loj ni been reeman, been reeman lanij guial babaanë reeman ni been gajc reeman. ⁴²Dxel guro'nladx Dios laa reeman, baslaaman guyën reeman gubijdx con bëëw con bajl yu' ree xanyabaa. Din zian ca loj xtiidx Dios ni bacaa ree b́en badëéd xtiidxaman loj ree bejn, lod ŕeb:

B́en Israel, loj tiuu ijz ni guzudi loj yujbidx,
 ¿wen bagúýtidi be ree ya din guneedi laa reeb lon zi'c gon?

⁴³Per mazri guyëndi xdxandi Moloc b́iaa t́eédi lidxan, ńe xbajl dxan Refán, dxan been gajquidi din guzuxibidi loj reen.

Zeel gaxhalan lëjt mazri zijt
guial Babilonia.

⁴⁴'Abi' chi guzu ree dux béngulal
ree loj yujbidx, gojp reeman tijb
yu been laa reeman sirv zi'c yadoo,
lod guyuchaaw ree guiaj ni ca xley
Dios. Been reeman yadoo guin
zi'c gunabee Dios Moisejs, chi
rëbaman lojman guial güünman
laan zi'c ma baguiaaman. ⁴⁵Chi güt
Moisejs, baya'nnë ree dux béngulal
ree yadoo guin. Chi baya'n Josué
xluar Moisejs, dxel bidnë reeman
yadoo guin chi gudil reeman guijc
guidxliuj con ree bën ren, abi'
gognë Dios laa reeman persi been
reeman gan baya'nnë reeman
guidxliuj guin ree. Zian guzunë
reeman yadoo guin xt bidxin
dxej guzuloj gunabee rey Davi.

⁴⁶Guyën Dios rey Davi, abi' laaman
guyënman nüjnman tijb yadoo par
Dios, bën naj dux Dios ree nayajc
ree bën Israel. ⁴⁷Per rey Salomón
naj bën been laan, ⁴⁸majsi Dios
bën yu' xanyabaa ad rbejtaman lën
yadoo ni rüjn ree bejn, zi'c rëb bën
badëöd xtiidx Dios loj ree bejn diizid
gocli, chi rëbaman:

^{49,50} Xanyabaa naj lod zooban par
ganabeen,
guiáad loj guidxliuj naj lod ruzu
guia'n.
¿Xhienaag gac yu güündi par
naj?
¿O xhienaag naj lod
yaziiladxan?
¿Id naj ben graczi ree ni guie
ya?, rëb Dios.

⁵¹'Per lëjt —rëb Esteban —dád
nadidi, ad rëntidi guzoobidi xtiidx
Dios, ad rën tëtëtidi chignia'di,
zianczi za'di contr xSprijt Dios,

zi'cgajc been ree xbéngulalidi.

⁵²¿Chu bën badëöd xtiidx Dios
loj ree bejn ad beennaat ree
xbéngulalidi? Xt bagüjt reeman
bën badëöd ree xtiidx Dios bën
rëb ree guial guit' tijb bën naya
nali. Abi' yan ma bi'taman,
bayüdi laaman loj ree bën
rniabee, gunabee tëedi güjtaman.
⁵³Majsi cwa'di xley Dios loj ree xi
anjlanan, per ad rüjntidi zi'c rëb
loj ley guin.

Bagüjt reeman Esteban

⁵⁴Chi biguiejn reeman ni rëb
Esteban, xt raw lay reeman tant
balen reeman laaman. ⁵⁵Per guial
yu' xSprijt Dios luxdoo Esteban,
chi gules lojman xanyabaa, dxel
baguiaaman xbiani Dios baguiaa
tëëman Jesús za'man xladbee Dios.
⁵⁶Dxel rëb Esteban:

—iGol baguiaa! Ruguian naxal
xanyabaa, ruguia tëën Bén
guxhaal Dios za'man xladbee
Dios.

⁵⁷Per chi biguiejn reeman
zian, bata'cw guidiajg reeman,
dxel gurixdiaj reeman zignaaz
reeman Esteban, ⁵⁸babëë reeman
laaman loj ciuda guin, bicüjt
reeman laaman con guiaj, guiáad
xab reeman basa'nsii reeman loj
xinguiag la Saulo persi canajxan.

⁵⁹La'tgaj cucaaguij reeman
Esteban, rëbaman:

—Dad Jesús, baca' da sprijtan.

⁶⁰Dxel bazuxibaman guridxa'man
rejs, rëbaman:

—Dad Jesús, ad güüncwentil dol
cayüjn ree bën guin yan.

Naabczi gulox rëbaman zian, laa
güt gajcaman.

**Guzunal Saulo b́en
rliladx ree Jesucrist**

8 Baya'n Saulo conform guial bagüjt reeman Esteban. Abi' dxej zii gajc guzuloj rzunal reeman b́en Jerusalén ree b́en rliladx ree Jesucrist, dxel bire'ch reeman guidib niz Judea në niz Samaria, b́en najzi ree apóstoles bay'a'n. ²Guyu b́elzi ree xinza'c, laa reex biquie'ch Esteban, abi' dád biin reex guijcaman. ³Guiáad Saulo rzunalaman b́en rliladx ree Jesucrist, ruman yu yu din cwëë naguiejnman laa reeman, zi'c xinguaaw zi'c béngunaa, persi ngu'man laa reeman ladxguib.

**Bacaagdiajg ree b́en
Samaria xtiidx Dios**

⁴Per b́en brii ree Jerusalén, lod zétzi reeman rtie'ch reeman xtiidx Dios. ⁵Zi'c been Felip, wejman guiedx Samaria, guzuloj caneeman xtiidx Jesucrist loj ree bejn. ⁶Dád zien ree bejn rdo'p, graczi reeman rucaagdiajg chaaw ni rëb Felip, ruguiaa tēë reeman milagr ree ni rüjnman. ⁷Zien ree b́en nëjt tib lajt xcuerp bayüjn Felip, në ree b́en ad rzat zagdxe, bayüjn tēëman b́en yu' ree xinxab luxdoo abi' rbixdiaj reex rarii reex. ⁸Zianan zeel babaa da't ree b́en luguiedx zii.

⁹Per luguiedx zii guyu tijb b́en brii laj Simón, diizd gocli rüjnman guialbidxaa persi rusquieeman b́en Samaria ree, rüjnman b́en lasajc. ¹⁰Graczi reeman rucaagdiajg chaaw ni rëbaman, diizd mazri ree xinguiag xt mazri ree bengol, abi' rëb reeman:

—Naroob naj xguialrniabee Dios ni rajp b́en guie.

¹¹Bidxga' reeman laaman guial ma gojc xchej cusquieeman laa reeman con guialbidxaa ni rüjnman.

¹²Per chi bililadx reeman ni rëb Felip xcwent xguialrniabee Dios në xcwent Jesucrist, zi'c ree xinguaaw zi'c ree béngunaa gurobnijs reeman.

¹³Xt në Simón bililadx gurobnijs tēëman, abi' ad riro'nladxtaman Felip radxa tēë lojman graloj ree milagr ruguiaaman rüjn Felip.

¹⁴Chi gogbee ree apóstoles riga' Jerusalén guial ma bililadx ree b́en Samaria xtiidx Dios, dxel guxhaal reeman Béd con Waj ni. ¹⁵Chi bidxin reeman, gurejdx gunab reeman Dios por ree b́en Samaria b́en ma rliladx ree xtiidx Dios din chu' xSprijt Dios luxdoo reeman, ¹⁶din ni'qui tijb reeman ad wayut Sprijt guin luxdoo, gurobnijsi reeman por Dad Jesús. ¹⁷Dxel guxhoob yaa ree Béd con Waj guijc reeman, abi' guyu xSprijt Dios luxdoo reeman.

¹⁸Chi baguiaa Simón cayu xSprijt Dios luxdoo ree b́en guin guial caxhoob yaa ree apóstoles guin guijc reeman, dxel guyënman nudëëman milia loj reeman, ¹⁹rëbaman:

—Në lon gol banee guialrniabee guin din chi gaxhob yan chutëëz guijc b́enan, në luxdoo chu' xSprijt Dios.

²⁰Dxel badxi' Béd xtiidxaman rëbaman:

—Nitol con guidib xmilial, din rüjnlg xgab guial zajc siil guialrniabee razaladx Dios.

²¹Ad rayalt ad zajc tēët güünl zi'c

raguieenan, din ni'quid zinaltil xnejz Dios. ²²Bayüjn xgab por ni mal beenl, gurejdx gunab tëë Dios, rupent güünman lüj perdon por ree xixgabmalil, ²³din ragbeen ganax guialralen yu' luxdool, abi' dol guin naj ni rniabee lüj.

²⁴Dxel badxi' Simón xtiidxaman, rëbaman:

—Gol gurejdx gunab Dios por naj, chitëë gaza'can ni'qui tijb ni ma nadi.

²⁵Chi gulox gunee ree apóstoles guin xtiidx Dios loj ree bën guin, dxel badxin reeman Jerusalén, abi' graczi ree guiedx riga' niz Samaria lod gudëd reeman gutie'ch reeman xtiidxza'c Jesucrist.

Felip con bën Etiopía

²⁶Chi ma gudëd gojc zian, gunee tijb xi anjl Dios Felip rëbaman:

—Wej niz sur nejz ni zë Jerusalén xt lod la Gaza, niz lod naj ganax yujbidx.

²⁷Dxel brii Felip zëman. Runejz guin banaazaman tijb bën Etiopía, najman bën zojbloj guial laaman rgu'chaaw xmilia Candace, bën naj reina Etiopía. Wejman Jerusalén bignajchi'man Dios, ²⁸abi' ma bayunejzaman zia ladxaman, zojb lën xcarrejt zagdxeman, roolaman loj gui'ch ni bacaa Isaías, bën badëëd xtiidx Dios loj ree bejn.

²⁹Dxel rëb xSprijt Dios loj Felip: —Bibig gajxh cwë' carrejt guin.

³⁰Chi bibigaman, biguiejnman cayool bën guin loj gui'ch bacaa Isaías. Dxel gunabdiidxaman lojman rëbaman:

—Dad, ¿rignia'l ni cayoolil ya?

³¹Badxi' bën guinan rëbaman:

—¿Xoza chignia'nan? Awa achut gusignia' naj.

Dxel rëbaman loj Felip din chë'paman loj carrejt guin, cweman cwë'man.

³²Loj xtiidx Dios lod cayool bën guin rëban:

Zi'c rinë reeman tijb xiil, binë reeman laaman lod gugüjt reeman laaman.

Abi' achet rëbaman, zi'c tijb xiil ma za' loj ree bën gugaj guidxladib.

³³Chi beennë reeman laaman zi'ctzi rën reeman, achut been guialguxtis por laaman.

Yan achut guza't xdiaaman, din ma bisüd reeman laaman loj guidxliuj.

³⁴Rëb bën guin loj Felip:

—Guna sii, ¿chu xcwent rníee bën bacaa diidx guie ree? ¿Xcwent gajcaman ya o xcwent ben renan?

³⁵Dxel guzuloj Felip cusignia'man laaman xtiidx Dios ni cayoolaman, zian beman xtiidxza'c Jesucrist lojman. ³⁶Abi' chi gudëd reeman lod yu' nijs, dxel rëb bën guin loj Felip:

—Guie yu' nijs. ¿Nid zajc garobnijsan guie ya?

³⁷Zeel rëb Felip lojman:

—Bal rliladxil guidib luxdool, zajcan.

Badxi' bën guinan rëbaman:

—Rliladxan guial Jesucrist naj Xi'n Dios.

³⁸Dxel gunabeeman guzudxe xcarrejtaman. Abi' baguiajt grop reeman, dxel guyu reeman lojnijs guin persi baroobnijs Felip laaman.

³⁹Chi barii reeman lojnijs guin,

loj hor zii gajc gunidloj Felip binë xSprijt Dios laaman, abi' ad baguiaatri bën guin laaman, per dád rabaaman zinal xnejzaman. ⁴⁰Chi gogbee Felip, ma za'man xt guiedx Azoto, dxel zëman guiedx guiedx zigtie'chaman xtiidxa'c Jesucrist xt bidxinman Cesarea.

Bililadx Saulo Dad Jesucrist

(Hch. 22:6-16; 26:12-18)

9 Guiáad Saulo ad ruwëézt rdxe'chaman bën rlliladx ree Jesucrist, rëbaman gugüjtaman laa reeman. Zeel wejman bigneenëman bixhioz mazri zojbloj rniabee graczi ree bixhioz, ²din gac tijb gui'ch din gac cheman lën ree yadoo Damasco chigdiilaman bën rlliladx ree Jesucrist, zi'c ree xinguaaw zi'c ree béngunaa, din chignëman laa reeman ladxguiib Jerusalén. ³Per chi ma cadxinman gajxh guiedx Damasco, dxeljczy brii tijb gui j xanyabaa balaan bacha' lod zëman. ⁴Abi' bireeyujman, chi naga'man luyuj guin bigueijnman cha' bën rëb:

—Saulo, Saulo, ¿chexc zeel rzunalil naj?

⁵Abi' gunabdiidxaman rëbaman:

—¿Chu lüj, Dad?

Badxi'man laan rëbaman:

—Naj naj Jesús bën rzunalil. Per ganin lüj, lüj gajc rguuil xguialnaal zi'c rüjn tijb go'n rudxeguaia' loj yag ni rulaagnë reeman laab.

⁶Rnij Saulo guial tant bidxebaman, abi' rëbaman:

—Dad, ¿xhie rënl günan?

Dxel rëb Dad Jesucrist lojman:

—Bixche, wej guiedx Damasco, ni na reeman ni ryal güünl.

⁷Abi' ree bën në Saulo dád bidxeb reeman guial bigueijn reeman cha' bejn, per achutczi baguiaa reeman.

⁸Chi bixchewan luyuj guin, baxhal lojman, ad rajctri ruguiaaman.

Dxel gunaaz reeman yaaman bignë reeman laaman Damasco.

⁹Ni guzuman choon dxej, ad rajct ruguiaaman, achetczi rawaman ache tëëtzy rë'man.

¹⁰Damasco gure tijb bën rlliladx Dad Jesucrist, brii lajman Ananías. Balüüloj Jesucrist lojman, rëbaman: —iAnanías!

Badxi'man laan rëbaman:

—Laa naj guie Dad.

¹¹Dxel rëb Jesucrist lojman:

—Bisu, wej call ni la nali. Chi guidxinl lidx Judas, gunabdiidx por tijb xin zëed Tarso, lax Saulo. Din laax cabejdx canab naj, ¹²abi' zi'c ruliüü cane'xhchaalix, baguiaax guyu tijb bën la Ananías guxhoob yaaman guiiquix persi baguiaax stijb.

¹³Chi biguien Ananías zian, dxel rëbaman:

—Dad, zien da't ree bejn ruza't xin zii, në ree ni mal rüjnnëx bën rlliladx ree lüj Jerusalén. ¹⁴Yan zëédix guie con xguialrniabee ree bixhioz rniabee ree bixhioz, din guiniaazix gra ree bën rlliladx lüj.

¹⁵Dxel rëb Jesucrist lojman:

—Wej, din naj gule laax din chiguix da diidxan loj ree bën ad najt bën Israel, në loj ree rey, con nëgajc loj ree bën Israel. ¹⁶Guiën lojx guial sagdiaj da'tix guial najx da bejnan.

¹⁷Dxel zë Ananías lënü lod za' Saulo. Chi guyuman, guxhoob yaaman guiycaman, rëbaman:

—Bijch Saulo, Dad Jesús bén balüüloj lojl runejz lod zëedil, laaman guxhaal naj din yaguaaal, chu' tée xSprijt Dios luxdool.

¹⁸Loj hor gajc zi'c rulüü yu' xhie biquied guiaalojman abi' baguiaaman stijb. Dxel guzuliman gurobnijsaman, ¹⁹gudaw tēeman persi bayuman gojl. Dxel guzujman Damasco tio'p choon dxej con ree bén rililadx Jesucrist.

Gunee Saulo xtiidx Dios Damasco

²⁰Dxel guzuloj gunee Saulo xtiidx Dios lēn ree yadoo, rēbaman guial Jesucrist naj Xi'n Dios. ²¹Graczi ree bén biguien ni rēbaman badxa loj reeman abi' rēb reeman:

—¿Nid bén guien rzunal bén rililadx ree Jesucrist Jerusalén ya? ¿Nid laagajcaman zëed guie ya, din guiniaazaman bén rililadx ree Jesucrist chignē tēeman laa reeman loj ree bixhioz rniabee ree bixhioz?

²²Per Saulo guixie guixie mazri cariiman guialrdxeb rnieeman xtiidx Dios, rulüüman guial Jesús naj Cristo, din yabēeman bejn ree loj dol. Xt ragdxa ree bén Israel zojb ree Damasco chi rucaagdiajg reeman ni rēbaman.

Baxüün Saulo guiedx Damasco

²³Ad xchejt gojc, baya'n ree bén Israel diidx din nugüjt reeman Saulo, ²⁴per laa gogbee gajcaman ni rēn reeman güün reeman. Dxej guiaal rbēz reeman laaman ro' ree port ni rarii ro' ciuda guin din nugüjt reeman laaman. ²⁵Per ree bén rililadx Jesucrist, guxhin badxe' reeman laaman lēn dxüm narooob, abi' gulet reeman laaman niz

xijch ze' nusiaaw ciuda guin, zian baxüünman Damasco.

Badxin Saulo Jerusalén

²⁶Chi badxin Saulo Jerusalén, guyēnman nuchajgaman bén rililadx ree Jesucrist, per graczi reeman bidxeb laaman guial ad rililadx reeman nēman ma rililadx Jesucrist. ²⁷Dxel binē Bernabé laaman loj ree apóstoles guin, bagojnman guial baguiaa Saulo dux Dad ree Jesucrist, guneeñē tēeman laaman chi zēman Damasco, bagojn tēeman guial Damasco gunee Saulo xtiidx Jesucrist sin guialrdxeb. ²⁸Zian baya'n Saulo Jerusalén abi' nayuman laa reeman. ²⁹Ad rdxebtaman ruza'taman Dad Jesús, abi' xt gudijldiidxnēman bén Israel rniee ree diidx grieg, per guyēn reeman nugüjt reeman laaman. ³⁰Chi gogbee ree bén rililadx Jesucrist zian, binē reeman laaman guiedx Cesarea. Yagaj baxhaal reeman laaman guiedx Tarso.

³¹Dxel babedxe luxdoo ree bén rililadx Jesucrist, bén zojb ree niz Judea nē niz Galilea nētēē niz Samaria, chigagaj beenbee reeman mazri xhienaag naj xnejz Dios, bazoob tēē reeman xtiidxaman, abi' cayagnē xSprijt Dios cayajcxhieje reeman.

Bayajc Eneas

³²Chi biza Béd bitixlojman bén rililadx ree Jesucrist, dxel wej gajcaman bitixlojman bén rililadx ree Jesucrist guiedx Lida. ³³Ni bidxaaglojman tijb xinguaaw la Eneas. Ma gojc xhujn ijz naga'x, ragxuux, ad rajct rzax. ³⁴Abi' rēb Béd lojx:

—Eneas, ma bayüjn Jesucrist lüj. Bixche, bales ni go'til loj.

Loj hor zii gajc bixchex. ³⁵Chi baguiaa gra ree bén zojb guiedx Lida në ree bén zojb niz Sarón guial ma bayajc Eneas, dxel në reeman bililadx Jesucrist.

Baban Dorcas

³⁶Loj tiamp zii guyu tijb béngunaa rililadx Jesucrist luguiedx Jope, laman Tabita, diidx grieg laman Dorcas. Laaman been ni za'c ree, been tëëman yudar bénprob ree. ³⁷Lën ree dxej zii gogxuu Dorcas abi' güjtaman. Chi gulox bagajz reeman laaman, dxel bitixh reeman laaman lënu ladya. ³⁸Abi' gajxh guiedx Jope raya'n guiedx Lida lod za' Bëd. Chi gogbee ree bén rililadx Jesucrist guial za'man ni, guxhaal reeman tio'p ree xinguaaw bisajc reex Bëd liaadx, rëb reex:

—Been wen yo' ree Jope yan gajczi.

³⁹Laa zinë gajcaman laa reex. Chi bidxinman, binë reeman laaman lënu lod naga' xcuerp Dorcas. Ni riga' zien ree béngunaa bizëjb roon reeman, abi' bibig reeman loj Bëd culüü reeman gra lajd ni been Dorcas chi sta nabanman. ⁴⁰Dxel gunabee Bëd barii gra reeman, abi' bazuxibaman gurejdx gunabaman Dios. Dxel baguiaaman bengüt guin, rëbaman:

—iTabita, bixche!

Laa guxhal gajc lojman. Chi baguiaaman Bëd, gureliman, ⁴¹dxel gunaaz Bëd yaaman persi guzuliman. Abi' gurejdxaman bén rililadx ree Jesucrist con ree bén

bizëjb guin, persi baguiaa reeman guial ma baban Dorcas. ⁴²Guidibczi guiedx Jope gogbee reeman ni goc, abi' zien da't reeman bililadx Jesucrist por zian. ⁴³Guiáad Bëd baya'nman mazri dxej luguiedx guin, lidx Simón bén rüjnchaaw guid.

Wej Bëd lidx Cornel

10 Luguiedx Cesarea gurej tijb bén brii laj Cornel. Laaman goc suldad gunabee tibcwaa ree suldad brii laj Italiano. ²Gojcaman benza'c, laaman në gra ree bén zojb lidxaman guyën reeman Dios, abi' dád beenman yudar bén Israel ree, bén naj ree bénprob, në zianczi rbejdx rniabaman Dios. ³Tijb dxej cost raca choon wadxe, guzajcaman zi'c rülüü cane'xhchaalaman. Zagdexczi baguiaaman guyu tijb xi anjl Dios lënu lod za'man, abi' rëb anjl guin lojman:

—iCornel!

⁴Baguiaaman loj anjl guin, abi' dád bidxebaman, rëbaman:

—¿Xhienin, Dad?

Abi' rëb anjl guin:

—Ma bigueijn Dios xtiidxil ma baguiaa tëëman xhienaag rüjnl yudar bénprob ree. ⁵Guxhaal ree bén che luguiedx Jope din chica' reeman Simón, bén la gajc Bëd. ⁶Zojbaman lidx tijb bén la gajc Simón, bén rüjnchaaw guid, bén zojb gajxh ro' nijsdoo. Bëd guin na ni rayal güünl.

⁷Chi zia anjl gunee Cornel, gurejdxaman tio'p ree xmojsaman, zatijb suldad rajpaman confians rililadx tëëman Dios. ⁸Gulox beman diidx loj reeman ni guzacaman, dxel guxhaalaman laa reeman Jope.

⁹Chi bareguiaal, la'tgaj cadxin reeman gajxh Jope, cost garol dxej wë'p Bëd guijc yu lod zojbaman din cwedx guiniabaman Dios. ¹⁰Dád gulaanman, guyënman niajwaman, per la'tgaj cayüjn reeman ni gawaman guzajcaman zi'c ruliüü cane'xhchaalaman. ¹¹Baguiaaman bixal xanyabaa abi' caguiajt zi'c tijb lajd naroox xt lod za'man, naxii guidap xquinan. ¹²Loj lajd guin yu' gra loj ree be yu' tajp guia', në ree bëël, nëtëë ree be rzuj. ¹³Dxel bigueijnman cha' bën rëb:

—Bëd, bisu, bagüjt be gawil.

¹⁴Per badxi' Bëd laan rëbaman: —Yajqui, Dad. Ad wayawtczan nidxuudx ni ad rayalt gaw bejn.

¹⁵Abi' rëb cha' bën guin zatijb: —Ni ma basia Dios ad rnieelan nidxuudx.

¹⁶Choon volt gojc zian, dxel bayë'p lajd guin xanyabaa stijb.

¹⁷La'tgaj cayüjn Bëd xgab xhie rën guiëb ni baguiaaman, loj hor zii gajc bidxin ree bën guxhaal Cornel rulidx Simón, guial ma gunabdiidx reeman banguin naj lidxaman.

¹⁸Chi bidxin reeman, gunabdiidx reeman bal ni zojb Simón bën la gajc Bëd.

¹⁹Guiáad Bëd sta cayüjnman xgab ni baguiaaman, chi rëb xSprijt Dios lojman:

—Laa choon ree xinguaaaw raguiil lüj. ²⁰Bisu, biguiajt binë reex, ad chu' luxdool tio'p, din naj guxhal laa reex.

²¹Dxel baguiajt Bëd lod za' ree bën guxhaal Cornel, abi' rëbaman loj reeman:

—Naj naj bën raguiilidi, çchexquiza zeel raguiilidi naj?

²²Dxel badxi' reeman laan rëb reeman:

—Guxhaal bën la Cornel dunujn, bën rniabee tibcwaa ree suldad, najman benza'c, rdxebaman Dios, abi' graczi ree bën Israel rën laaman. Tijb xi anjl Dios rëb lojman, guial rayal guixhiaalaman dunujn yudca'n lüj din yo' ree lidxaman, din gucaagdiagjaman ni rayal guiëbil.

²³Dxel badxe' Bëd laa reeman lënü, ni gudëd reeman guiaal. Chi bareguiaal, binëman laa reeman. Në bëlzi ree bën zojb Jope bën rililadx ree Jesucrist binë laaman.

²⁴Chi bareguiaal bidxin reeman Cesarea lod zojb Cornel. Abi' bato'p Cornel gra ree lasa'man në ree xmiwaman, din cwëz reeman guidxin reeman. ²⁵Chi bidxin Bëd lidx Cornel, laa brii gajc Cornel bigchaaglojman laaman, dxel bazuxibaman loj Bëd persi gojpaman laaman respejt. ²⁶Per bazuli Bëd laaman, rëbaman:

—Guzuli, din lasa' bejn gajcan lüj.

²⁷La'tgaj cadxin reeman ruyü guin cayü reeman diidx. Abi' chi guyu reeman, baguiaa Bëd zien da't ree bejn riga' ni. ²⁸Dxel rëb Bëd loj reeman:

—Ma qui ragbeedi xhienaag naj xley ree bën Israel, guial ad zajct go'ch reeman loj ree bën ad najt bën Israel o chu' reeman lidx reeman. Per ma balüü Dios naj guial achutczi rayal ganen bendxuudx, bën nabixhladx. ²⁹Zeel chi bidca' reeman naj, laa bial gajcan achet guijc badxiban. Yan rënan gagbeen, çchexquiza zeel gurejdxidi naj?

³⁰Badxi' Cornelan rëbaman:
 —Ma gojc tajp dxej cost hor
 guie gajc, chi zoob lidxan, raca
 choon wadxe, cabedx canaaban
 Dios, loj hor zii balüüloj tijb bejn
 lon najcwaman lajd nayni. ³¹Abi'
 naman lon: “Cornel, ma biguiejn
 Dios xtiidxil, yu'guijc tëëman
 xhienaag rüjnl yudar bënprob ree.
³²Zeel guxhaal ree xin che luguiedx
 la Jope din chica' reex Simón, bën
 la gajc Bëd. Zojbaman lidx tijb bën
 la gajc Simón, bën rüjnchaaw guid,
 bën zojb gajxh ro'nijsdoo. Bëd guin
 na ni rayal güünl.” ³³Zianan zeel
 laa guxhal gajcan xin bidgadiil ree
 lüj. Zagdxe beenl bi'til. Abi' yan
 dugraczan nadxu' delant loj Dios yu'
 xanyabaa, din yacaagdiajgan gra ni
 gunabee Dios lüj nal du lojn.

Ni gunee Bëd lidx Cornel

³⁴Dxel guzuloj canee Bëd,
 rëbaman:
 —Ma ragbeen yan guial tiblojzi
 ruguiaa Dios bejn. ³⁵Din Dios,
 chutëëz bënguidxliuj ridxga'
 laaman rüjn tëëman zi'c rayal,
 nëgajc Dios ridxga' laaman. ³⁶Dios
 ma gunee bën Israel ree, ma
 bagojnman guial por Jesucrist
 rabadxe luxdoo bejn, bën naj Dad
 par gra ree bënguidxliuj. ³⁷Lëjt
 ragbee xhienaag baza't reeman
 Jesús diizd niz Galilea xt guidib
 niz Judea, chi gulox bagojn Waj
 bejn ree xcwent guialrirobnijs.
³⁸Ragbee tëëdi guial ma badëë Dios
 xSprijtaman con xguialrniabeeman
 loj Jesús bën Nazaret, abi' bizaman
 biguieenman ni zagdxe, bayünman
 gra ree bën cazagdiaj por xindxab.
 Gojc beenman zian guial za'në

Dios laaman. ³⁹Abi' dunujn
 baguiaa gra ni been Jesús guidib
 niz Judea, në niz Jerusalén. Dxelri
 bagüjt reeman laaman, bacaa
 reeman laaman loj crüjz. ⁴⁰Per
 Dios basban laaman ni bayon dxej,
 abi' cwëjb Dios bidgaliüülojman du
 lojn. ⁴¹Ad balüülojtaman loj gra
 ree bejn, tijbzi du lojn nayajcan
 bën gule Dios diizd yaloj din
 yaguaan graczi ni beenman. Abi'
 dunujn badaawnë' laaman badü'në'
 tëën laaman chi babanman stijb.
⁴²Dxelri guxhaal Jesús dunujn din
 yatie'chan xtiidxaman loj ree bejn,
 guial Dios ma gulej laaman din
 güünman guialguxtis chi guidxin
 dxej yadëëd gra ree bejn cwent loj
 Dios, zi'c ree bën naban zi'c ree bën
 ma güjt. ⁴³Në'tëë diizd gocli graczi
 ree bën badëëd xtiidx Dios loj ree
 bejn, gunee reeman xcwent Jesús,
 rëb reeman guial graczi ree bën
 chililadx laaman, gac xtol reeman
 perdon.

Guyu xSprijt Dios luxdoo ree bën ad najt bën Israel

⁴⁴Sta canee Bëd, chi guyu xSprijt
 Dios luxdoo gra ree bën cucaagdiajg
 ni cayëbaman. ⁴⁵Dxel bën Israel
 rliladx ree Jesucrist, bën binë ree
 Bëd, dád badxa loj reeman guial në
 ree bën ad najt ree bën Israel guyu
 xSprijt Dios luxdoo, ⁴⁶guial riguiiejn
 reeman ma rniee ree bën guin graloj
 ree diidx, abi' ruza't reeman Dios
 zagdxe. ⁴⁷Dxel rëb Bëd loj reeman:
 —¿Chu zajc gudxoon tiobnijs ree
 bën guie, bal ma yu' xSprijt Dios
 luxdoo reeman zi'cgajc dunuj ree?
⁴⁸Abi' gunabeeman tiobnijs
 reeman por Jesucrist. Dxelri guzajc

reeman liaadx loj Béd din sunëman laa reeman za tio'p choon dxej mazri.

Guyu xSprijt Dios luxdoo ree bën ad najt bën Israel

11 Bën naj ree xi apóstoles Jesús con ree bën Judea, bën rililadx ree laaman, gogbee reeman guial në ree bën ad najt bën Israel bililadx xtiidx Dios. ²Abi' chi badxin Béd Jerusalén, bën Israel ma rililadx ree Jesucrist, bën sta zinal ree ley, gudilë reeman Béd. ³Rëb reeman lojman:

—¿Chexc zeel bichu'l lidx ree bën ad najt bën Israel abi' gudawnël laa reeman?

⁴Dxel guzuloj cayü Béd diidx diizd guia'xchej xhienaag gojc zeel wejman lidx ree bën guin abi' rëbaman loj reeman:

⁵—Chi za'n luguiedx Jope, la'tgaj cabedx canaaban Dios, guza'can zi'c ruliüü cane'xhchalan. Baguian zi'c tijb lajd narooob naxii guidap xquinan caguiajtan diizd xanyabaa xt lod za'n. ⁶Chi baguian zagdxe xhie yu' loj lajd guin, baguian bedoxh ree në ree be yu' tajp guia' në ree bëël con ree be rzuj. ⁷Dxel biguiejnan cha' bejn, naman: “Béd, guzuli, bagüjt be gawil.” ⁸Per badxi'nän rën: “Yajqui, Dad, din ad goctzi wayawan nidxuudx, ni ad rayalt gaw bejn.” ⁹Abi' guneeman diizd xanyabaa stijb, naman: “Ni ma basia Dios, ad rnieelan nidxuudx.” ¹⁰Choon volt gojc zian, dxel bayè'p gra ni guin xanyabaa. ¹¹Loj hor zii gajc bi't choon ree xinguaaw lod guren, zëäd reex diizd Cesarea, cayguuil

reex naj. ¹²Abi' na xSprijt Dios lon guial chinë'n laa reex, ad chu' luxdon tio'p. Në guixo'p ree bën guie bën naj dux compniar ree binë'n. Abi' dugraczan badxu' lidx bën guin. ¹³Dxel beman diidx du lojn xhienaag baliüuloj tijb xi anjl Dios lojman lidxaman, rëb anjl guin lojman: “Guxhaal ree bën che luguiedx Jope din chica' reeman Simón, bën la gajc Béd, ¹⁴laaman na xhienaag gac ree xtolil perdon, con gra ree bën zojb lidxil.” ¹⁵Chi guzuloj canenë'n laa reeman, guyu xSprijt Dios luxdoo reeman zi'cgajc guyuman du luxdoo ree yaloj. ¹⁶Dxel basaaladxan xtiidx Dad Jesucrist chi naman: “Walican baroobnijs Waj con nijs, per lëjt chu' xSprijt Dios luxdoodi.” ¹⁷Abi' yan bal ma guxhaal Dios xSprijtaman par laa reeman zi'cgajc guxhaalaman laaman du loj ree chi baliladx ree Dad Jesucrist, ¿chu najn din gudxonan ni rüjn Dios?

¹⁸Chi biguiejn ree bën guin ni rëb Béd, dxel achetri rëb reeman lojman abi' baza't reeman Dios zagdxe, rëb reeman:

—iMa rayagbee ree yan guial në ree bën ad najt bën Israel ma baliüü Dios guial rayal yayüjn xgab por xtol reeman yadxi' tëë loj reeman lojman din gap reeman guialnaban tiblyaaa delant lojman!

Bililadx ree bën Antioquía Jesucrist

¹⁹Chi mal bagüjt ree bejn Esteban, dxel guzuloj rzunal reeman bën rililadx ree Jesucrist persi bire'ch gra ree bën rililadx guin niz Fenicia, niz Chipre në Antioquía. Abi' gutie'ch reeman xtiidxza'c

Jesucrist, per ganaxzi loj ree b́en Israel. ²⁰Per loj reeman no'ch b́elzi ree b́en Chipre n̄e ree b́en Cirene. Laa reeman we luguiedx Antioquía abi' gutie'ch reeman xtiidx Dad Jesucrist loj ree b́en ad najt b́en Israel. ²¹Gogn̄e Dios laa reeman, dád zien ree bejn bililadx ni r̄eb reeman abi' bililadx reeman Jesucrist.

²²Chi gogbee ree b́en Jerusalén rililadx Jesucrist ni goc, guxhaal reeman Bernabé xt guiedx Antioquía. ²³Chi bidxinman ni, dád babaaman chi baguiaaman xhienaag cayagn̄e Dios b́en guin ree. Dxel guneen̄eman gra reeman din con guidib luxdoo reeman gusnuu chinal reeman xtiidx Jesucrist. ²⁴Benza'c gojc Bernabé, dád gogn̄e xSprijt Dios laaman abi' bililadxaman Jesucrist con guidib luxdooman. Zeel dád zien ree bejn bililadx Jesucrist.

²⁵Dxelri wej Bernabé guiedx Tarso bigdiilaman Saulo. ²⁶Chi badxejlaman laaman, dxel bin̄eman laaman xt Antioquía. Ni guzun̄e reeman b́en rililadx ree Jesucrist tibijz, dád zien ree bejn balüü reeman. Abi' luguiedx Antioquía naj lod gul̄elaj reeman b́en rililadx ree Jesucrist, cristian.

²⁷L̄en ree dxej zii b́elzi ree b́en bad̄e xtiidx Dios loj ree bejn, guza Jerusalén wej reeman Antioquía. ²⁸Tijb reeman la Agabo, laaman guzuli loj ree bejn abi' por xSprijt Dios bagojnman guial chu' gubijn guidibczí guidxliuj. Laan gojc loj tiamp gunabee rey Claudio. ²⁹Abi' ree b́en rililadx Jesucrist luguiedx Antioquía, baya'n reeman diidx din

guido'p reeman zi'ctzi ni galguzuj gud̄eéd tijb gaj reeman, din gagn̄e lasa' reeman, b́en rililadx ree Jesucrist, b́en zojb ree niz Judea. ³⁰Abi' zian been reeman. Dxel guxhaaln̄e reeman laan Saulo con Bernabé din gud̄eéd reeman laan loj ree b́en rniabee ree b́en rililadx Jesucrist niz Judea.

Guyu B̄ed ladxguiib

12 L̄en ree dxej zii guzuloj rey Herodes cusagziman b́elzi ree b́en rililadx Jesucrist. ²Abi' gunabeeman bagüjt reeman Jacob bijch Waj, con espad. ³Chi baguiaaman bayuladx ree b́en Israel ni beenman, dxel gunabeeman gunaaz reeman B̄ed. Ni ne goc l̄en ree dxej lanij pascw chi raw reeman guiadxtil ad yu't levadur. ⁴Chi gunaaz reeman B̄ed, badxe' reeman laaman ladxguiib abi' gunabee rey Herodes tajp cwaa ree suldad din guinia reeman ro' ladxguiib guin, tib cwaa gaj reeman naj tajp suldad. Din beenman xgab nuzujman B̄ed loj ree b́en guiedx guin chi nid̄ed pascw. ⁵Zian guyu B̄ed ladxguiib, gojp da't reeman laaman. Per gra ree b́en rililadx Jesucrist ad rucw̄eézt rbejdx rniab reeman Dios por laaman.

Bab̄e Dios B̄ed ladxguiib

⁶Guxhin zii gajc chi yareguiaal cw̄eé Herodes B̄ed loj ree b́en guiedx guin, naga'ȳejs B̄ed galay tio'p ree suldad, naxiiman con tio'p ree caden, guiáad los demazri ree suldad guin cayajp ro' ladxguiib guin. ⁷Dxejczí bidxin tijb xi anjl Dios abi' basni

tijb guij lën ladxguuib guin, dxel baqui' anjl guin cwë'lën Béd persi bacwëenman laaman, rëbaman lojman:

—iCari bixche!

Loj hor zii gajc biajb ree caden naxii yaa Béd, ⁸abi' rëb anjl guin lojman:

—Guxhiidxi'ch lënl balëë tëë xgurëchil.

Chi ma been Béd zian dxel rëb anjl guin:

—iGojt xcajpil, tanal naj!

⁹Laa barii gajc Béd nalaman anjl guin, per ad ragbeetaman bal diidxli naj ni cayüjn anjl guin, gunaladxaman cane'xhchaalzaman.

¹⁰Abi' gudëd reeman loj tibcwaa ree suldad guin, dxel gudëd reeman loj stibcwaa reeman. Chi bidxin reeman ro' portguuib ni rarii runejz guin, dxel xtijbzán bixal abi' barii reeman. Abi' chi bidxin reeman tijb xquin, yagaj basa'n anjl guin Béd. ¹¹Dxel gogbee Béd guial ni diidxliqui naj ni cazajcaman, abi' rëbaman:

—Yanri ma ragbeen guial guxhaal xi anjl Dios persi babëëman naj loj Herodes, con loj gra ni nüjnnë ree bën Israel naj.

¹²Chi bayagbee Béd ni guzacaman, dxel baguijman lidx Li, xniaa Waj, bën la gajc Marcw, lod riga' zien ree bejn cabejdx canab reeman Dios. ¹³Chi gulajw Béd ro' port, dxel brii tijb biin la Rode ziquiaam chunin. ¹⁴Per chi bayünbeem cha' Béd, dád babaam, dxel luar nixhialim ro' port guin, baxüünm bicojnm guial za' Béd ro' port guin. ¹⁵Abi' rëb reeman lojm:

—iRajc guijquil!

Per za'dxi'chczim guial waliqui ni rëbim. Dxel rëb reeman lojm:

—Ad laataman, wed xi anjlaman.

¹⁶Per Béd cabajwzi cabajwaman ro' port guin. Dxel chi guxhal reeman dád bidxeb reeman baguiaa reeman laaman. ¹⁷Abi' been Béd sen loj reeman din yacwëëz ro' reeman, dxel beman diidx xhienaag babëë Dios laaman ladxguuib. Abi' rëbaman loj reeman:

—Gol be ni guie loj Jacob në loj gra ree bën rliiladx Jesucrist.

Dxelri briiman yagaj zëman lood ren.

¹⁸Chi bareguiaal, ad radxejlt xhie güün ree suldad guin guial ad ragbeet reeman xhienaag barii Béd ladxguuib guin. ¹⁹Dxel gunabee Herodes chigdiil reeman Béd, per ad badxejlt reeman laaman. Abi' chi gulox gunabdiidx Herodes loj ree suldad guin xhienaag gojc, gunabeeman gugüjt reeman laa reeman. Dxel brii Herodes Judea abi' bisobaman luguiëdx Cesarea.

Güjt rey Herodes

²⁰Balen Herodes bën Tiro në ree bën Sidón, per baya'n ree bën guin diidx din chigneenë reeman laaman. Chi been reeman gan guneenë reeman bën brii laj Blastoz zagdxë, tijb bën naj xbejn rey Herodes, dxel guneë Blastoz por laa reeman loj rey guin din lox til reeman, din guidibczi lod rniabee rey guin zëëd ni raw reeman. ²¹Bazuj Herodes xhie dxej guinieenëman laa reeman abi' dxej zii gojt xab zagdxëman, gurej loj xyagxhilaaman lod rniabeeman, zianz guzuloz guneenëman laa reeman. ²²Dxel guzuloz gurixdiaj ree bën guin, rëb reeman:

—iAd bejntan canee, tijb diosan!

²³Loj hor zii gajc badëe tijb xi anjl Dios tijb guialguijdx loj Herodes. Gudaw bizog laaman abi' güjtaman guial bayuladxaman baza't ree bejn laaman zagdxë luar nuzat' reeman Dios zagdxë.

²⁴Per xtiidx Dios care'chzi care'chan gra ladczi abi' gra ladczi cayajcxhiey ree bën rlladx laaman.

²⁵Chi ma badëed ree Bernabé con Saulo ni guxhaal ree bën Antioquía, dxel baza reeman Jerusalén, binë reeman Waj, bën la gajc Marcw.

Guzuloj Bernabé con Saulo bigtie'ch reeman xtiidx Dios

13 Loj ree bën rlladx Jesucrist, bën zojb ree Antioquía, no'ch ree bën rudëed xtiidx Dios loj ree bejn në ree bën ruluü xtiidxaman. La reeman Bernabé, Simón bën rniee reeman Benya's, Lucio bën Cirene, Saulo con Manaén bën guni'snë Herodes tijbzi, bën gunabee Galilea. ²Tijb dxey chi naba'n reeman, la'tgaj cabejdx canab reeman cuza't tëe reeman Dios zagdxë, rëb xSprijt Dios loj reeman:

—Gol bacaabee Bernabé në Saulo din güün reeman dxiin rënan güün reeman.

³Chi gulox guba'n reeman gurejdx tëe reeman Dios, dxel guxhoob yaa reeman guiyc Bernabé con Saulo din gagnë Dios laa reeman abi' bazaadiidxnë reeman laa reeman.

Bernabé con Saulo wej reeman Chipre

⁴XSprijt Dios naj bën guxhaal Bernabé con Saulo, zë reeman Seleucia, ni guyu reeman loj barcw, zë reeman yuj la Chipre, ni riga' loj nijsdoo. ⁵Chi bidxin reeman niz Chipre, dxel luguiedx Salamina guzuloj gutie'ch reeman xtiidx Dios lën ree xyadoo ree bën Israel. Në Waj binë reeman din güünman laa reeman yudar. ⁶Chi biza reeman guidib niz Chipre, dxel bidxin reeman Pafos. Ni bidxaagloj reeman tijb bën Israel laman Barjesús, rajcaman guialbidxaa, rusquieeman bejn ree, rëbaman guial laaman naj bën rudëed xtiidx Dios loj ree bejn. ⁷Barjesús guin rnieenëman Sergio Paulo zagdxë, bën naj gobernador Chipre, rignia' da'taman. Gurejdx gobernador guin Bernabé con Saulo guial rënman gucaagdiajgaman xtiidx Dios. ⁸Per bënbidxaa guin (con diidx grieg laman Elimas) guyënman nudxoonman guial nililadx Sergio Paulo xtiidx Dios. ⁹Abi' Saulo, bën la gajc Pab, rniabee xSprijt Dios luxdooman guidiblagaa, baguiaadxijchaman loj bënbidxaa guin, ¹⁰rëbaman:

—iXi'n xindxab lüj, ganax rusquieel, ganax niguijdx rüjnl, ad rëntczil ni zagdxë! ¿Xt goc gudëel mod chinal ree bejn xnejz nali Dios? ¹¹Yan gudëed Dios lüj casti: ad zanit lojl abi' xchej ad zuguaatil xbacha' gubijdx.

Loj hor zii gajc gurexcayj Elimas abi' ad gojctri nuguaaman, dxel raguiilaman chu guiniaaz yaaman

guial ad rajctri ruguiaaman. ¹²Chi baguiaa gobernador guin zian, dxel bililadxaman abi' dád badxa lojman ni balüü reeman xcwent Dad Jesús.

Bidxin Pab con Bernabé niz Pisidia

¹³Chi ma gudéd gojc zian, guyu Pab con ree xcompniaraman loj barcw luguiedx Pafos abi' zë reeman luguiedx Perge ni riga' niz Panfilia. Ni basa'n Waj laa reeman bayejcaman Jerusalén. ¹⁴Dxel barii reeman guiedx Perge, zë reeman luguiedx Antioquía ni riga' niz Pisidia. Abi' dxej raziiladx ree bën Israel, guyu reeman lën xyadoo ree bën Israel zianz gurej reeman. ¹⁵Dxel chi gulox biil bën biil tib lajt loj libr bacaa Moisejs në loj libr bacaa ree bën badëe xtiidx Dios loj ree bejn, gunee ree bën rniabee lën yadoo guin, rëb reeman loj Pab con Bernabé:

—Bal xhie guiëbidi loj ree bën riga' guie din gudëedi consejw loj reeman, zajc guiëbidan yan.

¹⁶Dxel guzuli Pab, beenman sen loj reeman din yacwëez ro' reeman, dxel rëbaman:

—Bën Israel, në gra ree bën rdxeb Dios, gol bacaagdiajg: ¹⁷Dux Dios ree, nayajc ree bën Israel, gulejman dux béngulal ree abi' laaman been persi gojcxhiey reeman, chi sta zojb reeman zi'c benzit niz Egipto. Dxel con xguialrniabeeman babëëman laa reeman Egipto. ¹⁸Abi' baslejnguijcaman laa reeman loj tiuu ijz ni guzu reeman niz lod naj ganax yujbidx, ¹⁹banijt tëëman gajdx ree nacion ni gure Canaán persi badëëman guidxliuj guin ree loj dux béngulal ree. ²⁰Zian

gojc loj tajp gayuu garol ijz, dxelri bacaabee Dios juejs ree persi gunabee reeman laa reeman. Abi' Samuel bën badëëd xtiidx Dios loj ree bejn gojc xjuejs bigra reeman. ²¹Dxel gunab reeman din chu' tijb rey nabee laa reeman, abi' bazuj Dios rey Saúl xi'n Cis, bën zëed loj xdiaa Benjamín persi gunabeeman laa reeman tiuu ijz. ²²Chi bisüd Dios rey Saúl, dxel bazujman rey Davi. Abi' rëbaman: “Ma baguian guial Davi xi'n Isaí, nabanx zi'c rënan, güün tëëx cumplid da diidxan guial güünx gra zi'c rënan.” ²³Abi' yan zi'c gajczi rëb Dios, loj gajc xdiaa rey Davi, bii Jesús bën guxhaalaman din yabëëman bën Israel ree loj dol. ²⁴Chi gad Jesús gui't, Waj bën baroobnijs bejn ree, bagojnman gra ree bën Israel guial rayal yayüjn reeman xgab por xtol reeman tiobnijs tëë reeman. ²⁵Chi ma zidyob yadiblagaa xguialnaban Waj, dxel rëbaman: “Ad najtan bën naladxidi, qui gui'traman, laaman mazri lasajc guial lon, ni'quid rayalt gaxhiecan xgurëchaman.”

²⁶Yan, dugra ree nayajc ree xdiaa Abraham në gra los demazri ree bën rdxeb Dios, par dunuj ree naj xtiidxaman ni rugojn reeman dunuj ree, xhienaag rabëë Jesucrist dunuj ree loj dol. ²⁷Per ree bën Jerusalén con ree xguxtis reeman ad bayagbeet reeman Jesús. Ad gogbee tëët reeman xhie rën guiëb xtiidx Dios ni bacaa ree bën badëëd ree xtiidxaman loj ree bejn, ni rool reeman lën yadoo dxej raziiladx ree bejn, dxel laagajc reeman bagüjt Jesús, zian gojc cumplid ni ca loj xtiidx Dios. ²⁸Abi' majsi achetczi

xtol Jesús guyu, per ni'czi zian rëb gajc reeman loj Pilato guial nabeeman guiëtaman. ²⁹Chi gulox been reeman gra zi'c ca loj xtiidx Dios xcwent Jesús, balet reeman laaman loj criüjz abi' baquie'ch reeman laaman. ³⁰Per Dios basban laaman, ³¹dxel loj zien dxej balüülojman loj ree bën binë laaman chi briiman niz Galilea zëman Jerusalén, abi' yan laa reeman naj bën rniee por laaman loj ree bejn.

³²'Zeel caygojnan lëjt diidxa'c guin ree, guial promejs been Dios loj ree dux béngulal ree, ³³ma beenman laan cumplid con dunuj ree guial zio'p ree loj xdiaa reeman. Beenman cumplid xtiidxaman chi basbanman Jesús zi'c ca loj Salmo barojp, lod rëb: "Lüj naj da xi'n'an abi' diidz yan ma rajpil guialrniabee zi'cgajc naj." ³⁴Dios rëb guial yasbanman Jesús abi' ad zaxint xcuerpaman zi'c gajczi ca loj xtiidx Dios lod rëb: "Naj günle' lëjt zi'c benan promejs loj Davi." ³⁵Abi' rëb tëë stib lajt loj xtiidxaman: "Ad zatiëjbtıl xhin xcuerp xi'nl, bën naya nali." ³⁶Yan diidxiczi diidx guin ree ad rnieet reen xcwent Davi, din chi gulox gunabeeman bejn ree xtiampaman zi'c rëb Dios nabeeman, dxel güjtaman, biguie'chaman abi' guxin xcuerpaman. ³⁷Per xcuerp Jesús bën basban Dios, ad guxintan. ³⁸Zeel caygojnan lëjt compniar din gagbeedi guial por laaman ma yu' perdon par dux tol ree. ³⁹Graczi bën rliladx Jesucrist ma gojc perdon gra xtol reeman ni ad gojct niajc perdon por ley badëe Dios

loj Moisejs. ⁴⁰Zeel gol gojp cudad chitëe saquidi zi'c bacaa ree bën badëe xtiidx Dios loj ree bejn, lod rëb:

⁴¹Gol bacaagdiajg, lëjt bën ruze' ree da diidxan, gol badxalojdi gol gunidloj tëë. Din loj ree dxej nabandi gün reen ni xt ni'quid zaliladxtidi, majsi chu na laa reen lojdi.

⁴²Chi barii Pab con Bernabé lën xyadoo ree bën Israel guin, gunab reeman favor loj Pab, din chi guidxin stijb dxej raziiladx ree bejn chiguieman mazri diidx loj reeman xcwent ni beman dxej zii. ⁴³Chi barii ree bën guin lën yado guin, zien da't reeman binal Pab con Bernabé, zi'c ree bën Israel zi'c ree bën ad najt bën Israel, bën rën ree Dios zi'cgajc ree bën Israel. Abi' rëb Pab con Bernabé loj reeman din sudxi'ch reeman loj nejz zagdxeguredx Dios laa reeman guial rënman laa reeman.

⁴⁴Chi bidxin dxej ni raziiladx ree bejn, gra bën luguiedx guin bado'p din gucaagdiajg reeman xtiidx Dios. ⁴⁵Per chi baguiaa ree bën Israel zien da't ree bejn riga' yagaj, dxel guyu guialnadëdloj luxdoo reeman abi' guzuloj caneeguijdx reeman canee tëë reeman diidxguijdx loj Pab. ⁴⁶Dxel sin guialrdxeb badxi' Paban con Bernabé loj reeman, rëb reeman:

—Yaloy lëjt rayal yagojnan xtiidxa'c Dios, lëjt najdi bën Israel, per yan ad rëntidi gucaagdiajguidi laan, dxel lëjt gajc culüü guial ad zajct yayalidi guialnaban tiblayaa con Dios. Yan ma yugtie'chan diidxa'c guin ree loj ree bën ad

najt bén Israel. ⁴⁷Din zian gunabee dux Dad ree Dios dunujn, chi rëbaman tib lajt loj xtiidxaman:

Nuzun lüj zi'c guij par gra ree nacion,

din chel guidibchicniaa loj guidxliuj chicojnl

xhienaag gac ree bejn perdon.

⁴⁸Chi biguiejn ree bén ad najt bén Israel zian, dxel babaa reeman, guzuloj rëb reeman guial zagdex naj xtiidx Dios, abi' graczi bén ma naj yayal guialnaban tiblayaa con Dios, bililadx reeman xtiidxaman.

⁴⁹Zianan zeel bire'ch xtiidxza'c Dios guidib niz ni. ⁵⁰Per ree bén Israel batiaalguiiw reeman béngunaa rej ree laydoo zianczi naj tée reeman bén zobjloj luguiedx zii, në ree xinguaaw naj gajc xin zobjloj, din sunal reeman Pab con Bernabé xt yabëe reeman laa reeman ni. ⁵¹Dxel Pab con Bernabé gudxijp guxyuj guia' reeman zi'c tijb sen guial ad bazoobt ree bén guin diidx, dxel zë reeman Iconio. ⁵²Per ree bén bililadx Jesús niz ni, ma rniabee xSprijt Dios luxdoo reeman guidiblagaa abi' dád rabaa reeman.

Bidxin Pab con Bernabé Iconio

14 Luguiedx Iconio, Pab con Bernabé guyu reeman lën xyadoo ree bén Israel. Abi' zi'c balüü reeman xtiidxza'c Jesucrist, zien da't reeman bililadx, zi'c ree bén Israel zi'c ree bén ad najt bén Israel. ²Per ree bén Israel ad bililadxt batiaalguiiw reeman bén ad najt ree bén Israel persi guzuloj been reeman xgab mal por ree bén rililadx Jesucrist. ³Per ni'czi

zian, xchej da't guzuj ree apóstoles guin ni, abi' sin guialrdxeb gunee reeman xtiidx Dios guial rililadx reeman Jesucrist, laaman badëed guialrniabee loj reeman persi been reeman zien da't ree milagr në mazri ree ni ren, persi balüü Jesucrist guial diidxli naj ni rëb reeman xcwent Dios. ⁴Per ree bén luguiedx zii gojc reeman tio'p lala', garol reeman guzunë ree bén Israel zagarol reeman guzunë apóstoles guin ree. ⁵Dxel zi'c ree bén Israel zi'c ree bén ad najt bén Israel, baya'n reeman diidx con ree guxtis din tilë reeman Pab con Bernabé gucaaguij tée reeman laa reeman. ⁶Abi' chi gogbee Pab con Bernabé zian, laa zia gajc reeman Listra con Derbe, guiedx riga' ree niz Licaonia, në gra ree guiedx riga' niz ni, ⁷gunee reeman xtiidxza'c Jesucrist.

Bacaaguij reeman Pab Listra

⁸Luguiedx Listra guyu tijb xinguaaw ad rajct rza, ad guzatzciz guial naxin guia'x diidx chi golix abi' zobjix ⁹cucaagdiagjuix ni rëb Pab. Chi baguiaa Pab laax, gogbeeman guial rililadxix par yayajquix. ¹⁰Abi' gunee man rejs, rëbaman:

—iBisu, guzuli zagdex!

Loj hor zii gajc gutiajs xin guin, guzulix abi' guzuloj cazax. ¹¹Chi baguiaa ree bejn ni been Pab, guzuloj canee reeman rejs diidx Licaonia, rëb reeman:

—Dios naj ree zi'c bejn ma biguiajt lod nadxu' ree.

¹²Abi' rëb reeman guial Bernabé naj dios Júpiter, guiáad Pab naj dios Mercurio guial laaman naj bén

rníee loj reeman. ¹³Abi' ro' guiedx guin niz lod ru bejn naj xyadoo Júpiter, dxel bixhioz yu' lèn yadoo guin binëman go'n ree con ree guiaa, abi' laaman con ree bën guin guyèn reeman nugüjt reeman go'n guin ree din niën reeman apóstoles guin ree zi'c xdios reeman. ¹⁴Per chi gogbee Pab con Bernabé zian, gudixya' xab reeman, guzëëb reeman lad ree bën guin, rbixdiaj reeman rëb reeman:

¹⁵—Gol bacaagdiajg, ¿chexquiza zeel rüjndi zian, awa bejn gajc dunujn zi'cgajc lëjt? Awa par zianclan zio'pan din yanan lojdi din yasa'ndi ni rüjndi, din achetdzi lasajc reen. Mejorli gol binal xnejz Dios naban, bën been xanyabaa në guidxliuj nëtëë nijsdoo con gra ni yu' loj reen. ¹⁶Tiamp gulal Dios baslaa been ree bejn ni guyëntzi reeman. ¹⁷Per ni'czi zian, zianczi balüüman chu najman por ree ni zagdxe ni rüjnman. Din laaman naj bën razaladx guia con guialnaza'c abi' razaladxaman ni radaaw ree din chu' du luxdoo ree zagdxe. ¹⁸Chi rëb Pab con Bernabé zian, con ree diidx guin penz been reeman gan badxoon reeman guial nugüjt ree bën guin go'n guin ree din niën reeman laa reeman zi'c xdios reeman.

¹⁹Per bëlzi ree bën Israel zojb Antioquía në Iconio, chi bidxin reeman luguiedx Lистра been reeman gan batiaalguiiw reeman bën luguiedx guin ree. Dxel bacaaguij reeman Pab abi' gunaladx reeman ma güjtaman abi' guxoobyuj reeman laaman, babëë reeman laaman luguiedx guin.

²⁰Per chi bido'p ree bën rliladx Jesucrist gadëd lod naga'man, dxel bixcheman, bayuman luguiedx guin stijb. Chi bareguiaal briinëman Bernabé zë reeman luguiedx Derbe.

²¹Chi gulox gutie'ch reeman xtiidza'c Jesucrist luguiedx Derbe lod been reeman gan bililadx zien ree bejn laan, dxel bayejc reeman luguiedx Lистра në Iconio nëtëë Antioquía. ²²Luguiedx zii ree badxe' reeman luxdoo ree bën rliladx Jesucrist. Rëb reeman loj reeman din sudxi'ch reeman loj ni rliladx reeman laaman, din dád sagdiaj reeman din yayu reeman lod rniabee Dios. ²³Abi' tëë loj tijb gaj ree guiedx guin bacaabee reeman bengol nabee ree loj ree bën rliladx Jesucrist. Zianz chi gulox guba'n reeman gurejdx tëë reeman Dios, dxel basa'n reeman laa reeman con Dad Jesús bën ma bililadx reeman.

Badxin ree Pab con Bernabé Antioquía ni riga' niz Siria

²⁴Chi baza ree Pab con Bernabé niz Pisidia, bidxin reeman niz Panfilia. ²⁵Abi' guneë reeman xtiidx Dios luguiedx Perge, dxel zë reeman guiedx Atalia. ²⁶Ni guyu reeman loj barcw zë reeman Antioquía, luguiedx lod basa'n ree los demazri ree bën rliladx Jesucrist laa reeman con Dios din gagnëman Pab con Bernabé din gutie'ch reeman xtiidxaman. Abi' dxiin guin naj ni ma baloox reeman. ²⁷Dxel chi bidxin reeman Antioquía, bato'p reeman bën rliladx ree Jesucrist, persi be reeman diidx loj reeman gra ni been Dios con laa reeman, xhie tëë naag guxhalaman

nejz din chililadx ree b́en ad najt b́en Israel Jesucrist. ²⁸Ni guzu Pab con Bernab́e xchej, guzuńe reeman b́en Antioqúa rliiladx ree Jesucrist.

Guyu gabilt Jerusaĺen

15 Ĺen ree dxej zii bidxin b́elzi ree b́en Judea luguiedx Antioqúa. Abi' guzuloj ŕeb reeman loj ree b́en rliiladx Jesucrist, guial bal id zu reeman sen zi'c gunabee Moisejs, ad zajct ǵuun Dios xtol reeman perdon. ²Dxel Pab con Bernab́e dád zro' gudijliidix reeman con ree b́en guin. Dxel bacaabee ree b́en rliiladx Jeśus Pab ńe Bernab́e, ńe ree ben ren din che reeman Jerusaĺen chigneeńe reeman apóstoles guin ree, con ree bengol rniabee loj ree b́en rliiladx Jesucrist din guguiaa reeman xhienaag ǵuun reeman xcwent sen guin.

³Abi' badxe'nejz ree b́en Antioqúa rliiladx ree Jesucrist laa reeman persi źe reeman. Chi źe reeman gudéd reeman niz Fenicia ńe niz Samaria abi' bagojn reeman b́en rliiladx ree Jesucrist, b́en zoj b́ ree niz ni guial ma rliiladx ree b́en ad najt ree b́en Israel xtiidx Dios. Abi' graczi b́en ma rliiladx Jesucrist niz ni, dád babaa reeman chi biguiejn reeman zian.

⁴Chi bidxin Pab con Bernab́e Jerusaĺen, dxel baca' ree b́en rliiladx Jesucrist laa reeman, con ree apóstoles, con ree bengol rniabee loj ree b́en rliiladx Jesucrist. Abi' be ree Pab diidx con Bernab́e gra ni been Dios con laa reeman. ⁵Per yu' ree b́enfarisew ma rliiladx Jesucrist, guzuli reeman abi' ŕeb reeman:

—B́en ad najt ree b́en Israel abi' ma rliiladx reeman Jesucrist, ŕujn naguiejn chu' reeman sen ru ree b́en Israel, gagbee t́eé reeman guial rayal chinal reeman xley Moisejs.

⁶Dxel bado'p ree xi apóstoles Jeśus con ree bengol rniabee loj ree b́en rliiladx Jesucrist din guidoon xhienaag ǵuun reeman. ⁷Guial tant canee reeman por zian, dxel guzuli B́ed, ŕebaman loj reeman:

—Gradi compniar raliduladx ree Jesucrist, ĺejt ragbee guial diizd gocli gulej Dios naj lojdi din chignen xtiidxza'c Jesucrist loj ree b́en ad najt b́en Israel din chililadx reeman laaman. ⁸Abi' Dios b́en núnbee luxdoo graczi ree bejn, balúüman guial naj reeman xbejnman guial ma badééd xSprijtaman loj reeman zi'cgajc baneeman du loj ree. ⁹Zi'c ruguiaa Dios dunuj ree ziangajc ruguiaaman laa reeman, din zi'c basiaman du luxdoo ree ziangajc basiaman luxdoo reeman guial ma rliiladx reeman Jesucrist. ¹⁰Yan, ¿chexc zeel ad ridxga'tidi ni ma been Dios abi'za rniabeedi chinal ree b́en rliiladx Jesucrist ley ni ni'qui dunuj ree ni'qui dux b́engulal ree ad gojct naguieen ree zi'c rniabee ley guin? ¹¹Dunuj ree rayagbee guial por ni zagdxe ni been Dad Jesucrist, been Dios dux tol ree perdon zi'cgajc laa reeman.

¹²Dxel bacwééz ro' gra reeman abi' bacaagdiajg reeman ni cayü ree Bernab́e con Pab, xcwent gra ree xmilagr Dios ni been reeman loj ree b́en ad najt b́en Israel. ¹³Chi gulox gunee reeman, dxel ńegajc Jacob ŕeb:

—Gradi compniar raliduladx ree Jesucrist, gol bacaagdiajg: ¹⁴Simón Béd be diidx duloj ree xhienaag guzuloj gulej Dios bèn ad najt ree bèn Israel din gac reeman xbejnman. ¹⁵Gra ni ma gojc naj zi'c ni bacaa ree bèn badëë xtiidx Dios loj ree bejn loj xtiidxaman lod rëb:

¹⁶Chi ma gojc zian, yayünxhiey ree da bejnan mazri zi'c goc chi naban Davi, gacxhiey reeman por ree bèn sta naban, zi'c guban ree bejn xtiamp Davi abi' por laa reeman yayajcxhiey ree da bejnan.

¹⁷Din yaguiil ree los demazri ree bejn guial guiën reeman naj, gra ree bèn nacion ren, yaguiil guial guiën reeman naj, bèn ma gule reen din gac reeman da bejnan, bèn guiguiejn ree guza't ree bejn naj.

¹⁸Zian na Dios, bèn cugojn bejn ree gra ree nine diizd tiamp gulal.

¹⁹'Zeel naladxan ad rayalt chu güün naguiejn bèn ad najt ree bèn Israel par chinal reeman ley, laa reeman guial ma basa'n xcostumbr reeman par chinal reeman xnejz Dios. ²⁰Yan con yaxhaal ree tijb gui'ch loj reeman guial ad rayalt gaw reeman ni ragle' loj ni naj xdios reeman, ad rayal tëet sunë reeman ben ren bèn ad najt lacheel reeman, ad rayalt gaw reeman bëel rberejn ni'qui rejn. ²¹Zian yaguie'ch ree loj reeman, din diizd tiamp gulal tijb gaj guiedx yu' bèn rulüü laa reeman xhie rën guiëb xley Moisejs ni rool reeman lën ree yadoo dxej raziiladx ree bejn.

²²Dxel apóstoles guin ree con ree bengol rniabee loj ree bèn rliadx Jesucrist, con los demazri ree bèn rliadx Jesucrist, rëb reeman gucaabee reeman bèn guixhiaalnë reeman Pab con Bernabé din che reeman Antioquía. Abi' bacaabee reeman Judas, bèn la gajc Barsabás, në Silas, laa reeman rajp guialrniabee loj ree bèn rliadx Jesucrist. ²³Abi' guxhaalnë reeman laa reeman tijb gui'ch ni rëb:

“Dunujn nayajcan xi apóstoles Jesús, con ree bengol rniabee loj ree bèn rliadx laaman, në los demazri ree bèn rliadx laaman. Ragajpdiozan lëjt bèn ad najt ree bèn Israel, per nayajc ree compniar raliduladx ree Jesucrist, lëjt zojbidi Antioquía, në los demazri ree bèn zojb ree niz Siria nëtëë niz Cilicia.

²⁴Ma bayagbeen guial yu' ree bèn duladxan brii sin dux tiidxbeen, abi' cagu'nawëëg reeman lëjt con xtiidx reeman persi ad radxejlt xhie güüнди guial na reeman lojdi rayal chu'di sen ni ru ree bèn Israel güün tëedi zi'c rniabee xley Moisejs, per ad dunujtan baxhaal laa reeman.

²⁵Zeel bado'pan abi' raguie'chan guial zagdx ree naj yacaabee bëlzi dux compniaran din guidganaj reeman lëjt, guidnë tëë reeman tio'p dux compniaran, Bernabé con Pab, bèn rayën da'tan. ²⁶Zien ree ni guijdx cuchaagloj reeman guial cayüjn reeman sirv loj Dad Jesucrist.

²⁷Dxel cayxhaalnë'n laa reeman Judas con Silas, laa reeman na lojdi gra con quijb xtiidx reeman. ²⁸Abi' zi'c naj xgab bazaladx xSprijt Dios du lojn, dxel achetri naguiejn rüjn yanabeen lëjt ni güüнди, ni rayalzi

cu'guijquidi naj guial, ²⁹ad gawidi xbëel ree be ni rbe'c ree bejn loj ni naj xdios reeman, ad gaw tëëdi bëel rberejn, ni'qui rejn, ad sunëdi ben ren bën ad najt lacheelidi. Bal gapidi cudad ad züjntidi gra ree nine, zagdxequi güüindi. Gagnë Dios lëjt.”

³⁰Zian gojcan, gui'ch guin naj ni guxhaalnë reeman guidap ree bën guin par luguiedx Antioquía. Ni bato'p reeman bën rliladx ree Jesucrist abi' bayü reeman gui'ch guin loj reeman. ³¹Chi biil reeman laan, dád nix guyu luxdoo reeman por ree diidx zagdxe ni zëed lojn. ³²Abi' Judas con Silas guial nëgajc reeman rajp quiarguejn par gudëed reeman xtiidx Dios, dxel zien naj ni guneenë reeman bën rliladx ree Jesucrist, bagu' reeman luxdoo reeman con xtiidx reeman. ³³Chi ma gudëd zien dxej za' ree Judas con Silas ni, bazaadiidxnë ree bën rliladx Jesucrist laa reeman din yaguiaj reeman lod za' ree bën guxhaal laa reeman, rëb reeman loj reeman: “Chignë Dios lëjt zagdxe.” ³⁴Per Silas beenman xgab baya'nman ni mazri. ³⁵Abi' Pab con Bernabé baya'n reeman Antioquía mazri, laa reeman con ree ben ren basnuu balüü reeman gutie'ch tëë reeman xtiidxza'c Jesucrist loj ree bejn ni.

Ni barojp volt brii Pab biglüüman xtiidx Dios guiedx ren ree

³⁶Chi gudëd tio'p choon dxej, dxel rëb Pab loj Bernabé:
—Yo' stijb yugnaj dux compniar ree bën rliladx ree Jesucrist, graczi ree luguiedx lod ma bugtie'ch

xtiidx Dios, din yuquiaa xhienaag za' reeman.

³⁷Bernabé guyën ninë reeman Waj, bën la gajc Marcw. ³⁸Per Pab ad cwëjbt ninë reeman laaman, din chi we reeman niz Panfilia guro'nladxaman laa reeman, ad binëtraman laa reeman. ³⁹Abi' ni'qui tijbaman ni'qui zatijbaman ad baya'nt conform, zianz gula' lasa' reeman. Dxel binë Bernabé Marcw, guyu reeman loj barcw zë reeman yuj la Chipre ni riga' loj nijsdoo, ⁴⁰dxel gulej Pab Silas din chinëman laaman abi' rëb los demazri ree bën rliladx Jesucrist loj reeman guial chinë Dios laa reeman zagdxe. ⁴¹Zianz gudëd reeman niz Siria në niz Cilicia, ragu' reeman luxdoo ree bën rliladx Jesucrist niz ni.

Bine ree Pab con Silas Timoteo

16 Chi bidxin Pab con Silas guiedx Derbe në guiedx Lистра abi' Lистра bidxaagloj reeman tijb bën rliladx Jesucrist, laman Timoteo, xniaaman naj bën Israel, nëman rliladx Jesucrist guiáad xdadaman naj bën grieg. ²Graczi ree bën rliladx Jesucrist, bën zojb ree guiedx Lистра në Iconio ruza't laaman zagdxe. ³Dxel rëb Pab chinëman Timoteo, per yaløj badxe'man laaman sen ni ru ree bën Israel, chitëë xhie guiëb ree bën Israel riga' niz ni, din gra reeman ragbee guial naj xDadaman bën grieg. ⁴Graczi ree guiedx ni gudëd reeman bagojn reeman bën rliladx ree Jesucrist ni rayal güün reeman zi'c ma rëb ree apóstoles, con ree bengol rniabee loj ree bën rliladx laaman Jerusalén. ⁵Zianan

zeel guzudxi'ch ree b́en niz ni loj guialrliladx reeman Jesucrist, abi' guixie guixie gojcxhiey mazri ree b́en rililadx laaman.

Balüüloj tijb b́en Macedonia loj Pab

⁶Chi ma gojc zian ad baslaat xSprijt Jesús nignee reeman xtiidx Dios niz Asia. Dxel gudëdzinejz reeman niz Frigia në niz Galacia ⁷abi' bidxin reeman niz Misia. Ni been reeman xgab nej reeman niz Bitinia, per ad cwëjb gajct xSprijt Dios nej reeman niz ni. ⁸Dxelri gudëdzinejz reeman niz Misia, bidxin reeman guiedx Troas. ⁹Yagaj, guxhinzii guzajc Pab zi'c rulüü cane'xhchaalaman. Baguaaaman tijb xinguaaaw zëed niz Macedonia, za'lix rzajquix liaadx loj Pab, rëbix: —Guda niz Macedonia, taguieen dunujn yudar.

¹⁰Guloxzi baguaa Pab zian, laa baguieen gajcan porvinid din yo'n niz Macedonia guial bayagbeen Diosan naj b́en cabejdx dunujn niz ni par yatie'chan xtiidxza'c Jesucrist.

Bidxin ree Pab con Silas Filipos

¹¹Badxu'n loj barcw luguiedx Troas abi' bio'n naliduu Samotracia. Chi bareguiaal badxinan guiedx Neápolis. ¹²Yagaj badxoon bio'n Filipos, guiedx mazri zobjloj niz Macedonia, per Rom rniabee guiedx zii, ni badxu'n bëlzi ree dxej. ¹³Abi' tijb dxej raziiladx ree bejn, bariin luguiedx guin bio'n tijb ruguiwro', lod rayagbeen rado'p ree b́en Israel par cwedx reeman Dios. Abi' badxu'n baneen xtiidxza'c Jesucrist loj ree

béngunaa bado'p yagaj. ¹⁴Tijb ree béngunaa guin la Lidia, najman b́en Tiatira, ruto'man lajd zagdxe ni culor murad. Diidxli rdxebaman Dios abi' cucaagdiajgaman. Dios guxhal xquiarguiejnman din gucaagdiajgaman zagdxe gra ni rëb Pab. ¹⁵Abi' gurobnijsaman con gra xfamilaman. Dxel gunabaman favor du lojn, naman:

—Bal walidi rililadxidi guial ma rililadxan Jesucrist, gol baya'n lidxan.

Dxel beenman naguiejn baya'nan lidxaman.

¹⁶Dxel tib volt, chi zio'n lod rej ree bejn par cwedx guiniab reeman Dios, badxaaglojn tijb biingunaa, yu' xindxab luxdoom, abi' por xguialrniabee xindxab guin rnieeya'm guiáad ree b́en guzii laam dád zro' milia rüjn reeman gan por dxiin guin. ¹⁷Dxel bidnalim Pab con dunujn, rbidxa'm rëbim:

—B́en guie ree rüjn xchiin Dios yu' xanyabaa, laa reeman gugojn lëjt xhienaag gaquidi perdon.

¹⁸Zien dxej da't beenm zian, xt chi balenya' Pab, dxel bayejcaman rëbaman loj xindxab yu' luxdoom: —Por xguialrniabee Jesucrist, rniabeen lüj din yariil luxdoo biin guie.

Loj hor zii gajc barii xindxab guin luxdoom.

¹⁹Per chi gogbee ree b́en guzii laam guial ad zajctri güünm gan milia par laa reeman, dxel gunaaaz reeman Pab con Silas, binë reeman laa reeman roylay loj guxtis. ²⁰Chi bayü reeman laa reeman loj ree guxtis guin, rëb reeman:

—Xin Israel guie ree rbëë reex wadijl du ladx ree, ²¹abi' rulüü reex

costumbr ree ni ad zatiëëbt ree yaguieen ree ad zajc tëët yaguieen ree, din ben Rom dunuj ree.

²²Dxel wajs gra ree bén guin contr laa reeman, abi' gunabee ree guxtis guin gulëë xab Pab con Silas din quin reeman laa reeman con var. ²³Chi gulox gudijn da't reeman laa reeman, dxel bilu' reeman laa reeman ladxgüiib abi' gunabee reeman bén rajp ro' ladxgüiib guin din gapdxi'chaman laa reeman. ²⁴Chi biguiejn bén rajp ro' ladxgüiib guin zian, dxel bilu'man laa reeman xt lën cuart bigra yu' lën ladxgüiib guin, guxhiiman guia' reeman loj tabl naal con caden.

²⁵Per garol guiaal, la'tgaj cabejdx canab Pab con Silas Dios, cayool tëë reeman cant par laaman, dxel cucaagdiajg los demazri ree bén yu' ladxgüiib guin. ²⁶Dxel tijbzi golp guzuloj xudoxh, niz ni niz guie rurlia xcimiant ladxgüiib guin. Loj hor zii gajc bixal gra ree xportan abi' baxiec ree caden naxii gra ree bén yu' lënan. ²⁷Chi baban bén rajp ro' ladxgüiib guin abi' baguiaaman zojbyal gra ree xportan, gulëë xi espadaman din nugüjt laagajcaman guial gunaladxaman gra ree bén yu' ladxgüiib guin ma baxüün. ²⁸Dxel gurixdiaj Pab, rëbaman lojman:

—Ad güünnaa lüj gajc, laa dugran nadxu' guie.

²⁹Laa gunab gajc bén guin tijb guij, dxel ruxüünman guyuman, rnijman guial rdxebaman, bigzuxibaman loj Pab në loj Silas. ³⁰Dxel babëëman laa reeman, gunabdiidxaman loj reeman, rëbaman:

—Dad, gol guna, ÷xhie royal günan dín güün Dios naj perdon?

³¹Badxi' reeman laan, rëb reeman:

—Bililadx Dad Jesucrist, zian gaquil perdon con xfamilil.

³²Abi' be reeman xtiidx Dios lojman con loj gra ree bén zojb lidxaman. ³³Zianz guxhin zii gajc gudiibaman lod nadxeelguijdx reeman, dxel gurobnijsaman con gra xfamilaman. ³⁴Abi' bignëman laa reeman lidxaman, dxel badëëman ni gudaw reeman. Guiáad laaman dád nix yu' luxdooman con gra xfamilaman Guial ma rliladx reeman Dios.

³⁵Chi bareguiaal, guxhaal ree guxtis guin suldad ree persi biguiedx reeman loj bén rajp ro' ladxgüiib guin guial guslaaman Pab con Silas. ³⁶Abi' rëb bén rajp ro' ladxgüiib guin loj Pab:

—Ma na ree guxtis guial guslaan lëjt. Yan ma zajc yaguiajdi ad chu'di xgab.

³⁷Per rëb Pab loj ree suldad guin:

—Nayajcan quijb ben Rom abi' gudijn reeman dunujn delant loj ree bén guiedx, ni'quid baneet reeman mod nadëëdan cwent loj reeman con badxe' reeman dunujn ladxgüiib. Abi' yan, ¿guslaa reeman dunujn ralan ya? ¡Ad zajctan zian! Gui't quijb laa reeman guidgalëë reeman dunujn.

³⁸Abi' bicojn ree suldad guin guxtis guin ree zian, dxel dád bidxeb reeman chi biguiejn reeman guial ben Rom naj Pab con Silas.

³⁹Dxel wej reeman bignab reeman perdon loj Pab con Silas babëë tëë reeman laa reeman, rëb reeman loj reeman din yaza reeman luguiedx guin. ⁴⁰Chi barii reeman ladxgüiib,

wej reeman lidx Lidia. Zianz chi gulox guneenē reeman los demazri ree bēn rliadx ree Jesucrist din chu' luxdoo reeman sudxi'ch reeman loj ni rliadx reeman, dxel baza reeman.

Bidxin ree Pab con Silas Tesalónica

17 Chi zē Pab con Silas, gudēd reeman niz Anfípolis nē niz Apolonia zianz bidxin reeman luguiedx Tesalónica lod yu' tijb xyadoo ree bēn Israel. ²Abi' zi'c goc xcostumbr Pab, wejman lēn yadoo guin, choon dxej raziiladx ree bejn. Wejman bigneenēman laa reeman xtiidx Dios. ³Bagojnman balüü tēēman laa reeman loj xtiidx Dios lod rēb guial naj sagdiaj Cristo, abi' chi ma güjtaman yabanman stjib. Rēbaman loj reeman:

—Jesús ruzat gajcan lojdi, laagajcaman naj Cristo din yabēēman dunuj ree loj dol.

⁴Yu' ree bēn Israel guin bililadx abi' bachajg reeman Pab con Silas. Nē zien ree bēn grieg rēn Dios bililadx, nētēē zien ree bēngunaa zobjloj bililadx Jesús. ⁵Per ree bēn Israel ad bililadxt Jesucrist, gudēdloj reeman abi' bato'p reeman benmal ziza ree lunejz persi gulēē reeman wadijl luguiedx guin, abi' guyu reeman lidx Jasón, raguuil reeman Pab con Silas din cwēē reeman laa reeman guzuj reeman laa reeman loj ree bēn guiedx guin. ⁶Per guial ad badxejlt reeman laa reeman yagaj, dxel guxoobyuj reeman Jasón nē ree ben ren bēn rliadx Jesucrist, binē reeman laa reeman loj guxtis, rbixdiaj reeman, rēb reeman:

—Tio'p ree xin cabēē wadijl guidib guidxliuj, ma bi't reex guie, ⁷abi' lidx Jasón zobjb reex. Laa reex con gra ree bēn nuchajg laa reex, ad cayüjnt reex zi'c rniabee xley rey César, din rēb reex guial yu' zatijb rey la Jesús.

⁸Chi biguiejn ree guxtis guin zian con ree bejn, gra loj xgab been reeman. ⁹Per Jasón con los demazri ree bēn guyu ladxguiib guin gudijx reeman loj ree guxtis guin, dxel baslaa reeman laa reeman.

Bidxin Pab con Silas Berea

¹⁰Guxhinzii gajc, guxhaal ree bēn rliadx Jesucrist Pab con Silas luguiedx Berea. Chi bidxin reeman ni, wej reeman lēn xyadoo ree bēn Israel. ¹¹Mazri benza'c naj ree bēn Israel guin guial loj ree bēn Israel zobjb Tesalónica. Con gan bacaagdiajg reeman ni rēb Pab. Abi' guixie guixie rusiid reeman xtiidx Dios, din gagbee reeman waliqui ni rēb Pab ya. ¹²Zeel dád zien reeman bililadx Jesucrist, nētēē zien bēn grieg bililadx laaman zi'c ree xinguaaaw zi'c ree bēngunaa zobjloj niz ni. ¹³Chi gogbee ree bēn Israel zobjb Tesalónica guial catie'ch Pab xtiidx Dios luguiedx Berea, dxel wej reeman ni bigtiaalguiiw reeman bejn ree din guidxe'ch reeman Pab. ¹⁴Per ree bēn rliadx Jesucrist ad goglaat reeman, laa guxhaal gajc reeman Pab niz ro' nijsdoo. Guíaad Silas con Timoteo baya'n reeman mazri Berea. ¹⁵Abi' ree bēn biglu'nejz Pab, xt Atenas binē reeman laaman. Chi baza reeman ni, bignē reeman xruson Pab din diob che Silas con Timoteo chinal reeman laaman.

Bidxin Pab Atenas

¹⁶La'tgaj cabëz Pab guidxin Silas con Timoteo luguiedx Atenas, guyunayaman guial baguiaaman zien da't ni rajp ree bejn niz ni zi'c dios. ¹⁷Zeel wejman lën xyadoo ree bën Israel bigneenëman laa reeman në los demazri ree bën rën Dios zi'c ree bën Israel, guixie guixie rnieenëman chutëëz bën rdxaaglojman niz galay guiedx guin. ¹⁸Guneenë tëëman garol ree bën zinal ni balüü bën brii laj epicureo, në za garol ree bën estoicos. Abi' yu' reeman rëb:

—¿Xhienin rniee xin guin zeel rniee da'tix?

Yu' tëë reeman rëb:

—Rulüü xtiidx dios ren ree bën ad naguieenbeet ree catie'chix.

Rëb reeman zian guial caneenë Pab laa reeman xtiidxza'c Jesucrist në xcwent guial babanman stijb.

¹⁹Dxel binë reeman Pab tijb luar la Areópago, lod rado'p reeman. Abi' gunabdiidx reeman lojman, rëb reeman:

—¿Zajc nal ya xhie ree nicüb guin zidgalüül niz guie? ²⁰Din rül diidx du lojn ni ad rayagbeetan, zeel rayënan yayagbeen xhie rën guïëban.

²¹Graczi ree bën Atenas, con los demazri ree benzit zojb ni, zianczi za' reeman zian. Ruladx reeman täd reeman dxej, gucaagdiajg reeman o gü reeman ni naj ree nicüb.

²²Dxel guzuli Pab galay reeman lod la Areópago, rëbaman:

—Bën Atenas, por graczi ni ma baguian, ma gogbeen guial dád zien ree xdiosidi. ²³Abi' chi zizaan

ziquian luar lod rbejdxidi xdiosidi, badxejlan tijb luar lod ca ree diidx ni rëb: “Par Dios ad naguieenbeet ree.” Yan, Dios rbejdxidi sin guial ad nünbeetidi laaman, xtiidxaman naj ni zidguien lojdi.

²⁴Dios guin been guidxliuj con graczi ni yu' lojn, laaman rniabee xanyabaa në loj guidxliuj. Ad za'taman lën yadoo ni rüjn ree bejn. ²⁵Ad riaadx tëëtaman chu güün xhienin par laaman, din laaman naj bën razaladx bi nabajnnë' ree, laaman razaladx guialnaban duloj ree në ree ni rayaadx ree.

²⁶Por tijb bejn been Dios din chu' zienloj bejn loj guidxliuj din cwe reeman guidib loj guidxliuj. Abi' ma naj xhie tiamp guiban reeman ban tëë cwe reeman. ²⁷Din yaguiil reeman Dios majsi zi'c chi rgan bejn chi raguiilaman xhienin, zian güün reeman din yadxejlaman. Majsi diidxliczi ad zijtt za'man par gra bejn. ²⁸Din por Dios nabajn ree, por laaman raniib ree radxoo tëë ree, por laaman nadxu' ree loj guidxliuj. Zi'c rëb tëë ree xbénrignia'di, chi rëb reeman: “Dunuj ree nayajc xi'n Dios.” ²⁹Zeel bal nayajc ree xi'n Dios, ad rayalt yaguieen ree xgab guial Dios najnë or, o plajt, o guiaj ya zi'c naj ni rüjn ree bejn zi'c naj xixgab reeman. ³⁰Tiamp gulal cwëjb Dios been ree bejn zi'c naladx reeman guial achetczi ragbee reeman, per yan gra ladczi canabeeman gra ree bejn din yayüjn reeman xgab por xtol reeman. ³¹Din Dios ma gulej tijb dxej ni yadëed ree bejn cwent lojman, dxej ni güün xguialguxtisaman. Ma gulej

tëeman Jesucrist din güünman guialguxtis guin, abi' din guiguien guial gulejman laaman par zian, basbanman laaman chi gütaman.

³²Chi biguiejn reeman rëb Pab guial baban Jesucrist loj ree bengüt, yu' reeman baze' laaman, yu' tëë reeman rëb:

—iZatijb dxej yasnuu yacaagdiajgan ni canal!

³³Dxel baza Pab lod za' reeman.

³⁴Per yu' reeman bachajg laaman, abi' bililadx reeman xtiidx Dios. Loj reeman no'ch tijb bën zobjloj lën Areópago laman Dionisio, në stijb búngunaa la Dámaris në ree ben ren.

Bidxin Pab Corinto

18 Dxel brii Pab Atenas zëman Corinto. ²Yagaj bidxaaglojman tijb bën Ponto laman Aquila, zëëdaman diaa Israel. Aquila con xbéngunaaman Priscila qui bazari reeman niz Italia guial gunabee rey Claudio yarii gra ree bën Israel Rom. Dxel wej Pab bitixlojman laa reeman. ³Abi' guial lasa'gajc dxiin ni rijnman rijn reeman, rijnchaaw reeman guid ni rajc ree carp, dxel baya'nnëman laa reeman persi been reeman dxiin guin. ⁴Abi' beegaj dxej raziiladx ree bën Israel, rej Pab rigneeman xtiidx Dios lën xyadoo ree bën Israel, zi'c ree bën naj ree bën Israel zi'c ree bën ad najt bën Israel raguuilaman mod din chililadx reeman ni rëbaman.

⁵Chi baza ree Silas con Timoteo niz Macedonia, bidxin reeman Corinto, dxel achetri ni ren been Pab, ganaxzi xtiidx Dios guneeaman

loj ree bejn, balüü tëëman bën Israel ree guial Jesús naj Cristo bën cabëz reeman. ⁶Per guzuloj bidxe'ch reeman Pab abi' gunee reeman diidxguijdx contr laaman. Dxel gudxiyp xabaman zi'c tijb sen guial ad ruzoobt reeman diidx, abi' rëbaman loj reeman:

—Lëjt gajc rajp dol guial guizëëbidi delant loj Dios, ad najt ra'p dol. Diizd yan chiguien xtiidx Dios loj ree bën ad najt bën Israel.

⁷Dxel bariiman lën yadoo guin wejman lidx bën la Justo, rën bën zii Dios, gajxh gajc yadoo guin naj lidxaman. ⁸Abi' Crispo, tijb bën rniabee lën xyadoo ree bën Israel, bililadxaman Dad Jesucrist con gra xfamilaman. Në zien ree bën Corinto bililadx chi biguiejn reeman xtiidx Jesucrist abi' guobnijs reeman. ⁹Tijb guixin balüüloj Dios loj Pab, rëbaman lojman:

—Ad rdxebil, basnuu gunee da diidxan, ad gucwëëzil, ¹⁰naj za'në' lüj, achutczí zajc güün lüj xhienin, din luguiedx guie zien da't bejn naj par naj.

¹¹Zianan zeel baya'n Pab Corinto tibijz garol, balüüman bën guin ree xtiidx Dios.

¹²Per chi goc Galión gobernador Acaya, bën Israel ree bachajg lasa' reeman persi gunaaz reeman Pab binë reeman laaman loj gobernador guin, ¹³rëb reeman loj gobernador guin:

—Xin guie ziza cayüjnx gan bejn ree guial guiën reeman Dios zi'c tijb mod ni ad najt loj ley.

¹⁴Ma niniee Pab, chi gunee Galión rëbaman loj ree bën Israel guin:

—Bal niajcan tijb falt o tijb guialquia narooob beenman zeel zidnēdi laaman, züncwentan lējt. ¹⁵Per najn por ree diidx në por laj ree bejn nētēē por xleydi, zeel lējt gajc gol gunaj xhienaag güüindi, ad rēntan günan guialguxtis xcwent ree ni guin.

¹⁶Abi' laa babēē gajcaman laa reeman roylay guin. ¹⁷Dxel yagaj gajc gunaaz gra reeman Sóstenes, bēn rniabee lēn xyadoo ree bēn Israel abi' gudijn reeman laaman, per ni'quid beencwēntt gobernador guin laa reeman.

Badxin Pab Antioquía

¹⁸Zienri ree dxej baya'n Pab Corinto. Dxel bazaadiidx nëman los demazri ree bēn rliladx Jesucrist, abi' bazanēman Priscila con Aquila, guyu reeman loj barcw zē reeman niz Siria. Per chi gad reeman grii Cencrea bagaj guiyc Pab, por tijb promeys ni beenman. ¹⁹Chi bidxin reeman Éfeso, ni basa'n Pab Priscila con Aquila, abi' wejman lēn xyadoo ree bēn Israel zojb ree ni, bigneenēman bēn Israel rado'p ree lēn yadoo guin. ²⁰Abi' guyēn reeman niaglaa Pab ni mazri, per ad cwējbtaman. ²¹Rēbaman loj reeman:

—Ma yaya'n, bal gagnē Dios naj, guidganan lējt stijb.

Dxel guyuman loj barcw bazaman Éfeso. ²²Chi bidxinman Cesarea, dxel wejman Jerusalén bicajpdiozaman bēn rliladx ree Jesucrist, dxelri zēman Antioquía.

²³Chi ma gojc xchej za'man Antioquía, dxel briiman zatijb. Wejman tijb gaj ree guiedx riga'

niz Galacia në niz Frigia, ragu'man luxdoo gra ree bēn rliladx Jesucrist.

Gutie'ch Apolos xtiidx Dios Éfeso

²⁴Tiamp zii bidxin tijb bēn Israel luguiedx Éfeso, laman Apolos, gojlaman Alejandría. Dád radxejlaman diidx par guinieeman abi' dád rajcaman xtiidx Dios. ²⁵Basiidaman xtiidx Dios, dxel con gan balüüman bejn ree, zagdxē tēē rüman xtiidx Jesús loj reeman, majsi ad ragbeetaman par xhieri mazri rirobnijs bejn, tijbzi xcwent xguial waroobnijs Waj ragbeeman. ²⁶Abi' Apolos, sin guialrdxeb guzuloj caneeman xtiidx Dios loj ree bēn Israel lēn xyadoo reeman, zianz chi bigueijn Priscila con Aquila ni rēbaman, dxel bignē reeman laaman lidx reeman. Ni balüü reeman laaman persi basnuu basiidaman mazri xtiidx Dios. ²⁷Chi been Apolos xgab cheman niz Acaya, gra ree bēn rliladx Jesucrist bēn za'nē laaman, badxe' reeman luxdoo din cheman, abi' guxhaal reeman tijb gui'ch loj ree bēn rliladx Jesucrist bēn zojb ree niz Acaya din yaca' reeman laaman zagdxē chi guidxinman niz ni. Chi bidxinman niz Acaya dád beenman yudar bēn ma rliladx ree Jesucrist guial gognē Dios laa reeman. ²⁸Din delant loj gra ree bejn rēbaman guial ad laat zē ree bēn Israel, abi' achutdzi gojc nadxi' xtiidxaman guial graczi ni rēbaman naj diidxli, balüü tēēman loj xtiidx Dios gra luar lod rēb guial Jesús naj Cristo bēn gulējz reeman.

Bidxin Pab Éfeso

19 La'tgaj za' Apolos Corinto, wej Pab guiedx riga' ree niz

ruguia', abi' bidxinman Éfeso, yagaj bidxaaglojman bëlzi ree bën rliladx Jesucrist. ²Abi' gunabdiidxaman loj reeman rëbaman:

—¿Guyu xSprijt Dios luxdoodi ya chi bililadxidi?

Badxi' reeman laan rëb reeman:

—Ni'quid waguiejntan guial yu' xSprijt Dios.

³Dxel rëb Pab loj reeman:

—¿Xhieza naag gurobnijsidi?

Badxi' reeman laan rëb reeman:

—Barobnijsan zi'c balüü Waj bejn ree.

⁴Dxel rëb Pab loj reeman:

—Walican baroobnijs Waj

bejn, bën bayüjn ree xgab por xtol reeman. Per rëbaman guial rayal chililadx reeman bën zëed xijchaman abi' laaman naj Jesús, bën naj gajc Cristo.

⁵Chi biguiejn reeman zian, dxel gurobnijs reeman por Dad Jesús.

⁶Abi' chi guxhoob yaa Pab guijc reeman, dxel guyu xSprijt Dios luxdoo reeman, zianz guzuloj canee reeman diidx ren ree. Dxel guzuloj cudëed reeman xtiidx Dios loj ree bejn. ⁷Loj gra reeman naj cost chiptio'p xinguaaw.

⁸Choon bëew wej Pab lën xyadoo ree bën Israel zojb ni. Sin guialrdxeb guneenëman laa reeman xtiidx Dios, guneenëman laa reeman abi' beenman naguiejn din güünman gan chililadx reeman xhienaag naj xguialrniabee Dios.

⁹Per garol reeman gojc nad ad guyënt reeman nililadx reeman, al guzuloj gunee reeman diidxguijdx por xtiidx Jesucrist delant loj ree bejn. Dxel bariica Pab loj reeman con ree bën ma rliladx Jesucrist,

binëman laa reeman lën tijb xzcuel bën la Tiranno. Ni balüüman laa reeman guixie guixie, ¹⁰loj tio'p ijz beenman zian. Abi' graczi ree bën zojb niz Asia, zi'c ree bën Israel zi'c ree bën ad najt bën Israel, bacaagdiagj reeman xtiidx Dad Jesucrist. ¹¹Abi' por xguialrniabee Dios been Pab milagr narooob ree, ¹²xt ree xbay Pab në ree lajd rtia lojman zi'c lantar rignë reeman loj ree bënragxuu, abi' rayajc reeman guialguijdx ni rajc reeman, rarii tëe ree xindxab yu' luxdoo reeman.

¹³Per guyu bëlzi ree bën Israel ziza rabëe reeman xindxab luxdoo ree bejn, abi' guyën reeman nüjnnë reeman dxiin laj Dad Jesucrist dxel rëb reeman loj ree xindxab guin:

—iPor Jesús bën ruza't Pab, rniabeen lëjt, gol barii!

¹⁴Zian naj ni been gajdx ree xi'ngaan tijb bën Israel la Esceva, bën goc tijb bixhioz rniabee ree bixhioz. ¹⁵Per tib volt tijb ree xindxab guin badxi' xtiidx reeman rëbaman:

—Nünbeen Jesús ragbee tëen chunin naj Pab, per lëjt ni'quid nünbeetan lëjt.

¹⁶Abi' bën yu' xindxab guin luxdoo guzuloj caguinman laa reeman, con gojl ni yu'man beenman laa reeman gan. Dád gudijnman laa reeman abi' baxüün reeman barii reeman lënü guin, ziladzi reeman nadxeelguijdx tëe reeman. ¹⁷Graczi ree bën zojb Éfeso, zi'c ree bën Israel zi'c ree bën ad najt bën Israel, gogbee reeman gojc zian, dxel dád bidxeb reeman abi' baza't reeman Dad Jesús zagdx.

¹⁸Në zien ree bën rliladx Jesucrist bidxin abi' delant loj gra ree bejn

baneero' reeman gra ni mal ma been reeman. ¹⁹Nētēē zien ree bēn been guialbidxaa bidxinnē xlibr reeman abi' baze'c reeman laa reen delant loj gra ree bejn. Chi babēē reeman cwent plac lasajc ree libr guin dxel cost tū'pchii mil milia plajt lasajc reen. ²⁰Abi' zian bire'ch xtiidx Jesucrist biguien tēē xguialrniabeeman.

²¹Chi ma gudēd gojc zian, been Pab xgab cheman niz Macedonia nē niz Acaya xt yadxinman Jerusalén. Rēb tēēman guial chi ma wejman Jerusalén dxelri cheman nē Rom. ²²Abi' guxhaalaman tio'p bēn rüjn laaman yudar, Timoteo con Erasto, persi wej reeman niz Macedonia la'tgaj baya'nman mazri niz Asia.

Gojc nadxeb Éfeso

²³Lēn ree dxej zii been ree bēn Éfeso nadxeb por xtiidx Jesús.

²⁴Din Demetrio, bēn rüjn ree ni plajt, rüjnman figur plajt ni naj ree form xyadoo dios la Diana, ragbeeman guial dád rüjnman gan con ree bēn rüjnnēman dxiin.

²⁵Dxel bato'paman laa reeman con ree ben ren bēn rüjn gajc ree lasa' dxiin guin, abi' rēbaman loj reeman:

—Gol bacaagdiajg, lējt ragbee guial loj dxiin guie raguieen ree gan milia ro'. ²⁶Per yan lējt ruguiaa ríguiejn tēēdi, Pab ziza cayēbix guial dios ni rüjn ree bejn ad diost reen. Abi' zian cayujnx gan caliladx zien ree bejn laax, ad tijbtizi luguiedx guie, nē guidib niz Asia.

²⁷Dxel nadxeb yasēēb dux chiin ree, abi' ad tijbtizi dux chiin ree, nē xyadoo dios Diana ad zayagbeetri

ree bejn laan zi'c nūnbee reeman laan yan abi' achutri guidxga' xguialrniabee dios Diana, bēn rēn ree bejn guidib niz Asia nē guidib loj guidxliuj.

²⁸Chi biguiejn reeman zian, bidxe'ch reeman abi' gurixdiaj reeman rēb reeman:

—iBēn zojbloj naj Diana, xdios ree bēn Éfeso!

²⁹Abi' gurixdiaj ree bēn guiedx guin wajs reeman, gunaaaz reeman tio'p ree bēn Macedonia, Gayo nē Aristarco, bēn rzanē ree Pab. Dxel guxoobyuj reeman laa reeman, binē reeman laa reeman lod rajc xgabilt ree bēn guiedx. ³⁰Guyēn Pab niuman yagaj din ninieenēman bejn ree, per ad cwējbt ree xcompniaraman, bēn ma rlliladx ree Jesucrist. ³¹Nētēē loj ree guxtis Asia guin no'ch bēlzi ree xmiw Pab, laa reeman guxhaal ruson lojman guial mejorli ad chu'man ni. ³²Zianz gurixdiaj ree bēn guin rēb reeman ni rent ni ren, been reeman nadxeb abi' zien reeman ni'quid ragbeet par xhie bado'p reeman yagaj. ³³Dxel galay ben zien guin babēē ree bēn Israel tijb xcompniar reeman bēn la Lejandr din guinieenēman bēn guin ree. Dxel beenman sen loj ree bēn guin din yacwēēz ro' reeman din guinieeman por ree bēn Israel delant loj ree bēn guiedx guin. ³⁴Per chi gogbee reeman guial najman bēn Israel, tiblazujzi gurixdiaj reeman cost tio'p hor, rēb reeman:

—iBēn zojbloj naj Diana, xdios ree bēn Éfeso!

³⁵Dxel chi been squiarban luguiedx guin gan bacwēēz ro' reeman, dxel rēbaman:

—Bén Éfeso, gra bénguidxliuj ragbee guial luguiedx guie zianczi rniaj ree bejn xyadoo dios Diana abi' rën tēē ree bejn dios Diana biajb xanyabaa. ³⁶Lējt ragbee guial laan naj ni diidxli, zeel ad rayalt güüindi zian, ad gontzi güüindi xhienin sin xgab. ³⁷Din Bén bidnēdi achet ni mal been reeman yadoo guin, ad wanee tēēt reeman diidxguijdx dux dios ree. ³⁸Bal Demetrio con ree xcompniaraman Bén rüjnnēman dxiin rajp reeman wadijl con ree ben ren, laa roylay naj, laa ree guxtis yu', ni che reeman chitawquia reeman. ³⁹Per bal xhieri mazri rēndi, chi gac xgabilt Bén guiedx dxel gacan reglad. ⁴⁰Yan, por ni ma gojc, nadxeb na gobiarn guial dunuj ree caylu' ree bejn diidx din güün reeman wadijl guin, 'abi' xhieza yaguie'ch ree loj reeman bal guiniabdiidx reeman duloj ree xcwent ree ni cayajc?

⁴¹Chi gulox rēbaman zian, dxel bare'ch reeman.

Wej Pab Macedonia nē Grecia

20 Chi babedxe ree Bén Éfeso, gurejdx Pab Bén rliadx ree Jesucrist persi bagu'man luxdoo reeman. Dxelri bazaadiidxnēman laa reeman abi' zēman niz Macedonia. ²Bitixlojman Bén rliadx ree Jesucrist guidib niz ni, dád bagu'man luxdoo reeman con xtiidxaman, dxelri bidxinman Grecia ³lod guzuman choon bēēw. Ma niuman loj barcw din niejman Siria, chi gogbeeman guial nuyēn ree Bén Israel nūjn reeman laaman xhienin. Dxel mejorli beenman

xgab bayejcaman niz Macedonia. ⁴Binēman Sópater, Bén Berea, xi'ngaán Pirro, nē Aristarco con Segundo, Bén Tesalónica ree, nētēē Gayo, Bén Derbe, con Timoteo, nē Tíquico con Trófimo, Bén niz Asia ree. ⁵Gra reeman guned abi' gulējz reeman Pab con naj Lujc guiedx Troas. ⁶Guiáad dunujn chi gudēd lanij ni raw ree Bén Israel guiadxtil ni ad yu't levadur, dxel badxu'n loj barcw badxoon Filipos, abi' ni goc gaay dxej badxinan guiedx Troas lod za' reeman. Ni badxu'n gajdx dxej.

Basban Pab Eutico

⁷Chi bidxin chidumingw, badxajg du lasa'n din yadaawan guiadxtil tijbzi, abi' guial mal been Pab xgab guial yareguiaal griiman, chi bidxin garol guiaal sta caneenēman bejn ree, ⁸guiáad lēnū ladya lod rado'pan dád zien ree guij re'c. ⁹Tijb xinguiag zojb ro' ventan lax Eutico. Guial xchej da't guneenē Pab laa reeman, dxel xt garej gunaaz bacaal xin guin, abi' gudidya'x diidz yu bayon guin xt luyuj, ma güjtix chi bales reeman laax. ¹⁰Dxel biguiajt Pab lod naga'x, bazuxibaman abi' gudiidxaman laax, dxel rēbaman loj reeman:

—Ad rdxebidi, nabanquix.

¹¹Dxel bayē'p Pab zatijb, gula'man guiadxtil abi' gudaw reeman, dxel basnuu guneenēman laa reeman xt bareguiaal. Chi bareguiaal bayunejzaman ziaman. ¹²Abi' xin gudidya' ro' ventan guin, nabanx zignē reeman laax, dxel dád nix yu' luxdoo reeman.

Wej Pab Mileto

¹³Dxel dunujn badxu'n loj barcw baneedan bio'n par luguiedx Asón, lod baya'nan diidx yaca'n Pab, din beenman xgab niej guia'man ni. ¹⁴Chi badxajg du lasa'n con laaman luguiedx Asón, dxel badxu'në'n laaman loj barcw bio'n lod la Mitilene. ¹⁵Ni badxoon, chi bareguiaal badüüdan niz lod la Quío. Chi bareguiaal stijb badxinan lod la Samos. Dxel chi bareguiaal stijb badxinan Mileto, per chi gad yagaj guidxin badxu'dxen lod la Trogilio. ¹⁶Been Pab xgab ad zejteman Éfeso, ad guyëntaman niaglaaman niz Asia guial nuyënman diob nadxinman Jerusalén, din xixgabaman naj guial bal zajc yadxinman lanij Pentecostés.

Bazaadiidxnë Pab bejn ree Mileto

¹⁷Chi nadxu'n Mileto, gunabee Pab bi't ree bën rniabee loj ree bën rliladx Jesucrist, bën zojb ree Éfeso. ¹⁸Chi bidxin reeman dxel rëbaman loj reeman:

—Diisd dxej yaloy ni bialan niz Asia xt yan, lëjt ragbee xhienaag cayünan. ¹⁹Loj guidib tiamp ni za'në'n lëjt cayünan sirv Jesucrist con pasens, majsi xt ronan abi' gra loj guialzi ma gudëëdan por ni rën ree bën Israel güünnë reeman naj. ²⁰Per majsi zian ad bacwëëzt rnin lojdi ni naj ni zagdxe par lëjt, tant delant loj ree bejn në lidxidi balün lëjt. ²¹Abi' zi'c ree bën Israel në ree bën ad najt bën Israel, ma rën loj reeman din yayüjn reeman xgab por xtol reeman yadxi' tëë

loj reeman loj Dios chililadx tëë reeman Dad Jesucrist. ²²Yan ma yaya'n Jerusalén lod caxhaal xSprijt Dios naj, ad ragbeetan xhie cabëz naj ni. ²³Tijbzi ni ragbeen naj guial guidib lod ran rugojn xSprijt Dios naj guial ladxgüiib në zro' da't guialzi naj ni cabëz naj. ²⁴Per par naj achet güünan por zian, majsi guiëtan per con nix yu' luxdon cayünan ni rayal günan xt lod gactizan, gün tëën mandad ni banee Dad Jesús naj guial gatiechan xtiidxza'caman xhienaag rën Dios dunuj ree.

²⁵'Yan naj ragbee guial ni'qui tijbidi bën ma ben diidx loj xhienaag naj xguialrniabee Dios, ad zuguaatrudi naj. ²⁶Zeel ganin lojdi yan guial ad achetri dol ra'pan bal id nabandi xnejz. ²⁷Din ma bagojnan lëjt gra xhienaag naj xixgab Dios acheteci baquiechan. ²⁸Yan, gol gojp lëjt gajc, gol gojp tëë ree bën rliladx Jesucrist, bën ma banee xSprijt Dios lojdi din guiniadi laa reeman zi'c tijb bën rajp xiil ree, din Jesucrist con xrejman ma gudijxaman por xtol reeman. ²⁹Naj ragbee guial chi yazaan gui't ree ben ren zi'c gajczi rtie'ch cuyojt xiil ree, zian naj xixgab reeman güünnë reeman bën rliladx ree Jesucrist. ³⁰Loj gajquidi grii ree bën gülüü ganax ni rusquiee, din güün reeman gan güüncwent ree bën rliladx Jesucrist xtiidx reeman luar güüncwent reeman xtiidx Dios. ³¹Zeel gol guzujsin, gol gojp cudad, gol basaaladx, loj choon ijz ad bacwëëzt gunenë'n lëjt xt ronan banen lëjt consejw.

³²'Yan, compniar raliduladx ree Jesucrist, gusa'nan lëjt con Dios

con xtiidxza'camán. Laan rajp guialrniabee par gagnën lëjt, din gusnuu gagbeedi xhienaag rënman guibandi gunee tēēman lojdi ni ma rēbaman gudēēdamán loj ree bën ma naj xbejnman. ³³Achut xmilia achu tēēt xab rzēēbladxan. ³⁴Lëjt ragbee zagdx guial con quijb yan benan dxiin persi gudawnē'n bën guzu ree con naj. ³⁵Abi' balün lëjt guial zian rayal güün bejn dxiin din güünman yudar bën ryaadx ree xhienin. Gol basaaladx xtiidx Dad Jesús chi rēbaman: “Mazri nix yu' luxdoo bën razaladx guial loj bën rtia'.”

³⁶Chi gulox rēb Pab zian, dxel bazuxibaman gurejdx gunabaman Dios con gra reeman. ³⁷Gra reeman biin, gudiidx reeman Pab abi' gudaw reeman laaman xid. ³⁸Dád guyunaya reeman por ni rēbaman loj reeman guial ad zuguaatri reeman laaman. Dxel biglu'nejz reeman laaman xt lod za' barcw.

Wej Pab Jerusalén

21 Ni basa'nán laa reeman, abi' badxu'n loj barcw bio'n tibli niz Cos, yuj riga' loj nijsdoo. Chi bareguiaal badxinán niz Rodas nēgajcan riga' loj nijsdoo, abi' ni badxoon bio'n guiedx Pátara. ²Ni badxaaglojn tijb barcw ni ma che niz Fenicia zianz badxu'n lojn. ³Chi zio'n dxel dux lad ruvejsan baguaian lod la Chipre, basnuu bio'n niz Siria. Abi' guial naj lat barcw guin luguiedx Tiro dxel badxu'n luguiedx guin. ⁴Ni badxaaglojn bën rliadx ree Jesucrist abi' badxu'nē'n laa reeman gajdx dxej. Bën guin ree

por xSprijt Dios rēb reeman loj Pab guial ad bal cheman Jerusalén. ⁵Per chi baza' gajdx dxej guin, dxel badxoon luguiedx guin, dxel gra reeman con xbéngunaa reeman con xi'n reeman, biglu'nejz reeman dunujn xt ro' nijsdoo. Ro' nijs guin badxu'xiban barejdx banaaban Dios. ⁶Dxel bazaadiidxnē'n laa reeman abi' badxē'pan loj barcw guíaad laa reeman zia lidx reeman.

⁷Chi badxoon luguiedx Tiro bio'n luguiedx Tolemaida, ni gulox dux viajn loj barcw, bio' tēēn bugneenē'n bën zojb ree ni, bën rliadx ree Jesucrist abi' baya'nán con laa reeman tib dxej.

⁸Chi bareguiaal, dunujn con Pab badxoon Tolemaida bio'n Cesarea lod bio'n lidx Felip, bën rtie'ch xtiidx Jesucrist. Felip guin naj tijb ree bën gajdx cwabee din qui's reeman ni rayal tia' ree bēnprob abi' baya'nán lidxaman. ⁹Yu' tajp xi'ndxa'paman biinxtijb ree abi' laa reem rudēēd xtiidx Dios loj ree bejn. ¹⁰Ma gojc zien dxej nadxu'n lidx Felip, chi bi't tijb bën la Agabo nēgajcamán rudēēd xtiidx Dios loj ree bejn, zēēdamán niz Judea. ¹¹Chi bi'tamán cwa'mán xcinch Pab guxhii guía' gajcamán con yaaman, abi' naman:

—XSprijt Dios na guial Jerusalén ze guixhii ree bën Israel bën naj xcinch ni guie, abi' yayü reeman laaman loj ree bën ad najt bën Israel.

¹²Chi baguiejnán zian, dunujn con ree bën rliadx Jesucrist luguiedx guin baguieenán naguiejn loj Pab ad cheman Jerusalén. ¹³Per badxi'mán laan, naman:

—¿Chexc zeel roondi abi' rgu' nayadi naj? Par naj achet güünan majsi guixiin o majsi guiëtan Jerusalén por Dad Jesús.

¹⁴Chi bayagbeen guial ad zaguieentan gan yadxoonan laaman chitëë cheman, achetri baguie'chan lojman, tijbzi ni raguie'chan lojman: —Gac zi'c rniabee Dios.

¹⁵Chi gudëd ree dxej guin dxel baguieenan purvinid bio'n Jerusalén. ¹⁶Bunë'n bëlzi ree bën Cesarea rliladx ree Jesucrist, laa reeman binë dunujn lod baya'nan lidx tijb bën Chipre, ma gojc xchej rliladxaman Jesucrist, laman Mnasón.

Bignaj Pab Jacob

¹⁷Abi' ree bën Jerusalén rliladx Jesucrist dád nix guyu luxdoo reeman baca' reeman dunujn. ¹⁸Chi bareguiaal bunë'n Pab bugnajn Jacob, ni riga' gra ree bën rniabee loj ree bën rliladx Jesucrist. ¹⁹Chi gulox bagajpdiozan laa reeman, dxel bagojn Pab laa reeman tijb gaj ni beenman por xguialrniabee Dios delant loj ree bën ad najt bën Israel. ²⁰Chi biguiejn reeman zian, baza't reeman Dios zagdx, zianz rëb reeman loj Pab:

—Lij ragbee guial entr loj ree bën Israel zien da't reeman ma bililadx Jesucrist, abi' gra reeman rëb guial rijn naguiejn güün bejn zi'c rniabee xley Moisejs. ²¹Ma biguiejn tëë reeman guial lij culüü bën Israel ree, bën ad zojbt ree loj nacion Israel guial ad züjncwentt reeman xley Moisejs, rëb tëël loj reeman guial ad rüjnt naguiejn chu' xi'n reeman sen ru ree bën Israel

ad zinal tëët reeman dux costumbr ree. ²²Yan, ¿xhienaag gac? Laa reeman guchajgczi lasa' reeman chi gagbee reeman guial ma bi'til. ²³Zeel mejorli güünl ze: Yu' tajp ree xin no'ch du lojn xin rayal ree güün cumplid ni cwëb reex loj Dios. ²⁴Binë reex, gol been zi'c rëb loj ley din gaquidi naya, gudijx tëë por laa reex din gac ya guijc reex. Zian gagbee gra bejn guial rijnquil zi'c rniabee ley, guial ad wali tëët ni biguiejn reeman xcwentil. ²⁵Abi' por ree bën ad najt bën Israel, bën ma bililadx ree Jesucrist, ma baxhaalan tijb gui'ch loj reeman zi'c baguieenan xgab guial ad rayalt chu' reeman xgab por xley Moisejs. Per ad rayalt gaw reeman ni rbej loj ni naj ree xdios reeman, ad gaw tëë reeman rejn ni'qui bëël rberejn, ad sunë tëë reeman ben ren bën ad najt lacheel reeman.

Gunaaz ree bën Israel Pab

²⁶Dxel binë Pab guidap ree bën guin, abi' chi bareguiaal been reeman zi'c rniabee ley par gac reeman naya. Dxel guyu reeman lën yadooro' Jerusalén din gugojn reeman goc yayaalox dxej güün reeman zi'c rniabee ley, dxej rayal chinë tijb gaj reeman tijb be guiët zi'c tijb gon par Dios.

²⁷Chi ma yayaalox gajdx dxej ni naj güün reeman zi'c rniabee ley, yu' ree bën Israel zëäd niz Asia, baguiaa reeman Pab lën yadooro' Jerusalén abi' gurixdiaj reeman wajs reeman, gunaaz reeman laaman, ²⁸rëb reeman:

—iBën Israel, gol been yudar! Xin guie naj xin ziza gra lad

caneeguijdxix b́en Israel ree ńe dux yadoo ree, ŕeb t́eex loj ree bejn guial ad ǵüün reeman zi'c rniabee dux ley ree. Abi' ad tijbtzi laan, ńe ma badxe'x b́en ad najt ree b́en Israel ĺen dux yadoo ree ni naj ni nada par dunuj ree ma beenx laan zi'c tijb luar ad ŕujnt sirv.

²⁹Ŕeb reeman zian guial baguiaa reeman Pab zizaman ni con tijb b́en Éfeso b́en la Tróximo, zeel gunaladx reeman biné Pab laaman ĺen yadooro' Jerusalén.

³⁰Dxel been reeman nadxeb guidib luguiedx guin, ruxüün ree bejn bidxin reeman. Abi' gunaaz reeman Pab, guxoobyuj reeman laaman babéë reeman laaman ĺen yadoo guin laa basiaaw gajc reeman port guin ree. ³¹Za mer nugüjt reeman laaman, chi bidxin rusion guin loj suldad rniabee ree suldad guial gra ree b́en Jerusalén cayüjn nadxeb.

³²Laa bato'p gajc suldad rniabee guin xsuldadix ńe za tio'p choon ree suldad rniabee, baxüün reex wej reex lod riga' ree b́en guin. Chi baguiaa ree b́en guin bidxin suldad rniabee guin con ree xsuldadix, dxel bacwéëz gudijn reeman Pab. ³³Dxel gubig suldad rniabee guin, gunaazix Pab gunabeex guxhii reex laaman con tio'p caden. Abi' gunabdiidix chu laaman xhie t́eë beenman. ³⁴Per gurixdiaj reeman ŕeb reeman garent garen, guial rbixdiaj da't reeman achet gojc niagbeex, dxel gunabeex bigné reex Pab lod yu' ree suldad.

³⁵Chi bidxin reex loj ree scliar lod yu' ree suldad guin, gulejn reex Pab guial dád nadoxh ŕujn ree b́en zien nal laa reex, ³⁶abi' gra reeman rbixdiaj, ŕeb reeman:

—iGol bagüjtix!

Gunee Pab loj ree bejn

³⁷Chi ma chu'né reex Pab lod yu' ree suldad guin, gunabdiidxaman loj suldad rniabee guin, ŕebaman: —¿Zajc ganen'́n ĺuj ya?

Badxi' suldad guinan ŕebix: —¿Rajc rnieel diidx grieg ya?

³⁸¿Nid ĺuj naj xin Egipto guzu contr gobiarn ya, abi' laa bigxüün gajquil niz loj yujbidx con tajp mil ree xbejnl, b́en bagüjt ree bejn?

³⁹Dxel ŕeb Pab lojx:

—B́en Israel naj. Goolan luguiedx Tarso tijb ree guiedx zobjloj ni riga' niz Cilicia. Baneesii mod ganen'́n b́en guie ree.

⁴⁰Dxel cwéjb suldad guin, abi' guzuli Pab loj ree scliar guin beenman sen loj ree b́en guin con yaaman din yacwéëz ro' reeman. Chi bacwéëz reeman, dxel guneenëman laa reeman diidx hebreo, ŕebaman:

22 —Léjt bengol ńe los demazridi, gol bacaagdiajg ni ganin por naj.

²Chi biguiejn reeman caneenëman laa reeman diidx hebreo, mazri bacwéëz reeman. Abi' basnuuman ŕebaman loj reeman:

³—B́en Israel naj. Goolan luguiedx Tarso tijb guiedx riga' niz Cilicia, per Jerusalén guie guni'san. Abi' mextr Gamaliel balüü naj gra zi'c naj xley dux b́en gual ree. Guiáad naj guidib luxdon benan

xgab güünan sirv Dios zi'cgajc léjt yan. ⁴Dxel guzunaan b́en rriladx ree Jesucrist, xt bagüjtan laa reeman abi' zi'c ree béngunaa zi'c ree xinguaaw gunaazan badxe'n

ladxguiib. ⁵Bixhioz mazri zojbloj rniabee graczi ree bixhioz në gra ree guxtis Israel ragbee guial najn ni wali. Din laa reeman banee tijb gui'ch par gulün loj du lasa' bën Israel ree, bën zojb ree luguiedx Damasco din chile' yaguilan bën rililadx ree Jesucrist luguiedx guin, ganaaz tëen laa reeman guidnë'n laa reeman Jerusalén din téd reeman casti.

Be Pab diidx xhienaag bililadxaman Jesucrist

(Hch. 9:1-19; 26:12-18)

⁶Per chi za'n lunejz par Damasco, chi ma cadxinan ni cost garol dxej, dxejczy brii tijb guij xanyabaa balaan bacha' guidibczy lod cazaan, ⁷abi' breeyujn. Dxel biguiejnan cha' bën na: “Saulo, Saulo, ¿chexquiza zeel rzunalil naj?” ⁸Abi' gunabdiidxan rën: “¿Chu lüj Dad?” badxi'man laan naman: “Naj naj Jesús, bën Nazaret, bën rzunalil.” ⁹Bën zinë' reen baguiaa reeman bacha' guin abi' bidxeb reeman, per ad bignia't reeman ni na cha' bën gunee naj. ¹⁰Dxel gunabdiidxan rën: “¿Xhie rayal günan Dad?” Abi' na Dad Jesucrist lon: “Bixche, basnuu xnejzil wej Damasco. Ni na reeman gra ni rayal güünl.” ¹¹Abi' guial bascajy bacha' guin lon, dxel bën zinë' reen gunaaz reeman yan, binë reeman naj luguiedx Damasco. ¹²Ni zojb tijb bën la Ananías, rüjnman cumplid gra zi'c rniabee xley Moisejs. Abi' gra ree bën Israel zojb luguiedx Damasco nünbee laaman guial nabanman xnejz. ¹³Ananías guin bidganaj naj, chi bi'taman naman lon: “Saulo, ma

zajc yaguaal stijb.” Loj hor guin gajc baguian stijb abi' baguian laaman. ¹⁴Dxel naman lon: “XDios dux béngulal ree ma bacaabee lüj din gagbeel xhie rënman güünl, abi' guguiaal Jesucrist guien tëël cha'man, bën rüjn zi'c rayal. ¹⁵Din chigneel xtiidxaman loj gra ree bénguidxliuj, gü tëël diidx loj reeman ni baguiaal ni biguiejn tëël. ¹⁶Yan, ad rbëzil mazri, guzuli gurobnijs tëë gurejdx gaj Dad Jesucrist din chisüdaman xtolil.”

Be Pab diidx xhienaag wejman loj ree bën ad najt bën Israel

¹⁷Chi baguialan Jerusalén, wan lën yadooro' persi guredx gunaaban Dios, abi' guza'can zi'c rulüü cane'xhchalan. ¹⁸Baguian Dad Jesús naman: “Baquiejn. Cari barii Jerusalén, din ad züjncwentt reeman ni guiëbil por naj.” ¹⁹Abi' rën lojman: “Dad, laa reeman ragbee guial naj wa gra lën ree yadoo gunaazan bën rililadx ree lüj, badxe'n laa reeman ladxguiib gudin tëen laa reeman. ²⁰Në chi bagüjt reeman Esteban, bën gunee xtiidxil, laagajc naj za' ni rën zagdxe naj guiëtaman abi' xt gunan xab ree bën bagüjt laaman.” ²¹Per na Dad Jesús lon: “Wej, naj gaxhal lüj zijt loj ree bën ad najt bën Israel.”

Badxe' reeman Pab lod yu' ree suldad

²²Xt guintzi naga'loj bacaagdiajg reeman ni rëb Pab dxel guzuloj gurixdiaj reeman rëb reeman: —iAd rayalt guiban xin guin! iGol bagüjtix!
²³Abi' guial cabixdiajz cabixdiaj reeman, ruzaal xab reeman niz

ladia ruzaal tēē reeman yuj niz ladia. ²⁴Dxel gunabee suldad rniabee guin cu' reeman Pab lod yu' ree suldad abi' gunabeex qui'n reex laaman din yaneero'man chexc zeel rbixdiaj ree bēn guin zian contr laaman. ²⁵Per chi guxhii reex Pab din quin reex laaman, rēbaman loj tijb ree suldad rniabee za' ni:

—¿Zajc quindi tijb bēn Rom ya, chi gadidi gagbee xhie beenman?

²⁶Chi biguiejn suldad rniabee guin zian, dxel bicojnx suldad rniabee ree suldad guin, rēbix lojx: —Gojp cudad ni güünnēl xin guin, din xin Roman.

²⁷Dxel wej suldad rniabee guin lod za' Pab, abi' gunabdiidxix lojman rēbix:

—¿Walin ya xin Rom lūj?

Badxi' Paban rēbaman:

—Walican.

²⁸Abi' rēb suldad rniabee guin lojman:

—Naj zro' milia gudixan par gacan xin Rom.

Abi' badxi' Paban rēbaman:

—Per naj diizd goolan najn bēn Rom.

²⁹Chi biguiejn ree suldad niguin Pab, guial bēn Rom najman, laa bisüd gajc reex. Xt nē suldad rniabee guin bixheb chi gogbeex guial ben Rom naj Pab guial gunabeex guxhii reex laaman.

Bazuj reeman Pab loj ree guxtis

³⁰Chi bareguiaal, guyēn suldad rniabee guin niagbeechaawix chexc zeel za' ree bēn Israel contr Pab. Abi' baxhiequix Pab, dxel gunabeex bado'p ree bixhioz rniabee ree bixhioz nē ree guxtis. Abi' babēēx Pab bazujx laaman loj gra reeman.

23 Baguiaa Pab loj ree guxtis guin, abi' rēbaman:

—Compniar Israel, loj guidib ni nabanán xt yan, achet naladxan delant loj Dios din naj ragbee xhienaag nabanán.

²Dxel Ananías, bixhioz mazri zobjloj rniabee graczi ree bixhioz, gunabeeman bēn za' ree gajxh cwē' Pab din ca'p reeman ro'man. ³Per badxi' Paban rēbaman loj bixhioz guin:

—iZiangajc ca'p Dios ro'l, bēn rusquiee! ¿Id zobjil yagaj ya par güünl guialguxtis zi'c rniabee ley? Abi' ¿chexquiza zeel rüjnl zi'c ad rniabeet ley, rniabeel ca'p reeman ro'n?

⁴Abi' ree bēn za' yagaj rēb reeman lojman:

—¿Zian rusaglojl xbixhioz zobjloj Dios ya?

⁵Dxel rēb Pab:

—Gol been perdon, ad gogbeetan guial laaman naj bixhioz mazri zobjloj. Din loj xtiidx Dios rēb: “Ad gusaglojl bēn rniabee ladxil.”

⁶Chi gogbee Pab guial garol reeman naj bēnsaducew za garol reeman naj bēnfarisew, dxel guneeman rejs rēbaman:

—Naj naj bēnfarisew, xi'n bēnfarisew naj. Abi' guial riladxan yaban ree bengüt zeel za' ree bejn contr naj.

⁷Chi rēbaman zian, guzuloj cadildiidx ree bēnfarisew con ree bēnsaducew abi' gojc reeman tio'p lala'. ⁸Din bēnsaducew ree ad riladxt reeman guial yaban ree bengüt, ad riladx tēēt reeman guial yu' ree anjl nē ree sprijt, per ree bēnfarisew riladx reeman gra

ree ni guin. ⁹Abi' been reeman naquie' yagaj. Dxel guzuli bëlzi ree bënfarisew naj mextr rulüü ley, rëb reeman:

—Achet ni mal wayüjn bën guie. Wed tijb sprijt o tijb anjl gunee laaman, gol gojp cudad ad niad contr Diosan nadxu' ree.

¹⁰Chi baguiaa suldad rniabee guin mazri cadildiidx reeman, dxel bidxebix nuroox reeman Pab. Abi' gunabeex bi't ree suldad din yabëë reex laaman galay ree bën guin, chinë tëë reex laaman lod yu' ree suldad stijb.

¹¹Chi gure guiaal stijb, balüüloj Jesucrist loj Pab, rëbaman lojman: —Bagu' luxdool Pab, din zi'c guneel por naj luguiedx Jerusalén guie, ziangajc guinieel por naj luguiedx Rom.

Been reeman xgab gugüjt reeman Pab

¹²Chi bareguiaal, garol ree bën Israel baya'n reeman diidx din gugüjt reeman Pab, rëb tëë reeman guial achet gaw reeman achet tëët guië' reeman xt gugüjt reeman laaman. ¹³Nadëd tiuu naj ree bën rëb zian. ¹⁴Abi' wej reeman bigneenë reeman bixhioz ree bën rniabee ree bixhioz në ree xbengol ree bën Israel, rëb reeman loj reeman:

—Dunujn ma raguie'ch guial achetzi yadaawan xt chi ma bagüjtan Pab. ¹⁵Yan lëjt con gra ree guxtis, gol gunab loj suldad rniabee guin din guidnëx laax lojdi guixie, con gol badxiib guijc guial rëndi gagbeechaawidi xhienaag naj xcwentix. Abi' dunujn ma

yadxu'sinan din yagüjtan laax chi gadix gui't guie.

¹⁶Per xi'ngaan bizan Pab biguiejnx guial cayëb reeman zian, dxel wejx lod yu' ree suldad bicojnx Pab. ¹⁷Zianz gunee Pab tijb ree suldad rniabee guin, rëbaman lojx: —Binësii xin guie loj suldad rniabee din gudëëx tijb ruson lojman.

¹⁸Binë xin suldad guin laax loj suldad rniabee guin, rëbix lojx: —Pab, xin yu' ladxguuib guredx naj abi' gunabix guidnë'n xin guie lojl din guneex tijb ruson lojl.

¹⁹Abi' suldad rniabee guin gunaazix yaa xin guin, binëx laax tibladi, gunabdiidxix lojx rëbix: —¿Xhie rënl nal lon?

²⁰Abi' rëb xin guin lojx: —Bën Israel ree ma baya'n reeman diidx din guiniab reeman lojl guixie din chinël Pab loj ree guxtis, con gudxiib reeman guijc guial rën reeman gagbeechaaw reeman xhienaag naj xcwentaman. ²¹Per ad bal chililadxil laa reeman, din nadëd tiuu naj ree bën cwëz laaman guquie'chloj reeman lunejz, abi' ma rëb reeman guial achet gaw reeman ache tëët guië' reeman xt gugüjt reeman laaman. Yan za'sin reeman cabëz reeman ni guiëbil.

²²Dxel rëb suldad guin loj xin guin:

—Baguiaj. Achu loj guiëbil ni ma nal lon.

Guxhaal reeman Pab loj gobrador Félix

²³Dxel gunee suldad rniabee guin tio'p ree xsuldadix, abi' gunabeex laa reex din güün reex porvinid

tio'p gayuu suldad che guia', nē za gayojnchii ree suldad cwib way, zatio'p gayuu ree suldad tia' lans din che reex Cesarea raca gaa guxhin. ²⁴Abi' gunabee tēex güün reex porvinid way cwib Pab, rēbix loj reex guial guinia reex Pab din guidxinman zagdxē loj gobernador Félix. ²⁵Abi' guxhaalnēx laa reex tijb gui'ch ni rēb:

²⁶“Naj Claudio Lisias, rugajpdiozan lüj gobernador Félix, lüj guial najl bēn zobjloj. ²⁷Bēn Israel ree gunaaz xin guie ma nugüjt reeman laax. Per chi gogbeen guial xin Roman, dxel wan con ree da suldadan buglēn laax loj reeman. ²⁸Abi' guial rēnan gagbeen xhie rüjnx zeel rdxē'ch reeman laax, dxel bazun laax loj ree guxtis Israel. ²⁹Dxel gogbeen guial por xcwent xley reeman zeel rdxē'ch reeman laax, per ad najtan ni rayal guiētix ni'qui guial chu'x ladxguiib. ³⁰Nē guial ma gogbeen guial xixgab ree bēn Israel naj gugüjt reeman laax, zeel cayxhalan laax lojl. Abi' ma rēn loj ree bēn rdxē'ch laax guial con lüj güün reeman reglad ni rajp reeman contr laax. Laanan rugojnan lüj.”

³¹Been ree suldad guin zi'c gunabee suldad rniabee guin abi' guxhin binē reex Pab luguiedx Antípatris. ³²Chi bareguiaal suldad zē ree guia' bayejc reex lod yu' ree suldad, guíad ree suldad dxiib way zinē reex laaman luguiedx Cesarea. ³³Chi bidxin reex Cesarea, badēd reex gui'ch guin loj gobernador guin, bayü tēē reex Pab lojman. ³⁴Chi gulox biil gobernador guin gui'ch guin, gunabdiidxaman

loj Pab ban zaman. Dxel chi gogbeeman guial Cilicia zēēdaman, ³⁵dxel rēbaman lojman:

—Chi gui't ree bēn za' ree contr lüj, dxel gucagdiagan ni nal.

Abi' gunabeeman gap reex Pab lēn xpalas Herodes.

Ni gunee Pab loj gobernador Félix

24 Chi goc gaay dxej, Ananías, bixhioz mazri zobjloj rniabee graczi ree bixhioz, bidxinman Cesarea con tio'p choon ree guxtis Israel nē tijb licenciad laman Tértulo. Abi' wej reeman loj gobernador guin din cwe'c reeman xguialquia Pab. ²Chi bidxinnē reex Pab, guzuloj Tértulo caneeman contr laaman, rēbaman loj gobernador guin:

—Quixtēē lüj dad gobernador, por lüj nadxu'dxen, nē por xguialrajquil zien ree ni rüjn sirv cayajc du ladxan. ³Gra ladczī za' ree bejn conform por gra ni cayüjnl dad gobernador Félix, lüj naj bēn zobjloj, quixtēēczi lüj. ⁴Per chitēē gūnlaan lüj mazri, rniaaban lojl din gucaagdiaguil ni yanan lojl tibrajtoczi. ⁵Dunujn bayagbeen xin guie naj zi'c tijb guialguijdx loj ree bēn Israel, guidibczi guidxliuj zizax rustijlix laa reeman abi' laax rniabee loj tib cwaa ree bēn rniee reeman nazaren. ⁶Abi' guyēn tēēx nūjnx dux yadooro'n zi'c tijb luar ad rüjnt sirv, zeel banaazan laax bayēnan naguieenan guialguxtis zi'c naj dux leyan. ⁷Per laa bi't gajc suldad Lisias con ree xsuldadix, babēēxuu reex laax du lojn. ⁸Abi' rēb suldad rniabee guin guial lojl gui't ree bēn rbe'c xguialquia Pab,

yan lüj gajc zajc guiniabdiidx lojx din gagbeel zagdxe guial walican ni ranan xcwentix.

⁹Abi' ree bén Israel za' ni rëb reeman guial waliqui gra ni guin. ¹⁰Dxel been gobernador guin sen loj Pab din guinieeman, abi' rëb Pab:

—Guial ragbeen diisd gocli rniabeel nacion Israel, zeel ad yu'nawëëgtan yadxi'n ni rudxiib reeman guican. ¹¹Abi' lüj gajc zajc cwe'quil ruson din gagbeel guial qui gojcri chiptio'p dxej badxinan Jerusalén din ganajchi'n Dios.

¹²Abi' achut banaaznë reeman naj cadildiidxnë'n, ni'qui guial gabën wadijl lën yadooro' Jerusalén, ni'qui lën yadoo ren ree ni yu' ree ni, ni'qui luguiedx guin. ¹³Bén guie ree ad zajct na reeman lojl guial ni diidxli naj ni rudxiib reeman guican. ¹⁴Per ni naj diidxli naj guial rliladxan Jesucrist, nejzcüb guin naj ni zinaalan, cayünan sirv loj xDios dux béngulalan, abi' na ree bén guie guial ad xnejzt Diosan, per cayünan zian guial rliladxan gra ni zëed loj ley në ni bacaa ree bén badëed xtiidx Dios loj ree bejn.

¹⁵Abi' zi'cgajc rliladx ree bén guie Dios, ziangajc rliladxan laaman guial yaban ree bengüt stijb, zi'c ree bén goc benza'c në ree bén goc benmal. ¹⁶Zeel rünan naguiejn gabajnan zagdxe chitëë xhie ganaladxan delant loj Dios ni'qui delant loj ree bejn.

¹⁷Ma gojc zien ijz nariin, xt yan baye'c ladxan bidganë'n ni baxhaal ree bejn par ree bénprob, bidganë' tëen gon ni rayal gudëdan loj Dios.

¹⁸Laan naj ni cayünan lën yadooro' Jerusalén chi bi't ree bén Israel za

niz Asia baguiaa reeman naj, per mal benan zi'c rniabee ley din gacan naya. Abi' ad zient bejn riga', ad cabë tëetan wadijl. ¹⁹Yan, bén gunaaz ree naj, laa reeman naj bén rayal su guie din na reeman xhie rünan xhie pornin rdxe'ch reeman naj. ²⁰O balguiza, bén za' ree guie na reeman xhie da dolan badxejl reeman chi guzun loj gra ree guxtis Israel. ²¹Tijbzi ni benan chi za'n galay reeman gurixdiajn rën: “Guial rliladxan yaban ree bengüt, zeel za' ree bejn contr naj yan.”

²²Chi biguiejn gobernador Félix zian, abi' guial ragbeeman xhienaag naj xnejz cüb Jesucrist, dxel basa'nman guialquia guin par stijb dxej, rëbaman loj reeman: —Chi gui't suldad Lisias, dxel gagbeen zagdxe xhienaag naj xcwentidi.

²³Dxel gunabee gobernador guin tijb ree suldad rniabee guin din gusnuu guinia reex Pab, per guslaa reex güünman ni rënman ad gudxoon tëë reex chignaj ree xmiwaman laaman.

²⁴Chi goc tio'p choon dxej, bidxin gobernador Félix stijb con lacheelaman Drusila, laaman naj bén Israel. Dxel gunabee gobernador guin bidxin Pab, abi' bacaagdiajg reeman ni rëbaman xcwent guialrliladx bejn Jesucrist. ²⁵Per chi guzuloj cayëbaman guial rayal guiban ree bejn xnejz, gucweëz tëë xixgab mal reeman, guial guidxin tëë dxej yadëed ree bejn cwent loj Dios, dxel dád bidxeb gobernador guin abi' rëbaman loj Pab:

—Baguiaj. Ganetan lüj chi chu'n luar stijb.

²⁶Per Félix në milian rbëzaman gudëed Pab lojman din guslaaman laaman, zeel gurejdxaman laaman zien volt din guineeënman laaman. ²⁷Zian gudëd tio'p ijz abi' barrii Félix guial gobernador, dxel bayu Porcio Festo xluaraman. Abi' guial guyën Félix naya'nman zagdxe loj ree bën Israel, zeel basa'nman Pab ladxguiib.

Gunee Pab loj Festo

25 Chi goc choon dxej ni bidxin Festo Cesarea par chu'man guial gobernador, dxel wejman Jerusalén. ²Yagaj, bixhioz rniabee ree bixhioz con ree bën Israel mazri zojbloj, wej reeman lojman bile'c reeman xguialquia Pab, ³abi' gunab reeman lojman din guixhiaalaman Pab Jerusalén. Zian guyën reeman din xixgab reeman naj gugüjt reeman Pab runejz. ⁴Per badxi' Festo xtiidx reeman rëbaman guial Cesarea nayaaw Pab guiáad laaman nayob yaguiajman ni, ⁵abi' rëbaman loj reeman:

—Bén rajp ree guialrniabee lojdi, laa reeman sa Cesarea, abi' bal xhie ni mal been xin guin, ni na reeman xhienin beenx.

⁶Cost xhujn o chii dxej guzuj Festo Jerusalén, dxelri ziaman Cesarea. Chi bareguiaal, gurej loj xyagxhilaman lod rniabeeman, abi' gunabeeman chica' reex Pab. ⁷Chi bidxinnë reex laaman, bën Israel guza ree Jerusalén, gubig reeman abi' zien ree niguijdx badxiib reeman guijcaman, majsi ni'qui tijb ni rëb reeman ad gojct nulüü reeman guial najn ni wali. ⁸Dxel badxi' Pab xtiidx reeman, rëbaman:

—Naj, achet ni mal wayünan xley ree bën Israel, ni'qui yadooro' Jerusalén, ni'qui rey César.

⁹Per Festo guyënman naya'nman zagdxe loj ree bën Israel, dxel gunabdiidxaman loj Pab, rëbaman: —¿Rënl ya chel Jerusalén? Ni yanajn bal rajpil dol o ad rajptil dol ya ni rudxiib reeman guijquil.

¹⁰Badxi' Paban rëbaman:

—Loj ree guxtis Roman za'n, lod rayal gac reglad xhienin benan. Lüj ragbee zagdxe guial achet ni mal wayünan bën Israel ree. ¹¹Bal xhie tijb ni mal benan ni rayal guiëtan, ad zabexuutan guiëtan. Per bal id wali ni na reeman benan, achut rajp derejch yayü naj loj reeman. Zagdxeli naj gadëedan loj rey César.

¹²Dxel chi gulox guneeënë Festo bën naj ree xbejnman, bën rëb ree ni rayal gac, rëbaman loj Pab:

—Lüj na tädil loj rey César, yan lojman tädil.

Za' Pab loj rey Agripa

¹³Chi gudëd tio'p choon dxej, rey Agripa con xbéngunaaman Berenice bidxin reeman Cesarea bitixloj reeman gobernador Festo. ¹⁴Abi' guial zien dxej da't guzuj reeman ni, dxel be Festo diidx loj rey Agripa xcwent Pab, rëbaman:

—Guie yu' tijb xin basa'n Félix ladxguiib. ¹⁵Chi wan Jerusalén, bixhioz rniabee ree bixhioz con ree bën rniabee loj ree bën Israel gule'c reeman xguialquiax, gunab reeman ganabeen guiëtix. ¹⁶Per naj rën loj reeman guial guxtis Rom ree ad najt xcostumbr reeman nabee reeman guiët tijb bejn chi gadaman su loj ree bën cabe'c

xguialquiaman din guiëbaman walin ya o ad walitan ni rudxiib reeman guijcaman. ¹⁷Zeel chi bi't ree bën Israel guin guie, achet guial niaglaan, bareguiaal gajc gure loj da yaxhilar, abi' gunabeen bidnë reex xin guin. ¹⁸Per ree bën bi't gule'c xguialquiax, achet ni nadxeb na reeman zi'c gunaladxan ninia reeman por laax. ¹⁹Tijbzi xguialquiax ni gule'c reeman naj por xcostumbr reeman në por tijb bën la Jesús, bën ma güjt, per Pab rëb naban Jesús guin. ²⁰Abi' guial ad ragbeetan xhie günan por zian, dxel gunabdiidxan loj Pab bal rënch chex Jerusalén din gac reglad ni guin ree ni. ²¹Per laax gunab téd loj rey César din gac reglad ni rëb reeman por laax, zeel gunabeen yaawsiix xt chile' yaxhalan laax loj rey César.

²²Dxel rëb rey Agripa loj Festo: —Bal zian chile'n, nëgajc naj rën gucagdiag laax.

Abi' badxi' Festo laan rëbaman: —Guixie gucaagdiaguil laax.

²³Chi bareguiaal, dád zagdxë ca' xab rey Agripa con Berenice bidxin reeman con ree bën rniabee suldad con los demazri ree bën zojbloj luguedx guin, bidxin reeman guyu reeman lënü lod gucaagdiag reeman ni guiëb Pab. Dxel gunabee Festo bica' reex Pab. ²⁴Abi' rëb Festo:

—Rey Agripa në los demazridi dad za'nëdi dunujn guie. Bën ruguiaadi guie, gra bën Israel, zi'c Jerusalén zi'cgajc guie ma bi't reeman bidganaj reeman naj rniab reeman guiëtix. ²⁵Naj, achet xfaltix radxejlan guial rayal

guiëtix. Guiáad laax gunab téd loj César Augusto lod gac reglad xcwentix, abi' ma benan xgab yaxhalan laax. ²⁶Per ad radxejltan ni gucan por laax loj gui'ch ni gaxhalan loj rey César, bën rniabee naj. Zeel nuzun laax lojdi zi'c naj quijb lojl rey Agripa, din chi ma gulox gunabdiidxidi ni rayal guiniabdiidxidi lojx dxel ma yu' ni gucan por laax. ²⁷Din naj rülüü ad xnejzt naj yaxhalan tijb bën yu' ladxguiib loj rey César abi' ad zëtan xhie beenman.

Ni gunee Pab loj rey Agripa

26 Dxel rëb rey Agripa loj Pab:

—Ma zajc guinieel por lüj.

Abi' gules yaa Pab guzuloj rëbaman:

²—Dád nix yu' luxdon guial bile' za'n lojl yan rey Agripa, par ganen lojl yadxi' tëën gra ni rudxiib ree bën Israel guican. ³Din lüj ragbee zagdxë gra xcostumbr ree bën Israel, në conin rüjn persi rdildiidx reeman. Zeel rniabaan lojl gapil pasens gucaagdiaguil ni ganin.

Zi'c guban Pab gocli

⁴'Gra ree bën Israel ragbee xhienaag gubajnan con laa reeman zi'c ladxan zi'c Jerusalén, diidz xindoon. ⁵Ragbee tëë reeman abi' zajc na reeman laan bal rën reeman, guial diidz xindoon najn bënfarisew, abi' ree bënfarisew naj bën mazri zinal xley ree bën Israel. ⁶Abi' yan za'n guie, badëd reeman naj loj ree guxtis guial rliladxan yasban Dios bengüt ree zi'c beenman promejs loj ree dux bëngulal ree.

⁷Gra guidxiptio'p cwa' ree b́en Israel cab́ez dxej gúün Dios zian, zeel ŕen reeman laaman rújn t́eé reeman sirv lojman dxej guiaal. Abi' yan guial rliladxan laan zeel rbe'c ree b́en Israel da guialquian, rey Agripa. ⁸¿O naladxidi ya nawéeg yasban Dios bengüt ree?

Be Pab diidx xhienaag guzunalaman b́en rliladx ree Jesucrist

⁹Guia'xchej benan xgab rayal gúnan xhienin b́en rliladx ree Jesús, b́en Nazaret, ¹⁰abi' zian benan Jerusalén. Con xtiidx ree bixhioz rniabee ree bixhioz, zien ree b́en rliladx Jesucrist badxe'n ladxguiib. Abi' chi rugüjt reeman laa reeman, ńe naj ŕe guiétrí reeman. ¹¹Zien volt benan laa reeman xhienin din gúnan naguiejn gusa'n reeman guialrliladx reeman Jesucrist. Zian benan ĺen gra ree yadoo, abi' guial tant rdxe'chan laa reeman dxel guzunaalan laa reeman xt luguiedx ren ree.

Be Pab diidx stijb xhienaag bililadxaman Jesucrist

(Hch. 9:1-19; 22:6-16)

¹²'Abi' par zian za'n Damasco, con quijb xtiidx ree bixhioz rniabee ree bixhioz. ¹³Per ganin lúj rey Agripa, lunejz baguian tijb xbacha' xanyabaa zi'c garol dxej, per mazri naynin guial loj ni rusni gubijdx, abi' basnin guidib lod za'n con ree b́en ziné'n. ¹⁴Abi' dugraczan bareeyuj, dxel biguiejnan cha' b́en gunee naj con diidx hebreo, naman: "Saulo, Saulo, ¿chexc zeel rzunalil naj? Lúj gajc rguuil xguialnaal zi'c go'n rudxegua' loj yag rulaagné

reeman laab." ¹⁵Dxel ŕen: "¿Chu lúj Dad?" Badxi'man laan naman: "Naj naj Jesús b́en rzunalil. ¹⁶Per bixche, guzuli, din balúlon lojl par gúünl naj sirv gü t́eél diidx ni baguiaal yan ńe ni gulún lojl. ¹⁷Naj gaxhal lúj loj ree b́en Israel ńe loj ree b́en ad najt b́en Israel, abi' naj gagné' lúj chit́eé xhie gúün reeman lúj. ¹⁸Gaxhalan lúj loj reeman din guixhialil loj reeman gusa'n reeman nejz mal, chinal reeman nejz zagdx. Ad tiébri reeman nabee xindxab laa reeman, chinal t́eé reeman xnejz Dios. Abi' chililadx reeman naj din gac xtol reeman perdon yayal t́eé reeman ni rayal gra ree xbejn Dios, b́en ma naya ree delant lojman."

Bazoob Pab diidx ni balúuloj lojman

¹⁹'Zian gojc, rey Agripa, bazoban diidx benan ni na Jesucrist lon chi guneeman naj diidx xanyabaa. ²⁰Yaloj luguiedx Damasco gutiechan xtiidxaman, dxelri Jerusalén ńe guidib niz Judea ńe loj ree b́en ad najt b́en Israel. Ŕen loj reeman din yayújn reeman xgab por xtol reeman, yadxi' loj reeman loj Dios gúün t́eé reeman ni rayal gúün reeman din guiguien guial ma bidxaa mod naban reeman. ²¹Abi' por zian, gunaaz ree b́en Israel naj ĺen yadooro' Jerusalén, guyén reeman nugüjt reeman naj. ²²Per con xyudar Dios laa naj guie xt yan cusnuu cayün xtiidxaman loj gra ree bejn, zi'c ree b́en zojbloy zi'c ree b́en ad zojblojt. Abi' gra ni ŕen loj reeman naj ganax ni bacaa ree b́en badéé xtiidx Dios loj ree bejn ńe ni bacaa Moisejs xhienaag

naj ni gac, ²³guial Cristo naj guial tédaman guialzi, guiëtaman. Per chi ma güjtaman yaloj laaman naj Bén yaban loj ree bengüt, abi' gugojnman Bén Israel ree në ree Bén ad najt Bén Israel xhienaag gap reeman perdon.

Nuyën Pab nililadx Agripa Jesucrist

²⁴Chi cayëb Pab zian, dxel gudidxa' Festo rëbaman: —iRajcguijquil Pab! guial tant rusiidil ma rajc guiijquil.

²⁵Per badxi' Pab laan rëbaman: —Ad guictan rajc, gobernador Festo. Ni canin najn xnejz në diidxli.

²⁶Laa rey Agripa za' guie, laaman ragbee ni canin, zeel sin guialrdxeb canen delant lojman. Naj ragbee chaaw guial laaman ragbee gra ni canin, din ad canitan ni goc ralan lod achut zajc gagbee laan.

²⁷¿Rliladxil ni rëb ree Bén badëäd xtiidx Dios loj ree bejn ya, rey Agripa? Naj ragbee guial rliladxil.

²⁸Dxel badxi' rey Agripa laan rëbaman: —Sta'nczi nüjnl naj gan nililadxan Jesús.

²⁹Abi' rëb Pab: —Majsi sta'nz o majsi ryaadxri, na Dios guial ad tijbtzi lüj, në gra ree Bén cucaagdiajg ni canin yan, guidxin dxej chililadxidi Jesús zi'c naj, majsi ad nët ree caden guie.

³⁰Dxel bisu rey Agripa con gobernador Festo con Berenice në gra ree Bén zojbnë laa reeman ni.

³¹Chi bariica reeman tiblax guzulox cayünë lasa' reeman diidx, rëb reeman:

—Achet wayüjn xin guie ni rayal guiëtix, o chu'x ladxguiib.

³²Dxel rëb rey Agripa loj Festo: —Zile' naslaa reex, balidix niniab tédix loj rey César.

Baxhaal reeman Pab Rom

27 Chi rëb reeman ma yaxhaal reeman dunujn Italia, dxel bayü reeman Pab con sta'n ree Bén yu' ladxguiib loj tijb suldad rniabee la Julio, laax rniabee tib cwaa ree suldad la Augusto. ²Abi' Cesarea badxu'n loj tijb xbarcw ree Bén Adramitio, barcw ni ma grii chen guiedx riga' ree niz Asia. Në Aristarco bunë'n, Bén Tesalónica, guiedx riga' niz Macedonia. ³Chi bareguiaal, badxinan Sidón, lod goc Julio xinza'c da't con Pab, cwëjbix bitixloj ree xmiw Pab luguiedx guin abi' badëäd reeman ni ryaadxaman. ⁴Chi badxoon Sidón badiaawan Chipre yuj riga' loj nijsdoo, basa'nanan dux ladruvejsan chitëë yachaaglojn zro' bi, din niz du lojn rliaj bi guin. ⁵Badüüdan loj nijsdoo gajxh Cilicia në Panfilia abi' badxinan Mira, tijb guiedx nulen Licia.

⁶Ni bidxaagloj suldad rniabee guin tijb barcw Alejandría ni che Italia, zianz nax yadxu'n lojn. ⁷Loj zien dxej bio'n chaawladx, con guidib tarbajw badxinan niz lod la Gnido. Abi' guial sta rliaj bi niz du lojn, dxel zagdxeli badüüdan niz Salmón, badiaawan lod la Creta yuj riga' loj nijsdoo. ⁸Gadëd ro' yuj guin zio'n loj nijsdoo, per con guidib tarbajw, xt badxinan tijb luar la Buenos Puertos, gajxh niz lod naj guiedx la Lasea.

⁹Abi' zi'ct ma bayaglaan, ma naj nadxeb yasnuu yo'n loj nijsdoo,

din ma zidyob tiamp nayaag. Zeel gunee Pab, ¹⁰rëbaman loj reeman:

—Dad, ad zagdxet yo' ree bal yasnuu yo' ree, din nadxeb guize'n barcw guin abi' guire'ch gra ni yu' lojn loj nijs guin, xt në dunuj ree nadxeb yayëjt ree.

¹¹Per suldad rniabee guin mazri beencwentix bën rusa barcw guin në bën naj xbarcw laan, guial loj ni rëb Pab. ¹²Abi' guial ad zagdxe tëët naj yagaj par yadüüdan tiamp nayaag, dxel mazri zien reeman been xgab zagdxeli naj yariin yagaj, yaguieenan naguiejn yadxinan Fenice, tijb guiedx nulen Creta lod ad rbi' tëët bi, ni yadüüdan tiamp nayaag.

Gubi' tijb bidoxh loj nijsdoo

¹³Dxel guzuloj cabi' tijb bi chaawladx ni zëäd lad sur, abi' gunaladx reeman ma bile' zi'c naj xixgab reeman, zeel bariin bio'n loj nijsdoo gadëd ro' yuj Creta. ¹⁴Per ad wayajet xchej zio'n chi birii tijb bidoxh la Euroclidón loj nijs guin. ¹⁵Abi' guzuloj bi guin culadxaan barcw guin. Në guial niz du lojn zëäd bi guin dxel ad gojctri nusnuu barcw guin niejn niz lod rayal niejn, abi' baslaa reeman binë barcw guin dunuj niz lod cucadxa bi guin laan. ¹⁶Dxel badüüdan xijch tijb yujdobëz la Claudia riga'n loj nijs, lod ad rbi'tri bidoxh guin, abi' canu naxii xan barcw guin con guidib tarbajw balë'panan loj barcw guin. ¹⁷Dxel chi gulox balë'pan canu guin loj barcw guin, batiejl reeman duu lad barcw guin chitëë yaze'nan. Abi' guial rdxeb reeman chëëztiej barcw guin lën üx la Sirte, dxel gulet

reeman xlon ree barcw guin din cwentzi chinë barcw guin dunuj niz lod rucadxa bi guin laan. ¹⁸Chi bareguiaal, ziangajc rbi' bidoxh loj nijs guin, zianz guzuloj cuzaal reeman ni nüü barcw guin loj nijs guin. ¹⁹Ni bayon dxej, cwa' reeman gra ree ni rüjnnë barcw guin dxiin bazaal reeman loj nijs guin. ²⁰Zien dxej ad biguient gubijdx ni'qui ree bajl xanyabaa por bidoxh gubi' loj nijs guin, dxel dunuj ad naguieentri du luxdoon yalaan loj nijs guin.

²¹Abi' guial ma gojc zien dxej ni achetctzi wadaawan, dxel guzuli Pab galay reeman, rëbaman:

—Dad, zagdxeli nucaagdiajguidi da diidxan ad nariit ree Creta, zian ad nadüüdt ree tarbajw guie achet tëët nasëëb ree. ²²Per achet güünan, ad rdxebidi din ni'qui tijbidi ad zëjt, tijbzi barcw guin yaze'n. ²³Din Dios rniabee naj, bën cayünan sirv guxhaal tijb xi anjlaman balüüloj lon yan guiaal. ²⁴Abi' na anjl guin lon: “Pab, ad rdxebil, din rayal sul loj rey César, abi' por lüj ni'qui tijb ree bën zëäd loj barcw guie ad zuslaat Dios guiët reeman.” ²⁵Zeel yan dad, gol badxe' luxdoodi zagdxe, din naj rliladxan Dios, ragbee tëën zagdxe guial gac zi'c na anjl guin lon. ²⁶Per gag barcw guie niz ro' tijb yuj riga' loj nijsdoo.

²⁷Chi goc chiin gubijdx ni zio'n loj nijs guin, guxhinzi badxinan niz loj nijsdoo la Adriatico, niz ni niz guie zë barcw guin loj nijs guin por bi guin. Abi' ree bën nulen barcw guin, guxhinzi zi'ct garol guiaal gogbee reeman guial zamer yadxinan loj yuj.

²⁸Dxel bare'xh reeman plact naxhit nijs guin, najn zi'ctiubitib mejtr naxhit. Mazri delant bare'xh reeman laan zatijb ma najn gajlbiadx mejtr naxhit.

²⁹Abi' bidxeb reeman laro' barcw guin guiaj ree, dxel niz xijch barcw guin bazaal reeman tajp ganch guiib loj nijs guin din chile' sudxe barcw guin, abi' ma rën nejzdoo reeman yareguiaal. ³⁰Bén nulen ree barcw guin, been reeman bén sta cuzaal ree ganch guiib guin loj nijs guin niz loj barcw guin, naabzi par calet reeman canu chu' reeman par guxüün reeman.

³¹Per bagojn Pab suldad rniabee con ree xsuldadix, rëbaman loj reex:

—Bal id ree bén guin yaya'n loj barcw guie, ad zalaatridi.

³²Dxel batüüg ree suldad guin ni naxii canu guin persi zinë nijs canu guin. ³³Chi ma cayni luyuj, rëb Pab loj reeman din gaw reeman, rëbaman loj reeman:

—Ma gojc chiin gubijdx ni ad raayëjstidi achet tëtë wayawidi.

³⁴Naj rni lëjt, gol gudaw din guibandi, din gradi ni'qui tijb guidxguijquidi ad zusëëbtidi.

³⁵Chi rëb Pab zian, cwa'man tijb guiadxtil, abi' badëëman quixtëë loj Dios niz loj gra reeman, dxel gula'man guiadxtil guin guzuloj cayawaman.

³⁶Dxel bayu luxdoo gra reeman, guzuloj nëgajc laa reeman cayaw.

³⁷Tio'pgayuu gayojnchiibixho'p nayajc dugran zio'pan loj barcw guin. ³⁸Chi gulox gudaw reeman xt bixienladx reeman, dxel bazaal reeman trigo loj nijs guin persi bacha barcw guin.

Bize'n barcw loj nijsdoo

³⁹Chi bareguiaal, bén nulen ree barcw guin, ad bayünbeet reeman

yuj badxin reeman. Per baguiaa reeman tibda'n nijsdoo guin riga' üx gadëëd ro'n, abi' been reeman xgab badxig reeman barcw guin yagaj. ⁴⁰Dxel batüüg reeman ni naxiinë ree ganch guiib guin ni rüjn yudar par sudxe barcw guin loj nijs, basa'n reeman ganch guin ree loj nijs guin, abi' baxhiee reeman yag ni rüjn yudar par sa barcw guin din suloj san. Dxel gules reeman lon ni naj niz lucwaj barcw guin din guiniaazan bi, zianz guzuloj cayriica barcw guin niz ro' nijs guin. ⁴¹Per wëëztiejn loj üx zien lod bigagan. Niz guijcan wëëz lën üx abi' ni'quid rniibtan, guiáad niz xan guin guzuloj cayze'n nan con gojl rliaj nijs guin ladan. ⁴²Dxel nuyën ree suldad guin nugüjt reex bén prejs guin ree, chitëë nixoojnijs reeman abi' nuxüün reeman. ⁴³Per suldad rniabee guin ad cwëjbtix niajc zian guial ad rëntix niëjt Pab, dxel gunabeex guial bén rajc rxoobnijs ree, yaløj laa reeman chu' loj nijs guin güün reeman naguiejn yarii reeman ro' nijs guin. ⁴⁴Dxelri ma guidnal gra reeman loj ree tabl o loj ree yag ni baze'n barcw guin. Zian balaan, dugran badxin ro' nijs guin.

Bidxin Pab Malta

28 Chi gulox barii dugran lon nijs guin, dxel bayagbeen yuj lod badxinan lan Malta riga'n galay nijs. ²Bén naj ree bén ni, dád benza'c gojc reeman con dunujn. Been reeman tijb bajl guial nayaag nëtëë guial cayal guia, abi' na reeman du lojn din yubiigan cwë' bajl guin. ³Dxel bato'p Pab ta'n yagbidx, zianz chi cudxe'man laan

loj bajl guin briyaal tijb bëël lën yag guin por xi xliaa bajl guin, abi' gudawya'b yaa Pab nalbëztib yaaman. ⁴Chi baguiaa ree bën Malta guin nalbëz bëël guin yaa Pab, dxel rëb loj lasa' reeman:

—Xin guie bejn bagüjtix, zeel majsi gulaax loj nijsdoo, per guiëtczix por ni beenx.

⁵Per gudxijp yaa Pab abi' biabj bëël guin loj bajl guin, guiáad laaman achet gocaman. ⁶Gra reeman cabëz saaguij yaaman, o dxejlczí yabaman guiëtaman. Per chi gojc xchej, chi baguiaa reeman achet gocaman, bachaa xixgab reeman abi' guzuloj rëb reeman guial tijb dios najman.

⁷Gajxh lod badxu'n naga' ree xguidxliuj tijb bën zobjloj loj yuj riga' loj nijs guin, laman Publio. Naman du lojn yo'n lidxaman, ni badxu'n choon dxej, dád benza'c tää gojcaman con dunujn. ⁸Nadxel naga' xdadaman, ragxuuman, yu'man xliaa rajc tääman yoobrej. Abi' guyu Pab lod naga'man, zianz chi gulox gurejdx gunabaman Dios por laaman, dxel guxhoob yaaman guijcaman abi' bayajcaman. ⁹Chi gogbee ree bënragxuu zobj ni ni goc, bi't reeman lod za' Pab persi bayüjnman laa reeman. ¹⁰Dxel dád zien ni bazaladx reeman du lojn por zian. Abi' chi badxu'n loj barcw par yadxoön yagaj, banee reeman gra ni rayaadxan lunejz.

Bidxin Pab Rom

¹¹Choon bëëw badxu'n loj yuj zii, dxelri badxu'n loj tijb barcw Alejandría, ni bitëd ni tiamp nayaag. Niz lucwaj barcw guin ca tio'p ree

dxan bën la ree Cástor në Pólux.

¹²Dxel badxinan tijb guiedx la Siracusa, yagaj badxu'n choon dxej.

¹³Abi' yagaj badxoön bio'n gadëd ro' nijsdoo xt badxinan guiedx la Regio. Chi bareguiaal, chi badxoön yagaj, brii tijb bi lad sur dxel ni barojp dxej badxinan luguiedx la Puteoli. ¹⁴Yagaj badxaagan tio'p choon ree bën naj ree bën ni në reeman rliladx Jesucrist, dxel na reeman du lojn yaya'nnë'n laa reeman abi' baya'nnë'n laa reeman toxman. Zian gojc, dxelri zio'n Rom. ¹⁵Guiáad ree dux compniaran bën rliladx ree Jesucrist, bën zobj ree Rom, ma ragbee reeman guial yadxinan yagaj. Dxel brii reeman bidgachaagloj reeman dunujn xt lod la Foro de Apio në luguiedx la Tres Tabernas. Chi baguiaa Pab laa reeman, babaaman abi' badëëman quixtëe loj Dios. ¹⁶Chi badxinan Rom, dxel bayü suldad rniabee guin bën prejs guin ree loj tijb ree suldad rniabee ni. Per cwëjb reeman gurej Pab stijb yu ren lod gojp tijb suldad laaman.

Gunee Pab xtiidx Jesucrist Rom

¹⁷Chi goc choon dxej badxinan Rom, gurejdx Pab bën Israel zobjloj ree ni. Chi badxajg lasa' reeman, dxel rëbaman loj reeman:

—Compniar Israel, achet wayünan contr ree bën Israel ni'qui contr xcostumbr ree dux búngulal ree. Guiáad laa reeman gunaaz reeman naj Jerusalén, bayü reeman naj loj ree guxtis Rom. ¹⁸Abi' ree bën Rom guin chi gulox badëdan cwent loj reeman, dxel nuyën reeman

nuslaa reeman naj, guial gogbee reeman achet benan par guiëtan. ¹⁹Per ree bén Israel guin badxoon reeman abi' zagdxeli gunaaban gadëedan loj rey César, per ad guial ra'ptan xhienin contr ree bén Israel. ²⁰Zeel guredxan læjt, din guidganajdi naj din ganin lojdi guial por ni rliladxan guial yaban ree bengüt zi'cgajc rliladx gra ree du lasa' bén Israel ree, zeel naxiin con ree caden guie.

²¹Dxel rëb reeman lojman: —Dunuñ ni'qui tijb xtiidx ree bén Judea ad waca'tan lod na reeman xcwentil, në ni'qui tijb bén duladx ree bén raza ree Judea achet wana reeman du lojn contr lüj. ²²Per rayënan yaguiejn xhienaag naj xixgabil, din dunuñ rayagbee guial gra ladczi rníee reeman contr religion cüb guin.

²³Dxel bazuj reeman tijb dxej ni yadxajg lasa' reeman. Chi bidxin dxej guin, dád zien bejn bido'p lod zojb Pab. Abi' diizd rsil xt wadx guneenëman laa reeman xhienaag naj xguialrniabee Dios. Beenman naguiejn chilliladx reeman Jesús, baza't tëëman lod rníee xcwent Jesús loj xlibr ley Moisejs në ni bacaa ree bén badëë xtiidx Dios loj ree bejn. ²⁴Yu' reeman bililadx ni rëb Pab, per yu' reeman ad bililadxt. ²⁵Abi' guial ad rdxagt

gü reeman diidx, guzuloj bare'ch reeman. Dxel rëb Pab loj reeman: —Waliqni ni rëb Isafas bén badëë xtiidx Dios loj ree dux béngulal ree guial rëb xSprijt Dios:

²⁶Wej, güjdx loj ree bén guin: Majsí rigúiejn reeman, per achetczi chignia' reeman, abi' majsí rugúiaa reeman, per ruliüü ad rugúiaat reeman. ²⁷Din been luxdoo reeman gojl, abi' rüjn reeman zi'c ruliüü ad rugúiaat reeman, ad rigúiejn tëët reeman, chitëë gugúiaa reeman, abi' guien reeman chignia' tëë reeman.

Din ad rënt reeman gui't reeman con naj, abi' günan laa reeman perdon.

²⁸Zeel gol gogbee guial diizd yan, loj ree bén ad najt bén Israel guire'ch diidx xhienaag gap reeman xperdon Dios, abi' laa reeman zaliladx reeman diidx guin ree.

²⁹Chi gulox rëb Pab zian, dxel zia ree bén Israel guin, cadildiidxnë lasa' reeman.

³⁰Tio'p ijz gurej Pab ni, yu lod gudixaman. Ni rníeenëman gra ree bén rtixloj laaman. ³¹Sin guialrdxeb rëbaman loj reeman xhienaag naj xguialrniabee Dios, abi' guneeman xtiidx Dad Jesucrist loj reeman sin guial chu nudxoon.